



DISQUISITIO
DE
INVESTIGANDA VERA QVANTITATE
PARALLAXEOS SOLIS,

EX
TRANSITV VENERIS
ANTE
DISCV M SOLIS

Anno 1769,

CVI ACCEDVNT
ANIMADVERSIONES IN TRACTATVM
REV. PAT. HELL

DE
PARALLAXI SOLIS.

AVCTORE

ANDREA JOH. LEXELL.

Socio Acad. Imp. Scient. Petropolit.

PETROPOLI,
Typis Academiae Imperialis Scientiarum.

1772.



DISCOUNT
FOR
CASH
PAID
TO
THE
BANK
OF
AMERICA
NEW YORK

THE
BANK
OF
AMERICA
NEW YORK

THE
BANK
OF
AMERICA
NEW YORK

THE
BANK
OF
AMERICA
NEW YORK



THE
BANK
OF
AMERICA
NEW YORK





DISQVISITIO
DE
INVESTIGANDA
PARALLAXI SOLIS

EX
TRANSITU VENERIS PER SOLEM

Anno 1769.

I.
Quamquam omnes qui ex nouissimo transitu Veneris per Solem, parallaxin Solis definire susceperunt, de eo inter se contentiant quod valor parallaxeos pro tempore transitus 8 minuta secunda excedat, contra vero infra 9 secunda subsistat; tamen si de exactiori mensura huius Parallaxeos quaestio sit, tantam inter varios Auctores reperimus discrepantiam,

ut in eam facile quis induci posset opinionem, de hac parallaxi vix cum praecisione semissis secundi aliquid certi statui posse. Quemadmodum enim nonnulli, parallaxin pro tempore transitus 8, 3 secundorum fuisse perhibent, ita ex aduerso alii eam vsque ad 8, 75 secunda augere haud dubitant, inter quas determinationes, omnino maior est dissensus, quam ut hoc in negotio admitti posse videatur. Operae igitur pretium esse duxi, hac Dissertatione expendere, vtrum et quovsque de vera quantitate parallaxeos Solis, vel aliquid certi, vel probabiliter saltem definiri potest; tum vero etiam rationes explicare ex quibus factum est, ut varii Auctores pro Parallaxi inuenerint valores a veritate haud parum discrepantes, simulque istas cautiones perspicue definire, quibus opus est, ne in hac investigatione illae committantur fallaciae. Quibus praemonitis, conclusiones adferam, quas ex calculis omni rigore et exactitudine institutis, pro Parallaxi Solis deduxi, quae conclusiones si cum iis, quas alii Auctores se inuenisse affirmant, comparentur; haud obscurum euadet, quid de vera quantitate Parallaxeos Solis iudicandum sit.

2. Quoniam tota investigatio Parallaxeos Solis observationibus contactuum Veneris cum Sole innitatur, atque in his observationibus aliquales errores inesse possunt, facile intelligitur certos praescribi limites, intra quos non nisi cum maiori vel minori probabilitate de valore Parallaxeos aliquid definiri potest. Quem-

Quomadmodum enim eae conclusiones Parallaxin spectantes omnino pro certis et indubitatis haberi merentur, quibus in dubium vocatis, observationibus tantum tribuendi sunt errores, qui omni verisimilitudine destituuntur et quos pro absurdis tuto habere licet; ita eae conclusiones tantum ut probabiles spectandae sunt, quibus negatis, observationibus maiores non inferuntur errores, quam quos ipsis inesse posse, experientiae nequaquam repugnet. Perspicuum igitur hinc euadit pro certissima et indubitata veritate habendum esse, quod Parallaxis Solis decem minutis secundis multo minor sit, quippe quum ex valore Parallaxeos decem secundorum, sequeretur observationibus errores inesse, qui usque ad duo, tria immo quatuor minuta prima increverent, quod nemine contradicente pro maximo absurdo habere licebit. Simili modo etiam pro certo affirmare possumus Parallaxin Solis certe maiorem esse $8''$, contra vero minorem $9''$, quum ex utraque suppositione Parallaxeos siue 8 , siue 9 secundorum, aliae atque aliae observationes fide dignissimae in suspicionem venirent errorum usque ad minutum primum et ultra assurgentium, quod etiam omni destituitur verisimilitudine. Immo pro certo etiam asserere audemus Parallaxin Solis tempore transitus (a) inter hos limites $8''$, 3 et $8''$, 7 necessario

A 3

con-

(a) Necessum est ut hoc loco moneam, quod ubicunque in hac Dissertatione voce Parallaxeos simpliciter utar, sermo sit de parallaxi aequatorea Solis tempore transitus; parallaxin autem Solis distantiae mediae conuenientem, nomine Parallaxeos mediae indigitabo.

contineri, quum alterutro horum valorum pro vero assumpto, obseruationibus quae caeteroquin omnes veritatis characteres prae se ferunt, 40 vel 30 secundorum errores essent tribuendi. Infra autem susius explicabimus, vnde isti characteres sunt deducendi ex quibus de obseruationum probabilitate iudicium institui oportet. Sin autem nunc limites pro valore Parallaxeos magis coarctentur, conclusiones hunc valorem spectantes non amplius pro indubitatis haberi merentur, sed maiori tantum vel minori probabilitate gaudebunt. Sic etiam si mihi quidem valde probabile videatur, parallaxin Solis excedere $8''$, 4 et aliquanto minorem esse $8''$, 6, hanc tamen conclusionem pro indubitata pronuntiare vix ausim, et si limites Parallaxeos adhuc magis restringantur ex. gr. ad $8''$, 45 et $8''$, 55 omnino persuasus sum vtrumque horum valorum admitti posse, obseruationibus etiam melioris notae non multum repugnantibus. Verum igitur valorem Parallaxeos Solis pro iis quibus obseruationes laborant erroribus, vix cum maiori praecisione quam decimae partis secundi definiri posse existimo, ex quo circa inuestigationem Parallaxeos hanc regulam praescribendam esse censeo, vt is valor pro Parallaxi maxime probabilis habeatur, qui obseruationibus saltem melioris notae optime satisfacit.

3. Quod Auctores de quantitate Parallaxeos Solis in tot diuersas abierint sententias, ex duplici imprimis ratione factum esse credimus; *primum* quod effectus

effectus Parallacticos adhibuerint non vsquequaque exactos, tum vero *secundo* quod de obseruationum praestantia et exactitudine diuersimode iudicauerint. Quod igitur priorem errorum causam attinet, tenendum est etiam minutiores quasdam aberrationes hac in disquisitione euitandas esse, vbi vnusquisque Auctor summam exactitudinem et praecisionem suis calculis vindicare velle videtur. Quamobrem nunc quidem breuiter explicabimus, quid in Methodis ab Astronomis receptis pro computandis effectibus Parallaxeos iure meritoque desiderari possit. *Primum* igitur obseruo in his Methodis aberrationem quandam inde esse metuendam, quod pro computo Parallaxeos nulla plane haberi soleat ratio verae figurae Telluris. Si enim PZz Fig. 1. designet meridianum alicuius loci, in quo P sit Polus aequatoris, Z zenith apparens spectatoris, z punctum vbi recta per centrum telluris et locum spectatoris ducta meridiano occurrit, atque ponatur esse C locus Solis, V locus Veneris verus et D locus eius apparens; perspicuum omnino est effectum Parallaxeos computari debere, non quemadmodum vulgo fit secundum arcum circuli maximi ZVd, sed secundum arcum zVD. Si scilicet ducta concipiatur linea CV', facile patebit angulum CVD pluribus minutis primis differre posse ab angulo CVd, vnde si posterior loco prioris adhibeatur, errores inde haud contemnendi emergere possunt, quando effectus Parallaxeos secundum directionem VC exquiri debet, vt taceam ipsam quantitatem lineae VD saepe multo aliam prodire

dire pro hypothefi figurae Telluris sphaeroidicae, quam si Tellus conciperetur esse perfecte sphaerica.

Fig. 2.

Qualiscunque autem sit aberratio hinc oriunda, aliquibus tamen in casibus multo maior est, quae II^o inde prodit, quod arcus circulorum maximorum zVA et zC per centra Solis et Veneris ex puncto z ducti, ut inter se paralleli considerentur. Etiam si enim plures sint casus, ubi angulus AVC ab angulo VCz non nisi aliquot minutis primis differat, dantur tamen omnino casus, quibus differentia horum angulorum ad plures gradus vsque increfcit, quemadmodum factum esse nouimus pro obseruationibus contactuum Veneris in ingressu St Iosephi in California institutis, pro quibus scilicet angulus AVC fere tribus gradibus angulo VCz maior reperitur, quae differentia omnino maior est, quam ut eam tuto negligere liceat. Deinde III^o perpendendum est angulum AVC adhuc nouam admittere correctionem, qua ad angulum DVC reducitur. Sit enim VA parallaxis distantiae Veneris a puncto z , CO parallaxis Solis, ductaque concipiatur AD parallela et aequalis ipsi CO et iungatur VD . Tum facile quidem patet verum effectum Parallaxeos pro loco Veneris immutando, statui debere aequalem lineae VD , id est si locus Solis per parallaxin nullam mutationem subire concipitur, intelligendum est locum Veneris verum V ob parallaxin mutari in locum apparentem D . Angulus autem DVC qui aequalis est summae angulorum

lorum AVC et DVA , nunc multo magis discrepabit ab angulo VCz . Caeterum observari mere-
tur, quod quum sit

$$DVA : DAV :: DA : VD :: DA : AV - DA :: z : 5$$

proxime, tum vero quoque habeatur ang. $DAV = VzC$ satis prope, esse ang $DVC = VCz + \frac{1}{2} VzC$ saltem cum praecisione aliquot minorum secundorum, vnicum si excipiamus casum observationis in California factae, pro quo si placuerit angulum AVC exactius computare licebit. Aberratio vero ista pro valore anguli DVC non solum tum insignis est momenti, quando angulus AVC multum ab angulo VCz differt, sed etiam iis in casibus, vbi angulus DVC proxime ad rectum accedit; quantilla enim fuerit aberratio, quae tum committitur in valore anguli DVC assignando, illa maximum habere potest influxum, quando effectus Parallaxeos secundum directionem VC determinari debet; quippe quum reductio lineae VD ad effectum secundum VC , potissimum pendeat ex cosinu anguli DVC , qui pro casu quo DVC a recto non multum discrepat, ex levi mutatione ipsius anguli, insigniter immutari potest. Huiusmodi autem obtinent casus pro contactibus in egressu ad Sinum Hudsonis observatis, erat enim angulus DVC pro his observationibus a 90° non multum discrepans. Propter has igitur iam allatas rationes factum esse censemus, quod *Cel. D. de la Lande* pro contactu interno in ingressu Californiae

B

effectum

effectum Parallaxeos in tempore iduenerit $+18'', 1$, quem iduenter debuisset $+16'', 8$, contra autem pro contactu interno circa egressum ad Sinum Hudsonis eum inuenerit $+37'', 0$, qui tamen reapse est $+38'', 5$. Fator quidem hos errores esse exiguos, neque valores Parallaxeos inde multum reddi dubios, simul tamen concedendum esse existimo; quod si plures huiusmodi errores accumularentur, fieri posse ut valor mediis pro Parallaxi inuentus saltem $\frac{1}{10}$ parte minuti secundi a veritate discrepet. In genere autem tenendum est, huiusmodi calculos ita instituendos esse, ut quantum fieri possit, summam prae se ferant exactitudinem, ne scilicet propter defectum Theoriae et Methodorum conclusiones reddantur dubiae, praepriis ubi ob incertitudinem observationum haud leuibus erroribus euadere possunt obnoxiae.

Fig. 2. 5. Quo autem melius intelligantur, quae de valore anguli DVC rite determinando supra monuimus, eadem heic vno obtutu Lectoribus ob oculos ponere iuuabit. Si igitur z fuerit punctum ubi recta per centrum telluris et locum obseruatoris ducta meridiano occurrit, C locus Solis verus, et V locus Veneris, ductique concipiantur arcus circulorum maximorum zCO , zVA , capiatur CO aequalis effectui parallaxeos pro Sole et VA simili effectui pro Venere, tum vero per A ducta concipiatur AD parallela et aequalis ipsi CO et iungatur DV . Quod si nunc locus Solis per parallaxin non mutari concipitur,

piatur, facile quoque perspicitur ob effectum paral-
laxeos distantiam apparentem centrorum Solis et Ve-
neris esse aequalem ipsi DC , ideoque effectum Pa-
rallaxeos pro distantia centrorum aequari ipsi $CV - CD$
 $= CV - AO$. Ex iis autem quae supra attulimus,
patet angulum $DVC = DVA + AVC$ fore quam
proxime aequalem $VC \approx \frac{1}{2} V \approx C$. Quodsi nunc
Methodus communiter recepta pro inueniendo angulo
 DVC , cum hac iam exposita conferatur; facile patet
in valorem istius anguli insignes errores irrepere
posse, si calculi ad praescriptum Methodi vulgaris in-
stituantur. Praeterquam enim quod in Methodo vul-
gari loco puncti z ipsum zenith usurpari soleat, cir-
culi zCO , zVA ut inter se paralleli spectari so-
lent, tum vero denique anguli DVA nullus plane
habetur respectus.

6. *Altera* autem eaque potior ratio insignis
discrepantiae, quae inter Auctorum sententias de Pa-
rallaxi inuenitur, deducenda est ex diuersitate iudicio-
rum, quae de observationum exactitudine et praestan-
tia ferri solent. Quum scilicet durationes totius trans-
itus a Rev. P. Hell in Wardhus et Cel. D.
Planman Caieneburgi obseruatae plus iusto inter se
discrepent; Auctores vnā vel alteram harum obser-
uationum in fauorem alterius, erroris condemnandam
esse existimarunt, licet valde quidem probabile sit in
vtraque aliqualem latere errorem. Verum enimvero
instituti mei ratio nunc quidem non postulat, ut hoc
ipsum

ipsum heic exacte demonstrem; siquidem de errorum observationum infra fusius agendi dabitur occasio; quare characteres tantum quosdam exponere conducet, ex quibus de praestantia observationum saltem probabiliter iudicare licet. *Primus* igitur character veritatis observationum merito habetur, quod momenta a pluribus in eodem loco obseruatoribus, pro contactibus assignata, non multum inter se discrepent; quamuis enim aliqualis dissensus ex diuerso effectu tuborum et diuerso acumine visus oriundus omnino admitti debeat, tamen si is ultra 15 aut 20 secunda assurgit, ipsam observationum probabilitatem non potest non multum infringere. *Secundus* character veritatis inde deducitur, quod si alicubi contactus tam internus, quam externus imprimis pro egressu fuerit obseruatus, mora inter hos contactus ex obseruationibus talis prodeat, quae conciliari possit cum mensura diametri Veneris, quam quidem 57",2 esse probabiliter statuere licet, vel saltem non nisi duabus decimis partibus secundi maiorem. *Tertium* characterem veritatis in eo merito constituimus, quod obseruationes in variis locis factae, pro quibus effectus parallaetici non multum diuersi sunt, easdem proxime praebant differentias meridianorum inter haec loca, quae iam ex aliis obseruationibus stabilitae sunt. Quum igitur obseruationes Grenouici, Parisiis, Stockholmiae et Vpsaliae inter se comparatae, satis bene consentiant et de differentiis meridianorum inter haec loca nullum sit dubium, tuto statuere licet, reliquas obser-

obſervationes pro contactibus internis in ingreſſu in
in variis locis Europeicis inſtitutas, eatenus pro ex-
actis habendas eſſe, quatenus cum medio inter obſer-
vationes in locis iam nominatis capto bene conſen-
tiunt. Pro contactu interno in ingreſſu aequè cer-
tum veritatis criterium non quidem ſuppedit, quum
pro Petropoli, qui vnicus eſt locus ex iis vbi egreſ-
ſus fuit obſeruatus, cuius Longitudo pro exacte co-
gnita haberi poteſt, ipſae obſervationes contactus in-
terni admodum ſint dubiae; verum tamen quum ob-
ſervationes pro contactu interno Wardhuſiis, Oren-
burgi et in Gurjeſ inſtitutae, ſatis bene inter ſe con-
ſentiant et dubium circa differentias meridianorum in-
ter haec loca vix quinque ſecunda exſuperare poſſit;
etiam probabiliter ſtatuerè fas eſt, obſervationes quae
a medio inter prius nominatas ſumto multum diſcre-
pant pro ſuſpectis merito eſſe habendas, et ſimile
omnino iudicium ferre licet de momentis pro con-
tactu externo, ſi eorum comparatione facta, cum
obſervationibus huius contactus in Wardhuſ, Gurjeſ
et Orenburg inſtitutis, ab his multum reperiuntur
diſcrepantes.

7. Antequam concluſiones quas pro Parallaxi
Solis ex tranſitu Veneris deduxi expoſiturus ſum,
neceſſum omnino eſt, vt Methodum quam hoc in
negotio mihi ſequendam propoſui, vberius explicem.
Inter varias autem Methodos, quibus ex obſervatione
tranſitus Veneris inueſtigationem Parallaxeos Solis
ſuſcipere licet, pro praefenti quidem caſu tutiſſima

habenda est ea, qua durationes totius transitus in variis locis observatae inter se comparantur; quippe quum haec Methodus exactam Longitudinem locorum vbi observationes factae sunt, non omnino praerequirat. Hoc igitur modo si durationes totius transitus in America observatae tam inter se, quam cum iis, quae Cajaneburgi, Wardhusis et in Kola observatae sunt, comparentur, certissimae obtineri possunt conclusiones pro valore Parallaxeos. Praeter hanc autem Methodum etiam alia cum visu adhiberi potest, in eo consistens, quod duratio inter contactum internum pro ingressu alicubi in Europa observatum similemque contactum pro egressu in alio quodam loco cognito siue Europae seu Asiae visum, comparatur cum observationibus totius transitus in America factis. Quamvis enim conclusiones hinc deductae pro aequae certis haberi non debent, ac illae quae ex durationibus in iisdem locis observatis deducuntur, quum praeter errores observationum, nunc quoque aberrationes circa differentias meridianorum negotium turbare queant; quum tamen pro huiusmodi comparisonibus a me institutis, loca vbi contactus internus in egressu fuit observatus, satis exacte sint determinata, cum praecisione saltem quinque aut decem secundorum, de Longitudine autem locorum vbi contactus internus in ingressu fuit observatus, Parisiorum scilicet, Grenouici, Stockholmiae et Vpsaliae nullum sit dubium et praeterea observationes in his locis factae egregie inter se consentiant; certo persuasus

sumus sum valores Parallaxeos ex his quoque comparationibus elicitos non multum a veritate recedere posse. Quicquid tamen sit, eos tantum ad conclusiones prioris generis confirmandas et stabiliendas adducere volui. Caeterum in genere quidem hanc mihi praescripti legem, ut observationes tantum contactuum internorum, quoad fieri liceret in usum vocarem, verum quum Caianeburgi contactus internus pro egressu observari non potuit et aequum mihi visum non sit, observationem Caianeburgensem e numero comparationum penitus excludere; pro hoc loco durationem inter contactum internum pro ingressu et externum pro egressu cum durationibus inter contactus internos in America observatos comparavi, tum vero quia observationi in Wardhus factae, ubi pro egressu uterque contactus observatus fuit, simile ius denegandum non esse videbatur, etiam similem comparationem pro Wardhus instituendam esse iudicaui. Vbi reticere tamen non possum valores Parallaxeos ex hoc genere comparationum deductos haud aequae certos videri, ac qui prodeunt, dum durationes inter contactus internos inter se conferuntur, siquidem illi valores propter levissimas correctiones Diametri Veneris haud exiguum subire possunt mutationem, quod infra quidem evidentius ob oculos ponemus.

8. Ut omnes calculos ad summam praecisionem exigere liceret, elementa Astronomica saltem quam proxime vera adhibere necesse erat, ne propter erro-

errores in his Elementis commissos, effectus parallacticos a veritate multum aberrantes inuenirem. Sequentia igitur Elementa Astronomica in vsum calculi a me fuerunt praesupposita:

I. Tempus verum Parisinum pro coniunctione Solis et Veneris Die 3 Junii $10^b. 14'. 0''$.

II. Latit. Veneris Geocentrica hoc tempore $10'. 16''. 7$.
hincque distantia minima centrorum $10'. 10''$.

III. Diameter Solis $31'. 31''$ et

IV. Diameter Veneris $57''. 2$.

Quum autem negare non velim, haec elementa aliquam admittere posse correctionem, obseruandum tantum mihi est, quod *primum* eorum attinet, illud adeo exacte esse determinatum, ac pro effectibus Parallacticis cum summo rigore determinandis requiritur; reliqua autem Elementa quod concernit, latitudinem scilicet Veneris et Diametros Solis et Veneris, calculos ita instruendos esse ratus sum, vt etiam ratio haberetur correctionum, quas haec Elementa adhuc admittere possent.

9. Ad inueniendum effectum Parallaxeos in tempore seu quantitate, qua introitus vel egressus Veneris aut acceleratur, aut retardatur, necessum est vt prius cognoscatur effectus Parallacticus secundum circu-

circulum maximum $\approx V$. Notum autem est hunc effectum sequenti exprimi esse consuetum formula

$$\frac{\left(\frac{a}{b} - 1\right) \pi \sin. z V}{1 - \left(\frac{a}{b} - 1\right) \pi \cos. z V}$$

Fig. 2.

designante $a:b$ rationem inter parallaxes horizontales Veneris et Solis, littera autem π ipsam Parallaxin Solis denotante, in qua quidem formula denominatorem ob paruitatem suam tuto negligere licet. Verum haec formula pro vera Telluris figura sphaeroidica valores exhibere potest effectuum Parallaeticorum a veritate haud parum discrepantes; si igitur pro loco ubi observatio aliqua instituta est, recta ad centrum telluris ducta supponatur esse ad radium aequatoris ut $\varepsilon : 1$ et parallaxis Solis aequatorea exprimatür littera π , exactior formula qua effectus Parallaeticus $V D$ exhibetur, iam ita erit expressa

$$V D = \frac{\left(\frac{a}{b} - 1\right) \varepsilon \pi \sin. z V}{1 - \left(\frac{a}{b} - 1\right) \varepsilon \pi \cos. z V}$$

in qua denominatorem si placet ut admodum exiguum negligere licebit. Nullus quidem dubito quin plurimi sint, qui exactitudinem quam heic secutus sum pro superflua et imaginaria habebunt, immo ipse primum in eadem sui sententia; postquam autem intellexi, valores pro effectibus parallaeticis observationum in Lapponia factarum, propter correctionem iam allatam, duobus secundis in tempore immutari, eandem non prorsus negligendam esse censui, imprimis

quando de Parallaxi Solis cum praecisione $\frac{1}{33}$ sec. determinanda quaestio est. Porro fatendum tamen est valorem iam allatum ipsius VD non omnimode esse exactum, quum pro summa praecisione obtinenda, effectus parallaxici VA et $DA=CO$ seorsim secundum huiusmodi formulas essent computandi, deinde autem in triangulo DVA ex datis VA et DA cum angulo DAV , valor lineae VD exquirendus, at quum correctiones hinc oriundae effectus parallaxicos in tempore vix semisse secundi immutare valeant, easdem quidem semper tuto negligere licet. Quomodo autem distantia Veneris a puncto z seu arcus zV computari debeat, hoc loco explicare minus est necesse; siquidem is calculus secundum varias Methodos institui potest, inter quas tamen ea, quam tradit Illustr. Eulerus in Part. II. Tom. XIV. Novorum Comment. omnino quam maxime expedita mihi videtur.

10. Supra quidem iam exposui, quaenam cautelae observari debeant, circa verum valorem anguli DVC definiendum, nunc igitur reliquum est, ut ostendam, quomodo dato effectui Parallaxeos VD et angulo DVC inueniri debeat effectus parallaxicus secundum directionem VC , seu quod idem est CV —
 Fig. 3. Centro igitur C radio CD descriptus intelligatur arcus circuli, qui ipsi VC in B occurrat et iungatur DB , tum vero in valore pro effectui parallaxeos $VD = (\frac{a}{b} - 1) \varepsilon \pi \sin. zV$ pro π valor eius approximatus substituatur, ut habeatur ipsius VD valor

lor absolutus saltem proxime verus, hinc autem quæ-
ratur angulus VCD per sequentem analogiam:

$$DC:VD::\text{Sin.} DVC:\text{Sin.} DCV.$$

Cognito nunc angulo DCV dabitur

$$DBC = 90^\circ - \frac{1}{2} DCV,$$

ideoque et

$$VDB = DBC - DVC \text{ vel } = DVC - DBC,$$

ex quo obtinetur

$$VB = VC - DC = \frac{VD \cdot \text{fin.} VDB}{\text{fin.} DBV}$$

unde si ponatur

$$VD = \beta \pi, \text{ erit } VB = \frac{\beta \pi \cdot \text{fin.} VDB}{\text{fin.} DBV}.$$

Heic quidem primum obseruare licet, nequaquam ne-
cessarium esse, vt valor lineæ VB in numeris abso-
lutis exhibeatur, assumpto scilicet certo valore Paral-
laxeos tamquam cognito; expressio enim generalis iam
tradita satis exacta est, etiamsi π non eundem pror-
sus haberet valorem, ac qui pro inuestigando angulo
VCD in valore lineæ VD substituitur. Deinde
patet superfluam omnino esse exactitudinem, qua præ-
scribitur vt angulus VCD inuestigetur cum præci-
sione decimæ partis secundi, quamuis enim valor li-
neæ VB cum præcisione $\frac{1}{1000}$ computari debeat, ve-
hementer tamen falleretur, qui existimaret ad hanc exa-
ctitudinem obtinendam id requiri, vt angulus VCD vs-
que ad decimam secundi partem sit cognitus, cum potius
verus valor lineæ VB imprimis pendeat ab exactitu-
dine



dine valoris lineae VD et anguli $VD B$, cuius anguli certitudo potissimum dependet ab angulo DVC , immo ineptum videtur angulum VCD cum tanto rigore definire, quando in valore anguli CVD determinando errores committuntur aliquot graduum. Quod autem haec nequaquam gratis dicta sint, unusquisque ipse facile experiri potest, si enim valorem anguli VCD inuentum aliquot secundis auxerit vel minuerit, tamen valorem pro VB inde vix ullam subire mutationem inueniet.

II. Caeterum et sequenti modo inuestigatio
Fig. 3. quantitatis lineae VB suscipi poterit: ex puncto D in VC demittatur perpendicularis DE et quum iam sit $VB = VE \mp BE$, tum vero habeatur

$$VE = VD \cdot \text{Cof. } DVC \text{ et}$$

$$BE = \frac{DE^2}{DC + EC} = \frac{VD^2 \cdot \sin. DVC^2}{2 DC}$$

quam proxime, erit omnino

$$VB = VD (\text{Cof. } DVC \mp \frac{VD \cdot \sin. DVC^2}{2 DC}),$$

si igitur ponatur $VD = \beta \pi$, fiet

$$VB = \beta \pi (\text{Cof. } DVC \mp \beta \pi \cdot \frac{\sin. DVC^2}{2 DC})$$

in posteriori igitur membro vncinulis incluso, si pro π valor proxime verus sufficiatur, iam innotescet valor ipsius VB . In Tomo XIV. Novor Comment. valor ipsius VB ipsi $\beta \pi \cdot \text{Cof. } DVC$ tantum positus est aequalis, at plurimis omnino in casibus posteriorius



sterius membrum ex linea B E oriundum non sine metu sensibilis erroris negligi potest, imprimis vbi angulus D V C non multum differt a recto; satendum igitur est effectus Parallacticos in Tom. XIV. et XVI. Nov. Comment. allatos, leuiiores quasdam admittere correctiones.

12. Postquam igitur hoc modo valor lineae V B inuentus fuerit, nunc effectus parallaxeos secundum orbitam Veneris inuestigari potest, si enim centro C radio C B describatur arcus circuli, qui orbitae Veneris in puncto X occurrat et iungatur B X, tum vero ex C in orbitam ducta concipiatur perpendicularis C M, quae erit aequalis distantiae minimae centrorum Solis et Veneris, liquet effectum parallaxeos secundum orbitam fore $\simeq V X$, quem sequenti ratione indagare licet. In valore lineae V B pro π substituatur valor ad veritatem proxime accedens, unde habebitur $V C \simeq C B \pm V B$, tum vero ex datis V C, B C et C M anguli C X M, C V M innotescunt, quorum differentia est V C X; hinc autem prodit $C X B = 90^\circ - \frac{1}{2} X C B$. In triangulo igitur V B X valor ipsius V X sequenti formula exprimitur $V X = V B \frac{\sin. V B X}{\sin. V X B}$, ideoque si V B ponatur $\simeq \delta \pi$ habebitur $V X \simeq \delta \pi \frac{\sin. V B X}{\sin. V X B}$, quin etiam ex valore ipsius V D statim deducitur

Fig. 4.

$$V X = \beta \pi \frac{\sin. V D B. \sin. V B X}{\sin. D B V. \sin. V X B}.$$

Fig. 3. et 4.

Inuento autem valore spatii V X, quantitas temporis
C 3 ipsi

ipsi percurrento a Venere impensi, ob datum motum horarium Veneris in orbita facile eruitur, atque si hoc tempus addatur vel subtrahatur a tempore, quod Venus adhibet ad percurrentem chordam XM , habebitur tempus per spatium VM .

13. Facile quidem intelligitur hanc expressionem pro spatio VM seu pro tempore ad idem percurrentum necessario, pro satis exacta haberi non posse, nisi valores linearum CB et CM bene fuerint definiti; reliquum itaque est, ut dispiciamus quam mutationem subeat linea VM , si ipsis CB et CM leuiiores quaedam tribuantur correctiones. Primum autem supponamus CV inuariatam manere at CM augeri particula Cp , statuamus igitur centro V radio VC arcum circuli describi, cui occurrat recta per p ipsi VM parallela in S , tum vero ductam esse Sm parallelam ipsi CM et perspicuum quidem est ob augmentum Cp lineam VM diminui particula $Mm = Sp$, patet autem esse

$$Sp : Cp :: \text{Tang. } SCp : 1 :: \text{Tang. } CVM : 1.$$

Maneat nunc porro CM inuariata at distantia CV incrementum accipere concipiatur $= qS'$, ita ut vera distantia centrorum sit $= VS' = VC + qS'$, tum vero ductae intelligantur CS' et $S'm$ quarum haec parallela est ipsi CM , eritque in triangulo CqS'

$$CS' : qS' :: 1 : \text{Cof. } CS'q = 1 : \text{Cof. } CVM,$$

ideoque

$$Mm = CS' = qS' \text{ Sec. } CVM.$$

Defi-

Designemus nunc correctionem distantiae minimae CM littera γ , correctiones autem lineae CB pro contactibus quidem externis littera μ et pro internis littera ν , et ponatur valor lineae VX = $\gamma \pi$, valor autem lineae XM ex assumtis CB et CM deductus = L, erit omnino verus valor pro linea VM

= $L \pm \gamma \pi - \gamma \text{Tang. CVM} + \mu. \text{Sec. CVM}$
pro contactibus externis, pro internis autem
 $VM = L \pm \gamma \pi - \gamma. \text{Tang. CVM} + \nu \text{Sec. CVM}$.
Notari autem conuenit pro contactibus externis CB aequari summae semidiametrorum Solis et Veneris et pro internis earum differentiae, tum vero litteram L et angulum CVM diuersos quoque adipisci valores prout siue de contactibus externis seu de internis quaestio est. Si nunc m ponatur esse numerus, in quem valor spatii multiplicari debet, vt prodeat tempus quod Venus ipsi percurrendo impendit; valor correctus pro tempore per lineam VM prodibit

$$= mL \pm m \gamma \pi - m \gamma. \text{Tang. CVM} + m \nu. \text{Sec. CVM}.$$

$$+ m \mu. \text{Sec. CVM}.$$

14. Si igitur in eodem loco contactus inter-
nus tam pro ingressu quam egressu sit obseruatus,
quibus obseruationibus respondeant loca Veneris vera Fig. 3.
in orbita V et v, liquet hinc pro temporibus per
VM et vM has inueniri expressiones:

$$\text{Tempus per VM} = mL + m \gamma \pi - m \gamma \text{Tang. CVM}$$

$$+ m \nu \text{Sec. CVM}$$

$$\text{Tempus per vM} = mL + m \gamma' \pi - m \gamma \text{Tang. CvM}$$

$$+ m \nu \text{Sec. CvM}$$

vnde

vnde iam tota duratio transitus huiusmodi formula exhiberi potest:

$$\text{Duratio transitus} = 2 m L + \eta \pi - \zeta y + \theta v,$$

vbi η , ζ et θ sunt coefficientes cogniti et determinati, haec autem duratio aequalis poni debet ipsi durationi obseruatae quam dicamus D . Si nunc pro alio quodam loco similis duratio transitus D' fuerit obseruata eius similem quoque expressionem inuenire licet, ita vt sit

$$D' = 2 m L + \eta' \pi - \zeta' y + \theta' v,$$

subtracta autem hac aequatione a superiori obtinebitur

$$D - D' = (\eta - \eta') \pi - (\zeta - \zeta') y + (\theta - \theta') v,$$

ex quo fit

$$\pi = \frac{D - D'}{\eta - \eta'} + \frac{\zeta - \zeta'}{\eta - \eta'} y - \frac{\theta - \theta'}{\eta - \eta'} v.$$

15. Quum correctiones y et v sint quam minimae, pro casu quo durationes inter contactus inter nos pluribus in locis obseruatae inter se comparantur, valor Parallaxeos ob has correctiones vix vltra centesimam partem minuti secundi immutari poterit; eo tamen minus superfluum iudicari debet, quod harum correctionum heic habuerimus respectum, quia sic quidem certissime redditi sumus conuicti, ex leui quadam mutatione valorum pro Latitudine Veneris Geocentrica atque Diametrorum Solis et Veneris, parallaxin nullam sensibilem pati mutationem. Dum vero comparatio instituitur durationis inter contactum in-

internum pro ingressu et externum pro egressu alicubi observatae, cum valore durationis inter contactus internos pro alio loco, inuento, hae correctiones omnino haud contemnendam producere poterunt variationem in valore Parallaxeos, quod infra dum huiusmodi comparisonum attulerimus exempla evidentius patebit. Praeterea hoc loco reticendum non esse videtur, primo intuitu ineptam omnino videri posse nostram operandi rationem, qua in valorem Parallaxeos praeter numerum absolutum binas adhuc incognitas y et v introduximus, quum necessitas non urgeat, nisi unam earum in hunc valorem ingredi. Scilicet quia binas has obtinuimus aequationes:

$D = 2mL + \eta\pi - \zeta y + \theta v$; $D' = 2mL + \eta'\pi - \zeta'y + \theta'v$
 videri potest ex unaquaque earum valorem correctionis v quaeri posse, quibus valoribus inter se aequatis obtineretur expressio pro Parallaxi, quam praeter numerum absolutum, non nisi correctio y ingreditur. Ratio autem cur hanc procedendi viam hac occasione eligere non placuit, in eo imprimis sita est, quod valorem quantitatis $2mL$ etsi ex ipsis CB et CM facile deducendum, in calculum introducere plane non voluerimus, quum fieri possit, ut duratio ista Geocentrica ex calculo deducta cum observata non conveniat, imprimis si ut quidam opinantur atmosphaera Veneris aliquem habuerit effectum ad durationem transitus imminuendam. Praeterea autem ex infra monendis patebit, pro comparisonibus durationum inter contactus internos, correctiones ex y et v

D emer-

emergentes constantem inter se tenere rationem eamque ita comparatam, ut earum effectus proxime se inuicem destruant.

16. Haec igitur est Methodus ad cuius praescriptum calculum Parallaxeos instituere in animum induxi, ut quantum fieri posset conclusiones inuenirem certas et exactas. Inutile autem duco de praerogatiuis quas haec Methodus praestare aliis sibi vindicare potest, hoc loco multa commemorare; siquidem omnino persuasus sum effectus parallacticos pro locis ubi totus transitus observatus fuit, adeo exacte a me esse determinatos, ut in iis error semissis secundi certe non reperiatur, quod an de effectibus Parallacticis ab aliis Auctoribus inuentis affirmari possit, vehementer dubito. Quum tamen suspicandi locus sit, id Methodo nostrae vitio verti posse, quod Analyticos quandam speciem referat, ideoque ut nonnulli autumant incertitudini et obscuritati sit obnoxia, necessum omnino est, ut de hoc crimine mentem breuiter exponam. *Primum* igitur fateor me valde dubitare, an demonstrari queat Methodum quandam, eam praecipuis ob causam quod Analytica sit, incertitudini reddi obnoxiam, quum hactenus omnes Mathematicorum periti, in ea videntur fuisse opinione Analysis summum esse remedium, quo problemata etiam Astronomica expedite resolui possunt. Porro notandum est in Methodo nostra vitium istud Analyticos adhibitae in eo consistere, *primum* quod effectus

Aus parallaxici generaliter a nobis sint determinati,
 pro quocunque demum valore Parallaxeos, cum ta-
 men in Methodis vulgo adhibitis, vñ receptum sit, vt
 hi effectus pro determinato quodam valore Parallaxeos
 computentur, et *secundo* quod correctionum istarum
 y et v respectum habere non negleximus. Quod po-
 sterius quidem attinet, de eo plura monere heic opus
 non est, quum in §. praecedenti iam sufficiens a
 nobis allata sit ratio, cur has correctiones plane
 omittere non voluerimus. De priori igitur defectu
 tenendum est, tantum abesse, vt pro vitio quodam
 habendum sit, quod generales expressiones effectuum
 Parallaxicorum adhibuerimus, vt potius Methodus
 nostra eo ipso facilior, saltem magis directa euadat,
 quam si secundum tritam et vulgo receptam ratio-
 nem, in veram quantitatem Parallaxeos per regulam
 falsae positionis inquiratur. Id autem facili exemplo
 heic illustrare haud pigebit. Ponamus quantitatem
 Parallaxeos inuestigandam esse ex comparatione dura-
 tionum inter contactus internos pro Arce Principis
 Walliae et Insula Regis Georgii, breuitatis autem
 gratia considerationem correctionum y et v heic sepo-
 namus; quum igitur sit pro priori loco effectus pa-
 rallacticus ad durationem Geocentricam augendam
 $24, 87. \pi$ et pro posteriori ad eam diminuendam
 $83, 79 \pi$, liquet differentiam inter durationes obser-
 vatas $920''$ esse debere $= 108, 66. \pi$, ex quo fit
 $\pi = \frac{920}{108, 66} = 8'', 47$. Iam penes vnumquemque iudi-
 cium esto, an non haec operandi ratio multo facilior

D 2
fit

sit communiter recepta, qua primum per effectus parallacticos ex certa hypothefi Parallaxeos computatos, durationes Geocentricae ex binis obseruationibus deduci debent, quae si inuicem discrepent, ex hac differentia per regulam trium inuestigandum est, quomodo Parallaxis immutari debuisset, vt iidem prodirent valores pro duratione Geocentrica. Mihi quidem ita persuasum est, eos Auctores haud immerito taxari, qui in re facillima et satis obuia operationem indirectam eligere praecoptant, vbi faciliior et magis directa negotium absoluendi suppetit ratio.

17. Quum Methodus a me adhibita postulet, vt duratio transitus inter contactum internum Venere pro ingressu et contactum siue internum seu externum pro egressu alicubi obseruata, aequalis ponatur valori eiusdem durationis per calculum inuento; primum quidem heic ob oculos ponere licebit valores, quos calculi nostri praebuerunt, pro temporibus a Venere adhibitis ad percurrenda spatia VM , vM , indeque deductis durationibus transitus, vbi autem monendum est, breuitatis gratia quantitatem semidurationis Geocentricae inter contactus internos littera T a nobis indigitari, similiterque valorem semidurationis Geocentricae inter contactus externos littera T' designari:

Fig. 4.

Pro Arce Principis Walliae ad Sinum Hudsonis.

$$\begin{aligned} \text{Temp. per VM} &= T + 29,47. \pi - 13,04. y + 19,87. v \\ \text{per } \varphi M &= T - 4,60. \pi - 13,41. y + 20,12. v \quad \text{Duratio observata.} \\ \text{Durat.} &= 2T + 24,87. \pi - 26,45. y + 39,99. v = 5^b.45'.24''.5. \end{aligned}$$

Pro Sto. Josepho Californiae.

$$\begin{aligned} \text{Temp. per VM} &= T + 2,01. \pi - 13,34. y + 20,06. v \\ \text{per } \varphi M &= T - 33,88. \pi - 13,75. y + 20,34. v \\ \text{Durat.} &= 2T - 31,87. \pi - 27,09. y + 40,40. v = 5^b.37'.21''. \end{aligned}$$

Pro insula Regis Georgii alias Ohatitee dicta.

$$\begin{aligned} \text{Temp. per VM} &= T - 39,33. \pi - 13,80. y + 20,38. v \\ \text{per } \varphi M &= T - 44,46. \pi - 13,86. y + 20,42. v \\ \text{Durat.} &= 2T - 83,79. \pi - 27,66. y + 40,80. v = 5^b.30'.3'',5. \end{aligned}$$

Pro Wardhus in Finmarkia.

$$\begin{aligned} \text{Temp. per VM} &= T + 45,75. \pi - 12,87. y + 19,76. v \\ \text{per } \varphi M &= T + 32,02. \pi - 13,00. y + 19,82. v \\ \varphi M &= T + 29,47. \pi - 11,92. y + 19,15. \mu \\ \text{Durat.} &= 2T + 77,77. \pi - 25,87. y + 39,58. v = 5^b.53'.14''. \\ &= T + T' + 75,22. \pi - 24,79. y + 19,15. \mu + 19,76. v = 6^b.11'.33''. \end{aligned}$$

Pro Cajaneburg in Finlandia.

$$\begin{aligned} \text{Temp. per VM} &= T + 47,41. \pi - 12,84. y + 19,75. v \\ \text{per } \varphi M &= T + 32,34. \pi - 11,90. y + 19,14. \mu \\ \text{Durat.} &= T + T' + 79,75. \pi - 24,74. y + 19,14. \mu + 19,75. v = 6^b.11'.42''. \end{aligned}$$

Pro Kola in Lapponia Russica.

$$\begin{aligned} \text{Temp. per VM} &= T + 45,98. \pi - 12,87. y + 19,76. v \\ \text{per } \varphi M &= T + 33,08. \pi - 13,01. y + 19,83. v \\ \text{Durat.} &= 2T + 79,06. \pi - 25,88. y + 39,59. v = 5^b.53'.17''. \end{aligned}$$

D 3

Quod

Quod autem valores durationum obseruatos attinet, notandum est pro locis Americanis tales a me heic adhibitos fuisse, qui prodeunt, dum ex obseruationibus in vnoquoque loco institutis media sumuntur, pro Wardhus autem eam durationis quantitatem adhibui, quae ex momentis a *Rev. Pat. Hell* assignatis deducitur, praeprimis quum Cel. huic viro nullam praebere velim ansam querendi, quod eius obseruationem ex vsu determinandae parallaxeos secludam. Porro notari quoque meretur moram Geocentricam inter contactum Veneris internum et externum a me adhibitam fuisse $18^{\circ} 43''$, qualis nimirum ex valoribus diametrorum Solis et Veneris atque distantiae minimae centrörum a me assumtis prodit.

18. Quodsi nunc aequationes supra allatae, modo quem in §. 14. descripsimus inter se combinentur, valores pro Parallaxi Solis inuenientur tales, quales sequens Tabula refert:

Valores parallaxeos ex- comparatione obseruationum.

Pro	$\pi =$	Max	Min.	Cum	
Infula Reg	$8,40 - 0,011 y + 0,007 v$	8,65	8,31	Arc. Princ. Walliae.	2
Georgii.	$8,43 - - - - -$	8,81	8,09	St Joseph. in Calif.	1
	$8,61 - - - - -$	8,80	8,38	Wardhus	3
	$8,59 - 0,018 y - 0,123(\mu - v) + 0,006(\mu + v)$	8,72	8,31	Wardhus	3
	$8,41 - 0,018 y - - - - -$	8,51	8,33	Cajaneburg	3
	$8,55 - 0,011 y + 0,007 v$	8,65	8,47	Kola	3
St. Josepho	$8,52 - 0,011 y + 0,007 v$	8,66	8,39	Arc. Princ. Walliae	1
Californiae	$8,69 - - - - -$	8,86	8,46	Wardhus	2
	$8,67 - 0,021 y - 0,178(\mu - v) + 0,007(\mu + v)$	8,74	8,38	Wardhus	2
	$8,40 - 0,021 y - - - - -$	8,44	8,37	Cajaneburg	2
	$8,62 - 0,011 y + 0,007 v$	8,66	8,58	Kola	2
Arc. Princ.	$8,88 - 0,011 y + 0,007 v$	9,22	8,39	Wardhus	1
Walliae.	$8,85 - 0,025 y - 0,357(\mu - v) + 0,010(\mu + v)$	9,00	8,23	Wardhus	1
	$8,28 - 0,025 y - - - - -$	8,35	8,22	Cajaneburg	1
	$8,72 - 0,011 y + 0,007 v$	8,78	8,66	Kola	1

Ante-

Antequam vero ex his inuentis medium quendam valorem Parallaxeos quaeramus, e re est vt in genere obseruemus, tutissimas determinationes et minime ex correctionibus elementorum dependentes eas merito habendas esse, quae ex durationibus inter contactus internos eliciuntur, siquidem valores coefficientium pro y et v adeo parui sint, vt certum sit ex iis in valorem Parallaxeos sensibilem non induci mutationem. Si enim nostras determinationes quis accommodare voluerit ad valores distantiae minimae et diametrorum a Celeb. *de la Lande* inuentos, ponere debet $y = -2''$, 3 et $v = -1''$, 8, ex quo valores pro Parallaxi centesima tantum parte secundi augentur. Contra vero minus tutae habendae sunt conclusiones, quae obtinentur conferendo durationes inter contactus internos pro locis Americanis, cum iis, quas inter contactum internum pro ingressu et externum pro egressu Wardhusiis et Caianeburgi obseruatas esse constat, quum leuis correctio diametri Veneris haec insignem producere valeat mutationem. Si enim supponamus Diametrum Veneris tantum quinta parte secundi augeri, valor Parallaxeos deductus ex comparatione obseruationis ad Sinum Hudsonis institutae, cum supra dictis Wardhusiis et Caianeburgi factis, iam $\frac{1}{100}$ partibus minuti secundi immutabitur (b). Quamuis autem

(b) Liqueat hinc iniquam omnino esse censuram, qua Ren. Pat. *Hell.* in Opere de Parallaxi Solis p. 103. perstringit Cel.

autem satis probabile videatur valorem Diametri Veneris a nobis adhibitum admodum esse exactum, tamen adfirmare non aſſim aberrationem $\frac{1}{2}$ ſecundi pro hoc valore admitteri non poſſe, praeprimis quum hoc in negotio maior ſit obſervationum diſſenſus, quam vt cum ſumma exactitudine et praeciſione hic valor determinari poſſit. Quicquid tamen de hac incertitudine ſit, correctionem $(\mu - \nu)$ pro euaneſcente habeo, ideoque in ſequentibus dum valor medius Parallaxeos inueſtigandus eſt, omnes correctiones ſupra allatas plane negligam. Porro notari quoque meretur, me eam imprimis ob rationem ſupra mentionem feciſſe valorum pro parallaxi maximorum et minimorum, qui ex obſervationibus durationum prodeunt, habita ratione momentorum a ſingulis obſervatoribus allatorum, quod inde maxime tutum videtur formari poſſe

de la Lande aſſertum, quod obſervatio Caieneburgenſis minus conſentiat cum valore Parallaxeos ex reliquis obſervationibus deducto, ſi augetur Diameter Veneris; neque hoc aſſertum villo modo, pro aenigmate Oedipo dignum haberi meretur. Immo Reu. Pat. Hell mentem verborum Cel. de la Lande intellexiſſe non videtur, dum eam D. de la Lande imputat ſententiam, quod ſtatuat augmentum diametri Veneris pro obſervatione Caieneburgenſi inferuire valori Parallaxeos augendo; certum enim eſt hoc augmentum contrarium proriſus habere effectum, ita vt ſi diameter Veneris $\frac{1}{2}$ ſecundi augenda ſit, comparatio obſervationis Caieneburgenſis cum illa ad Sinum Hudſonis facta, pro Parallaxi non praebeat niſi g'' 10. Conf. Cel. de la Lande Connoiſſance des temps A. 1773. p. 248.

posse iudicium de limitibus inter quos valorem Parallaxeos cadere verisimile sit (c).

19. Dum ex valoribus pro Parallaxi supra inventis medium exquiri debet, ante omnia notandum est omnes conclusiones eiusdem pretii habendas non esse. Probabilitas enim vniuscuiusque valoris merito aestimatur ex quantitate coefficientis pro π in illa æquatione vnde hic valor deductus fuit, quas probabilitates in Tabula supra allata numeris 3, 2 et 1 expressimus. Vt autem hoc adhuc melius intelligatur, perpendendum tantum est, quod variatio vnius partis decimæ secundi in valore parallaxeos deducto ex observatione Insulæ Regis Georgii combinata cum Wardhusiensi vel Caieneburgensi, triplo maiorem præsupponat observationum errorem, quam si eadem aberratio produceretur pro valore Parallaxeos inuento ex comparatione observationum Wardhusiensi vel Caieneburgensi cum illa, quæ ad Sinum Hudsonis facta est. Hoc ergo modo omnes nostras conclusiones in tres classes partiri licebit et ex singulis

(c) Speciatim autem monendum est, me hoc loco pro Wardhus non solum observationes a Reu. Pat. *Hell* institutas, sed quas Socii Ipsius Reu. P. *Saunders* et Cl. D. *Borgewing* fecerunt, in vsum vocasse, quod reticere non debui quia alioquin Reu. Pat. *Hell* facile controuersiam mihi mouere poterit, quasi observationibus Ipsius iusto maiorem dissensum a reliquis affingere vellem.

E

lis medium sumere, tum vero denuo ex his mediis, medium valorem Parallaxeos colligere licet, respiciendo ad eorum probabilitates, quae iam proportionales erunt productis ex probabilitate singularum conclusionum in numerum earum. Quae operatio sequenti Tabella exponitur:

Prob. 3	2	1	
$\pi = 8'',61$	$8'',49$	$8'',52$	Med. I. Prob. 12 . . 6 8,54
8,59	8,69	8,43	II. 10 . . 5 8,57
8,41	8,67	8,88	III. 6 . . 3 8,61
8,55	8,40	8,85	Med. med. $\pi = 8,57$
	8,62	8,28	
		8,72	
<hr/>			
Med. = 8,54	8,57	8,61	

20. Hanc quidem conclusionem a veritate haud multum recedere oporteret, si omnes observationes pro aequae certis habere liceret, vel si iudicare fas esset easdem aequalibus fere erroribus esse obnoxias, quum vero hoc nequaquam locum habeat, fatendum omnino est, in superiori comparatione 1^a observationem in Kola institutam cum reliquis eundem certitudinis gradum sibi non vindicare, quia Cel. huius observationis Auctor de momentis a se assignatis affirmavit, eadem tantum aestimatione quadam definita esse et per nubes capta. Quamvis autem hae observationes maioribus erroribus non videantur obnoxiae, quam eae quae in Caianeburg vel Wardhus institutae sunt,

sunt, quum tamen certum sit propter earum aberrationem, errorem in valore Parallaxeos commissum, augeri, tutissimum quidem videtur has obseruationes seponere. II°. Infra ostendemus cum maxima probabilitate vtrique obseruationi tam Wardhusiensi quam Caianeburgensi aliquem adscribendum esse errorem, quum ergo obseruatio Wardhusiensis duplici modo ingreditur inuestigationem pro valore Parallaxeos supra institutam, liquet hunc errorem duplicem quoque obtinere effectum pro valore Parallaxeos augendo, praepimis quia error huius obseruationis in contactu interno pro ingressu resideat. His igitur de causis satis esse possumus persuasi valorem medium Parallaxeos iam inuentum aliquantum imminuendum esse. Seposita autem primum obseruatione Kolae instituta, sequentes pro Parallaxi deducuntur conclusiones:

Prob. 3	2	1	
$\pi = 8'', 61$	$8'', 49$	$8'', 52$	Med. I. Prob. 9 .. 8,52
8, 59	8, 60	8, 43	II. 8 .. 8,56
8, 41	8, 67	8, 88	III. 5 .. 8,59
	8, 40	8, 85	
		8, 28	Med. med. 8,55
<hr/>			
Med. = 8, 52	8, 56	8, 59	

Porro si ad aberrationem adhuc imminuendam ex singulis binis conclusionibus pro Wardhus medium in calculum introducatur, sequenti modo parallaxeos valor medius inuenietur:

E 2

Prob.

Prob. 3.	2	1	
$\pi = 8'', 60$	$8'', 49$	$8'', 52$	Med. I. Prob. 6 . . 3
	$8, 41$	$8, 68$	II. 6 . . 3
	$8, 40$	$8, 86$	III. 4 . . 2
		$8, 28$	
			Med. $\pi = 8, 51$
Med. =	$8, 50$	$8, 52$	

Hinc igitur pro *Parallaxi Solis horizontali aequatorea tempore transitu* adhibere licebit $\pi = 8'', 51$ vel etiam numero rotundo $8'', 50$, vbi tamen ingenue fateor me de hoc valore Parallaxeos adeo persuasum non esse, vt negare vellem eum aliquot centesimis partibus minuti secundi augeri vel minui posse, neque multum repugnabo, si quis hanc parallaxin statuere velit $8'', 53$ vel $8'', 48$ quorum valorum posterior ex solis obseruationibus Americanis deducitur. Grauiissimae tamen esse videntur rationes quae suadent, parallaxin nec infra $8'', 45$ deprimendam esse, nec ultra $8, 55$ sec. augeri debere, quas ex sequentibus melius perspicere licebit.

21. Quum videri posset me in fauorem obseruationis Caianeburgensis pretium obseruationis Wardhusiensis diminuisse, nunc quidem a me ea remouenda est suspicio, quod crederem obseruationis Wardhusiensis errorem duplo maiorem esse errore obseruationis Caianeburgensis, si enim errores pro his obseruationibus tantum statuuntur aequales, tamen effectus prioris ad parallaxin plus iusto augendam duplo maior

ior erit, quam posterioris ad eam diminuendam, haec ergo praecipua fuit ratio cur ad aequalitatem quandam obtinendam, medium ex conclusionibus pro Wardhus inuentis in vsum vocare placuit. Hoc vero eo rutilius facere licuit, quod conclusiones ex obseruationibus Americanis deductae quasi pro norma haberi queant, ad quam reliquarum probabilitatem exigere conuenit. Quamuis enim non negauerim obseruationibus Americanis aliquantillos errores inesse quoque possent; eos tamen ultra 5" pro durationis quantitate obseruata increfcere posse, vix probabile videtur. Verum tamen Cel. D. de la Lande assentiri non possum, dum contendit obseruationem Caianeburgensem praee Wardhusiensis nouies maiorem sibi vindicare probabilitatem, quum ex supra allatis pateat, discrepantiam conclusionum ex obseruatione Wardhusiensis inuentarum non esse nisi duplo maiorem ea, quae pro obseruatione Caianeburgensi se prodit et si leuiiores quasdam aberrationes in obseruationibus Americanis admittere velimus, dissensus isti ad multo maiorem aequalitatem perducere poterunt. Si enim supponere vellemus durationem pro Arce Principis Walliae 5" esse augendam, haec obseruatio cum Wardhusiensis comparata praerberet $\pi = 8'', 78$, cum ex eius combinatione cum Caianeburgensi sequeretur $\pi = 8'', 18$. Simul vero et hinc perspicuum euadit obseruationem Wardhusiensem ob omni suspitione erroris nequaquam liberari posse, vt enim ex eius comparatione cum obseruatione pro Arce Principis Walliae prodire posset



valor parallaxeos $8''$, 6 , duratio transitus in posteriori loco obseruata 15 secundis esset augenda, quod quidem nulla probabilitate gaudet.

22. Sequitur itaque ut ad praescriptum regularum §. 6. allatarum, probabilitatem singularum obseruationum a nobis supra adhibitarum sub examen reuocemus. Quod igitur *primum* attinet obseruationes in Arce Principis Walliae et St. Iosephi in California institutas, tenendum est primum et secundum veritatis characterem iis satis bene conuenire. Scilicet quum pro priori loco momenta a binis obseruatoribus pro contactibus internis assignata, pro posteriori autem obseruationes a tribus obseruatoribus factae, tam parum inter se discrepent, ut maximus dissensus circa durationem transitus ex obseruationibus deductam, septem minuta secunda non excedat; credere omnino fas est, has obseruationes esse admodum exactas. Porro pro Fortalitio Principis Walliae etiam secundo criterio veritatis saltem quod obseruationem Cel. D. *Dysmont* pro egressu attinet, egregie satisficit. Pro St. Iosepho in California licet momenta pro contactu externo in egressu a diuersis obseruatoribus assignata non parum differant, tamen momentum a Cel. D. *Chappe* allatum, pro assumpto valore Diametri Veneris, a veritate non multum aberrare deprehenditur. Quicquid autem de contactu externo sit, si ad primum veritatis characterem pro contactibus internis attendamus, satendum omnino est, nullam nobis obori

riri posse suspensionem, quod vllum horum momentorum plusquam quinque secundis esse possit erroneum. Quum igitur supra inuenerimus valorem Parallaxeos ex comparatione harum obseruationum deductum, maximum esse $8''{,}66$, minimum vero $8''{,}39$, iam omnino satis tuto statuere possumus valorem Parallaxeos intra hos limites contineri, ex quo colligere licet, quid de valore Parallaxeos a Cel. *de la Lande* inuento tenendum sit, quippe qui nequidem his limitibus continetur.

De obseruatione transitus in Insula Regis Georgii facta, fateri omnino cogimur criteria veritatis in eam aeque bene non quadrare, ac in bimas priores; pro contactu enim interno in ingressu dissensus inter momenta obseruata vsque ad $20''$ assurgit et pro contactu interno circa egressum, bina momenta assignata $10''$ differunt. Obseruationes autem contactus externi in egressu, adhuc magis dubiae sunt, quippe quum in iis saltem pro valore diametri Veneris a nobis assumto, ad minimum errores $30''$ deprehenduntur. Hac autem incertitudine non obstante, pro valde probabili asserere audeo, durationem transitus supra a nobis pro hoc loco adhibitam, quae ex mediis inter momenta obseruata sumtis deducitur, vix maiorem quam 5 secundorum mutationem admittere, cuius asserti rationes heic exponere haud inutile erit. Etiam si igitur negandum non sit, obseruationibus contactuum externorum in egressu pro hoc loco graues inesse

inesse errores, tamen aequitas postulare videtur, ut pro contactu interno eiusmodi adhibeatur momentum, quo assumpto hi errores aliquantum imminui possunt, unde pro contactu interno in egressu vel ipsum momentum a Cel. D. *Green* assignatum adhiberi poterit, vel etiam momento a D. *Green* obseruato duplo maiorem tribuendo probabilitatem prae obseruatione Cl. D. *Cook*, momentum medium eligi poterit, neque tamen suspicari fas est, verum contactus momentum obseruationem Cel. *Green* praecedere. Pro contactu quidem interno in ingressu, aut simpliciter medium sumendo ex momentis a tribus obseruatoribus allatis, aut obseruationi Cel. *Green* duplicem tribuendo valorem prae reliquis, verum contactus momentum saltem satis probabiliter determinari potest. Quin etiam si momentis a D. *Green* allatis tantum acquiescere vellemus, durationem transitus pro hoc loco inueniemus, quae a nobis adhibitam non nisi 4 secundis superat.

23. Progrediamur nunc ad obseruationes in Wardhus institutas et quum de momentis quae Rev. Pat. *Hell* pro egressu adhibenda esse statuit (d) nulum nobis obortum sit dubium, quin satis exacta sint; heic tantum examinare placet momentum a Rev. Pat. *Hell* pro contactu interno in ingressu obseruatum. Tamen vero pro obseruationibus huius contactus in Wardhus factis, primum veritatis criterium locum

(d) Videatur Dissert. de Parallaxi Solis p. p. 43. 10.



locum non habeat, siquidem observationes *Pat. Sain-
vics* et *D. Bergrewing* 25 secundis inter se discrepent,
tamen hunc dissensum hoc loco vrgere nolo, quum
Rev. Pat. Hell eius rationem nulli dubio obnoxiam
ex diuerso effectu Tuborum et diuerso acumine visus
obseruatorum, se reddere posse confidat. Dispicien-
dum igitur tantum est, vtrum observatio *Pat. Hell*
consentiat cum illis, quae pro contactu interno circa
ingressum institutae sunt in locis Europeicis cuius si-
rum Geographicum perfecte cognitum habemus, Gre-
nouici scilicet, Londini, Oxoniae, Parisiorum, Stock-
holmiae et Vpsaliae? Tabula igitur heic adnexa
omnes has observationes in singulis locis factas et
debito modo ad meridianum Parisinum reductas exhi-
bui, vbi quidem monendum est pro obseruatoriis
Londinensibus eas a me adhibitas fuisse Longitudines,
quas *Cel. de la Lande* in Dissertatione sua de Pa-
rallaxi Solis nuper edita nec non in suis Epheme-
ridibus Astronomicis (*Connoissance des temps*) attul-
lit, pro Oxonia autem Longitudinem a me assum-
tam fuisse $14^{\circ}. 19''$ a Parisiis Occid., tum vero pro
Stockholmia $1^{\circ}. 21'. 53''$ et pro Vpsalia $1^{\circ}. 1'. 14''$
item a Parisiis oriental., qui scilicet Longitudinum va-
lores pro his locis, ex observationibus Eclipsium Solis
Annis 1764 et 1769 factis, proxime deducuntur. Has au-
tem determinaciones saltem pro Stockholmia et Vpsalia
adeo exactas esse persuasus sum, vt maiorem quam
duorum aut trium secundorum mutationem non ad-
mittant.



Nomen loci et Obseruat.	Obseruat. in singulis locis factae.	Obseruat. ad merid. Parif. reductae.	Nomen loci et Obseruat.	Obseruat. in singulis locis factae.	Obseruat. ad merid. Parif. reductae.
<i>Grenouici</i>			<i>Oxoniae</i>		
Hitchins	7 ^b .28'.57*		Hornsby	7 ^b .24'.13 ¹¹	7 ^b .38'.31 ¹¹
Heift	7. 29. 18	7 ^b .38'.33 ¹¹	Clare	24. 28	38. 46
Hortley	29. 28	38. 43	Sykes	24. 22	38. 40
Dunn	29. 48*		Shuckburgh	24. 25	38. 43
Dollond	29. 20	38. 35	Nikitin	24. 16	38. 34
Nairne	29. 20	38. 35	Williamson	24. 11	38. 29
Maskelyne	29. 23	38. 38	Horsley	24. 28	38. 46
<i>Londini</i>			<i>Stockholmiae</i>		
Aubert	29. 1	38. 35	Wilke	8 ^b .41. 46	38. 46
Canton	29. 15	38. 47	Wargentin	41. 47	38. 47
Hirt	29. 18	38. 50	Ferner	41. 48	38. 48
Bewis	28. 17	38. 46	<i>Vpsaliae</i>		
<i>Parifis</i>			Bergman	8 ^b .40. 9	38. 47
Bernouilli		38. 37	Melander	40. 12	38. 50
Messier		38. 45	Prosperin	40. 12	38. 50
Duféjour		38. 43	Salenius	40. 15	38. 53.
Cassini de Thury		38. 53		med	7 ^b .38'.43 ¹¹
Maraldi		38. 50	<i>Wardbus</i>		
Bory		38. 47 ¹¹	P. Hell.	9 ^b .34'.11 ¹¹	7. 38. 29
Fouchy		38. 47 ¹¹	<i>Cajaneburg</i>	Diffenf	- 14 ¹¹
			Planman	9. 20. 45	7. 38. 44
				Diffenf.	+ 1

Heic autem primum obseruare conuenit Longitudinem pro Wardhus a Parisiis a me assumptam fuisse $1^b. 55'. 8''$; quum Rev. Pat. *Hell* eandem adprobare videatur, ex obseruatione Elipseos Solis A. 1769 eandem inueni $1^b. 55'. 6''$ vel $7''$, qua igitur in vsum vocata dissensus momenti a Pat. *Hell* assignati a reliquis foret $12''$. Pro Grenouico quidem binas obseruationes Cl. D. *Hitchins* et *Dunn* excludendas esse censui, quod a medio inter omnes obseruationes pro hoc loco, sumto, vltra viginti secunda discrepent, quum tamen reliquarum quinque obseruationum dissensus decem secunda non superet. Obseruationes autem Oxonienses eam imprimis ob rationem attuli, vt pateret me in hoc examine instituendo nullo praeiudicio esse occupatum, quum inter obseruationes Oxonienses binae sit, quae cum momento Rev. Pat. *Hell* optime consentiunt. Immo ex magno numero obseruationum pro contactu hoc interno quarum copia adhuc suppetit, nonnullae quidem inueniuntur, quae obseruationi Pat. *Hell* fauent, simul tamen certum est, ex obseruationibus heic exclusis, quintuplo maiorem esse numerum earum, quae momentum a P. *Hell* assignatum erroris arcuunt, quam quae illud absoluunt. Verum tamen plures obseruationes heic congerere necesse non erat, quum id mihi propositum fuerit obseruationes tantum consulere factas in eiusmodi locis, quorum Longitudines Geographicae exacte essent cognitae. Certum igitur est, obseruationem Rev. Pat. *Hell* pro contactu interno in ingressu a reliquis optimaec notae

observationibus Europeicis per medium 14 vel 12 sec. discrepare. Quae discrepantia vtrum ex errore quodam observationis Wardhusiensis originem ducat nec ne definire nolo? si edim Rev. Pat. *Hell* rationem excogitare valeat, qua sua observatio cum reliquis supra allatis conciliari possit, id quidem me aegre non ferente fiet, donec autem id factum fuerit, sine aliqua offensione Rev. Pat. *Hell* dissensum hunc, nomine erroris in sequentibus vt et hucusque feci, indigitabo. Indubitata tamen hinc sequitur consequentia, pro valore Parallaxeos inuestigando momentum a Pat. *Hell* assignatum nequaquam vt vnice exactum in usum vocari debere, quum in aliquali observationum dissensu, regula ab Astronomis praescripta de medio sumendo, vt tutissima ratio veritatem proxime attingendi, respici debeat.

24. Simili modo nunc observationem Caianeburgi pro contactu externo institutam sub examen reuocare conuenit, vtrum cum reliquis contactus externi in egressu observationibus consentiat, nec ne? Quamuis autem hoc examen aequae certum haberi nequeat, ac illud quod pro contactu interno iam in medium protulimus, quum de Longitudinibus locorum non nisi cum praecisione & secundorum persuasi esse possimus, valde tamen probabiliter hinc colligi potest observationem Cel. *Pianman* in defectu peccare, quum omnes reliquae observationes eam hoc respectu erroris arguant. In hoc autem examine absoluendo omnia momenta observata ad Meridianum Petropolitanum

reue-

renocare placet, in quem vsum Longitudines locorum
sequentes a me adhibitae fuere:

Petropolis a Parisiis $1^b. 52'. 0''$ Orient.

Caianeburg $1. 41. 41$

Wardhus $1. 55. 8$

Gurjes $3. 18. 37$

Orenburg $3. 31. 10$

Pekin $7. 36. 23$

Pro Caianeburg quidem Gurjes et Orenburg Longi-
tudines adhibui, quas ex Eclipsi Solis Anno 1769,
elicui vid. Tom. XV. Nouor. Comment., nisi quod
Longitudinem Orenburgensem 5 secundis auxerim,
vtrum autem haec Longitudo adhuc $10''$ augmentum
admittat, valde dubito; saltem ex obseruatione Eclip-
seos Solis in Orenburg facta, id nunquam probari
poterit.

Locus et Nomen Ob- feruat.	Moment. Obferuat.	Obferuat. ad Merid. Petro- pol. reducta.
<i>Wardbus</i>		
Borgrewing	15 ^b . 45 ⁱ . 38 ^u .	15 ^b . 43 ⁱ . 16 ^u .
P. Hell	45. 44.	43. 22.
P. Sainowies	45. 45.	43. 23.
<i>Petropoli</i>		
P. Stahl		43. 14.
Lexell		43. 24.
Euler		43. 31.
P. Mayer		43. 41.
<i>Gurjef.</i>		
Lowits	17. 11. 6	43. 20.
<i>Orenburg.</i>		
Krafft	17. 23. 24.	43. 32.
<i>Pekin.</i>		
P. Collas	21. 26. 54.	43. 33.
P. Dollieres	27. 0.	43. 39.
<i>Cajaneburg.</i>		
Planman	Med. 15. 32. 27.	15 ^b . 43 ⁱ . 27 ^u .
	differ.	43. 7.
		— 20 ^u .

Quamuis hinc pateat observationem Cajaneburgensem a reliquis per medium 20^u differre, tamen in eam procliuor sum sententiam, ipsum hoc medium 5 secundis a veritate aberrare posse, ita ut error observationis Cajaneburgensis circiter 15^u aestimari queat.

Sed

Sed de absoluto valore huius erroris solliciti non sumus, sufficit quod generaliter euictum dederimus istam observationem erroris cuiusdam suspicionem haud effugere posse. Interim tamen si quis omnes reliquas observationes pro contactu externo in fauorem observationis Cajaneburgensis pro erroneis declarare velit, ad eum convincendum sequens proponere licebit argumentum vix. ulli exceptioni obnoxium. Notum est Cel. D. Rumowski in Kola non observasse contactum externum, certo tamen vidisse quod hic contactus tempore $15^h. 53^l. 31''$. nondum transisset, comparetur igitur hoc momentum cum observatione Cel. Planman saepius commemorata et inuenietur differentia meridianorum inter Cajaneburg et Kola $21'. 20''$, quae tamen ex observata Eclipsi Solis tantum habetur $21'. 1''$, Longitudo enim Kolae a me inuenta est $2^h. 2'. 42''$. Etsi iam concederem verisimile esse, ut Longitudo pro Kola $10''$ sit augenda, eaque pro Cajaneburg forsitan 5 sec. minuenda; quum tamen ex altera parte probabiliter concludere licet, verum momentum contactus externi pro Kola saltem quinque secundis serius incidisse quam momentum a Celeb. Rumowski notatum $15^h. 53^l. 31''$; satis omnino certo colligere possumus observationem Cel. Planman pro contactu externo errori ad minimum $10''$ esse obnoxiam. Id enim unusquisque facile concedet, multo magis probabile esse, ut Cel. Planman pro contactu externo errorem commiserit decem secundorum, quam ut observatio Cel. Rumowski pro fine Eclipsos Solis,

ex qua scilicet Longitudo Kolae deducta est, integris viginti minutis secundis sit erronea.

25. Respectus itaque si habeatur horum errorum, quibus observationes in Wardhus et Cajaneburg factae, obnoxiae videntur, perspicuum sane fiet valorem medium Parallaxeos, quem supra elici, summa gaudere probabilitate; ut eius veritas tamen eo magis confirmetur et stabiliatur, nunc haud incongruum erit exponere, quinam pro parallaxi inueniantur valores, si iuxta modum §. 7. expositum observationes in diuersis locis pro ingressu et egressae factae inter se combinentur, indeque deducti valores pro duratione transitus per chordam VM , comparentur cum durationibus transitus in America obseruatis. Pro contactu autem interno in ingressu, adhibebimus observationes Grenouici, Parisiis, Stockholmiae et Vpsaliae factas, et pro contactu interno in egressu observationes Wardhusiis, Gurjesi, Orenburgi et Pekini institutas, quas omnes ad meridianum Parisinum reducemus, adhibitis differentiis Meridianorum iam supra expositis. Hinc vero sequentes eliciuntur valores temporum per chordas VM et vM , ubi maioris compendii causa correctiones γ et γ iam prorsus omisimus.

Temp. per VM		Observatio ad Merid.
		Parisi. reducta
Pro Parisiis	$= T + 49,73.\pi$	$7^b. 38'. 45''$
Grenouico	$= T + 49,64.\pi$	38. 39
Stockholmia	$= T + 48,88.\pi$	38. 54
Vpsalia	$= T + 48,83.\pi$	38. 56

vbi

vbi notandum est, a me in vsum vocata fuisse momenta a Celeb. Viris *Mafkelyne*, *Messier*, *Wargentin* et *Bergman* obseruata.

Temp. per <i>v</i> M	Observat. ad Merid.
	Parisi. reduc'ta
Pro Wardhus = $T + 32,02.\pi$	$13^b.32'.17''$ P. Heil
Gurjef = $T + 45,36.\pi$	$13.34.18$ Lowies
Orenburg = $T + 43,73.\pi$	33.56 Krafft
Pekin = $T + 31,55.\pi$	32.1 P. Dolléres

Vt autem melius intelligatur quomodo comparatio supra commemorata instituenda sit, id vnico exemplo illustrare sufficiet; quum igitur sit,

$$\text{Temp. per V M Parisiis} = T + 49,73.\pi$$

$$\text{Temp. per } v \text{ M Wardhus} = T + 32,02.\pi$$

erit Temp. per V M $v = 2T + 81,75.\pi = 5^b.53'.32''$,
quod si nunc haec aequatio combinetur cum illa pro
Insula Regis Georgii inuenta:

$$2T - 83,79.\pi = 5^b.30'.3'',5,$$

inde prodibit

$$165,54.\pi = 23'.28'',5 = 1408'',5,$$

ex quo fit $\pi = 8'',51$.

26. Valores igitur Parallaxeos per combinationem observationum supra allatarum inuentos, sequenti Tabula ob oculos ponere sufficiet:

G

Valo-

Valores Parallaxeos ex comparatione observationum pro

cum	Inſula	St. Joſeph.	Arc.
	R. Georg.		Pr. Walliae
Wardhuſet Paris	8'', 51	8'', 54	8'', 57
Grenouico	8, 55	8, 60	8, 69
Stockholmia	8, 50	8, 53	8, 55
Vpfalia	8, 49	8, 51	8, 52
Gurjeſ et Paris	8, 55	8, 60	8, 66
Grenouico	8, 59	8, 65	8, 76
Stockholmia	8, 54	8, 59	8, 64
Vpfalia	8, 53	8, 58	8, 62
Orenb. et Paris	8, 50	8, 54	8, 55
Grenouico	8, 54	8, 59	8, 65
Stockholmia	8, 49	8, 52	8, 53
Vpfalia	8, 48	8, 51	8, 50
Pekin et Paris	8, 44	8, 44	8, 36
Grenouico	8, 48	8, 50	8, 48
Stockholmia	8, 42	8, 42	8, 33
Vpfalia	8, 41	8, 41	8, 29
med.	8, 50	8, 53	8, 54

Si nunc ex valoribus his mediis, ſingulorum probabilitates reſpectuè proportionales æſtimando numeris 3, 2, 1, medium ſumatur; prodit valor medius Parallaxeos 8'', 52 circiter, vnde conclusio noſtra ſupra inuenta egregie confirmatur. Videntur autem conclusiones heic inuentae eo maiorem mereri fidem, quod optime inter ſe conſentiant.



27. Iam quidem in §. 7. sufficienter a me explicatum est, cur hanc Parallaxin inuestigandi methodum non penitus repudiandam esse existimauerim; nunc autem etiam hoc addere lubet, Longitudinibus locorum, vbi obseruationes pro egressu Veneris institutae fuerunt, grauiores quosdam errores inesse non posse, saltem non tales qui 5 aut ad summum 10 secunda superarent, nec probabile omnino esse vt hi errores si qui forsitan sint, pro omnibus quatuor locis in eundem sensum cadant. Concedendum autem est obseruationes Gurjesuensem et Pekini factam insigniter inter se differre, quum earum dissensus ad 20 secunda assurgat; iniquum autem esset causam huius dissensus ex errore vnicae harum obseruationum deducere, siquidem saltem pro hypothesi Longitudinum recte a nobis stabilitarum, ex obseruationibus contactuum externorum pro his locis, probabiliter concludere licet, contactum internum in Gurjes, serius quam fieri debuerat esse obseruatum, contra vero Pekini momentum a *Par. Dollieres* assignatum, verum contactum aliquot secundis praecedere; vbi tamen dissimulare non possumus obseruationem Pekinensem aliquanto magis dubiam videri, quam Gurjesuensem. Si enim momenta R. P. *Dollieres* pro contactibus internis et externis in usum vocentur, nullum quidem est dubium, quin valor Diametri Veneris ex ipsis maior inueniatur quam 58'', qui tamen valor etiam per mensuras huius Diametri Micrometris factas, plane refellitur. Neque igitur concipere possumus, quomodo

Cel. de la Lande ex his momentis quantitatem diametri Veneris tantum, $57''$, 5 inuenire potuerit. Interim ne videretur nos praeiudicio quodam occupatos, vnae obseruationi magis fauere quam alterae, vtramque obseruationem Gurjesuensem et Pekinensem adhibere consultum duximus; imprimis quum certo essemus persuasi binas reliquas obseruationes Wardhusensem scilicet et Orenburgensem, quae inter illas mediae quasi sunt, satis esse exactas.

28. In eorum gratiam, qui modo vulgariter recepto valorem Parallaxeos quaerere praecipiant, effectus Parallaxicos pro singulis obseruationibus quarum in praecedentibus vsum fecimus, sub hypothesi Parallaxeos $8''$, 5 computatos, sequenti Tabula exponere iuuat, vbi contactus internos pro ingressu et egressu numeris II. et III. respectiue designabo, externum autem pro egressu numero IV. indigitabo:

Effectus

Effectus Parallactici sub hypothesi
parallaxeos 8", 5.

	Cont. II.	Cont. III.	Cont. IV.
Arx.Pr.Walliae	+ 4'. 10", 5.	+ 39", 1.	
St. Josephus	+ 17, 1	+ 4'. 48, 0.	
Insula R. Georgii	- 5. 34, 3	+ 6. 17, 9.	
Wardhus	+ 6. 28, 9	- 4. 32, 2.	- 4'. 10", 4.
Cajaneburg	+ 6. 43, 0.	- - -	- 4. 34, 9.
Kola	+ 6. 30, 8.	- 4. 41, 2.	
Paris	+ 7. 2, 7.	- - -	
Grenouic.	+ 7. 1, 8.	- - -	
Stockholmia	+ 6. 55, 5.	- - -	
Vpsalia	+ 6. 55, 1	- - -	
Gurjes	- - -	+ 6. 25, 6.	
Orenburg	- - -	+ 6. 11, 7.	
Pekin	- - -	- 4. 28, 2.	

Certo autem persuasus sum, vnumquemque tentamine
facto facile deprehensurum, quod singulae conclu-
siones nostrae pro Parallaxi rite sibi consent. De
ipsis autem his effectibus Parallacticis asserere non du-
bito, eosdem esse exactissimos, nec vnicum quidem in-
ter eos fore, qui semisse secundi a veritate discreparet.

29. Antequam vero iam ad conclusiones no-
stras finales progrediamur, haud praeter rem erit,
sequentem heic adponere Tabulam, qua valores pro
duratione Geocentrica ex variis hypothesibus Parallaxeos
deducti repraesentantur :

G 3

Duratio

Duratio Geocentrica pro hypothefi parallaxeos,

	$\pi = 8'', 30$	$= 8'', 40$	$= 8'', 50$	$= 8'', 60$	$= 8'', 70$
ArxPrinc. Walliae	$5^b.41'.58'',1$	$5^b.41'.55'',6$	$5^b.41'.53'',1$	$5^b.41'.50'',7$	$5^b.41'.47'',7$
St. Iosephus	45, 5	48, 7	51, 9	55, 1	58, 3
Inf. Reg. Georgii	38, 9	47, 4	55, 7	42. 4, 1	42. 12, 5
Wardhus	42. 28, 5	42. 20, 7	42. 12, 9	42. 5, 1	41. 57, 4
Cajaneburg	41. 57, 1	41. 49, 1	41. 41, 1	41. 33, 1	41. 25, 1
Kola	42. 20, 8	42. 12, 9	42. 5, 0	57, 1	49, 2
Wardhus . . Paris.	13, 4	5, 3	41. 56, 1	48, 9	40, 8
Grenouic.	20, 2	12, 1	42. 4, 0	55, 8	47, 7
Stockh.	11, 5	3, 4	41. 55, 3	47, 2	39, 1
Upsal.	9, 9	1, 8	53, 7	45, 6	37, 5
Gurjef . . Paris.	23, 7	14, 5	42. 4, 7	55, 2	45, 8
Grenouic.	30, 5	21, 3	11, 5	42. 2, 0	52, 6
Stockh.	21, 8	12, 4	2, 9	41. 53, 5	44, 1
Upsal.	20, 2	10, 8	1, 3	51, 9	42, 5
Orenburg . . Paris.	15, 2	6, 0	41. 56, 6	47, 2	38, 0
Grenouic.	22, 0	12, 8	42. 3, 4	54, 0	44, 8
Stockh.	13, 5	4, 1	41. 54, 8	45, 5	36, 3
Upsal.	11, 7	2, 3	53, 0	43, 7	34, 5
Pekin . . Paris.	1, 3	41. 53, 3	45, 1	37, 0	28, 9
Grenouic.	3, 1	42. 0, 1	51, 9	43, 8	35, 7
Stockh.	41. 59, 4	41. 51, 4	43, 3	35, 3	27, 2
Upsal.	57, 8	49, 8	41, 7	33, 7	25, 6

30. Ex iis quae in praecedentibus fufius difputata funt, fequentes nunc deducere licet conclufiones:

I°. Parallaxin Solis $8''$, 3 certe effe maiorem, minorem tamen quam $8''$, 7.

II°. Cum fumma probabilitate ftatui poffe, valorem parallaxeos etiam $8''$, 4 fupergredi, nec tamen ad $8''$, 6 increfcere.

III°. Valorem parallaxeos Solis aequatoreae tempore tranfitus, fatis exacte definiri per $8''$, 50, nec vllam tamen abfurditatem inuoluere, fi hic valor tribus aut quatuor partibus centefimis fecundi augeatur vel minuatur.

Quod primam harum conclufionum attinet, fufficiet tantum heic oftendere parallaxin $8''$, 3 certo effe maiorem, fimilia enim incommoda quae valorem parallaxeos $8''$, 3 premunt, etiam pro valore $8''$, 7 fe produnt. I°. Igitur quum valor parallaxeos $8''$, 3 tantum ex comparatione obferuationis Caianeburgenfis cum illa ad Sinum Hudfonis facta, deducatur et fupra oftensum fit, durationem tranfitus pro Caianeburg, quindecim, vel ad minimum decem fecundorum augmentum admittere; inde facile colligitur ex comparatione ifta maxime erroneum prodire Parallaxeos valorem, quinque enim fecundorum augmentum in duratione tranfitus pro Caianeburg, in valore parallaxeos augmentum $\frac{1}{10}$ fecundi producit. II°. Si admitteretur valor Parallaxeos $8''$, 3, ftatuendum effet, aut durationem Geocentricam ex obferuationibus ad Sinum
Hud-

Hudsonis et in Caianeburg factis, elicitam esse veram, aut eam pro consensu cum reliquis obseruationibus Americanis obtinendo, aliquantum esse minuendam. Si prius, duratio transitus pro Insula Regis Georgii assignata $18''$ esset augenda, duratio autem pro St. Iosepho Californiae $12''$ augmentum pateretur, quod pro insigni absurdo habere licet. Sin autem posterius statuatur, obseruationes pro egressu in Wardhus, Gurjes, Orenburg et Pekin factae, praeter omnem probabilitatem redderentur erroneae, iam enim pro duratione Geocentrica $5^b. 41'. 57''$, obseruatio Wardhusiensis pro egressu saltem, $16''$, Gurjesuensis $23''$ Orenburgensis $15''$ fierent erroneae, si igitur in duratione pro transitu St. Iosephi in California obseruato error $5''$ admitteretur, omnes errores supra alati adhuc $7''$ augerentur. Quod autem in obseruatione Gurjesuensi error $30''$ vel in Orenburgensi $22''$ deprehenderetur, ne minimam quidem habet veritatis speciem. III^o Ex valoribus pro duratione Geocentrica sub hac hypothese Parallaxeos inuentis, liquet maximum eorum dissensum vsque ad $51''$ assurgere, quae aberratio etiamsi per quatuor momenta obseruata distribuenda videntur, tamen pro absurda haberi meretur; demonstrari enim potest inter quatuor huiusmodi momenta, bina saepius dari in quibus maiores quam quinque secundorum errores suspicari non licet. IV^o. Obseruationes Petropoli pro contactu interno factae hinc vno minuto primo fierent erroneae, qualem errorem ipsis inesse nobis quidem persuaderi non potest.



potest. Fatemur quidem has observationes erroribus 30 sec. esse obnoxias; maxime tamen iniquum esse arbitramur, easdem erroris integri minuti primi arguere velle, et suspicio Cel. *de la Lande* in Dissertatione Eius de Parallaxi, de errore observationis Petropolitanae prolata omni destituitur verisimilitudine, quod quidem hoc modo facile euincitur. Supponamus in assignando tempore Penduli, errorem integri minuti primi pro contactibus internis Petropoli esse commissum; statuendum igitur erit, aut momenta pro contactibus externis integro minuto quoque esse mutanda, aut eadem quemadmodum prolata sunt, recte se habere. Prius autem absurdum esse per §. 24. euincitur, posteriori igitur suppositione adoptata mora inter binos contactus fiet fere 19', quae certe iusto maior est.

31. De *secunda* conclusione nostra tenendum est, cum praeprimis inde confirmari, quod 1°. valores Parallaxeos ex comparatione durationum ad Sinum Hudsonis et in California deducti, contineantur his limitibus 8'', 39 et 8'', 66, unde maxima cum probabilitate colligere licet Parallaxin 8'', 40 supponi debere maiorem. 11°. Observationes Wardhusiensis et Caieneburgenses utcumque inter se insigniter discrepent, tamen cum observatione super Insula R. Georgii comparatae, valores praebent pro Parallaxi, qui proxime circa hos limites 8'', 4 et 8'', 6 subsistunt, unde quum utraque observatio saltem decem secundorum

H

cor-

correctionem admittat, summa probabilitate gaudet parallaxin inter hos limites $8''$, 4 et $8''$, 6 contineri, praesertim quia in duratione transitus pro Insula R. Georgii maiorem quam quinque secundorum errorem suspicari fas non est. III°. Maximus dissensus inter valores durationis Geocentricae pro hypothese Parallaxeos $8''$, 4 ad $40''$ assurgit, quem adhuc pro nimio recte habere licet, praesertim quia casus dantur ubi totus hic error in vnica fere obseruatione, Gurjesuensi ex. gratia, esset quaerendus. Pro hypothese Parallaxeos $8''$, 6 dissensus non habebitur nisi $30''$, qui ex obseruationibus in Wardhus et Caieneburg factis prodit; quum igitur hunc errorem in sola obseruatione Caieneburgensi quaerere non liceat, sed certum omnino sit obseruationem R. Pat. *Hell* a suspitione erroris liberari non posse, inde inferre possumus parallaxin quoque $8''$, 6 esse minorem

32. Denique *tertiam* nostram conclusionem quod attinet, argumenta pro ea demonstranda repetere, heic eo minus est necesse; quod ex disquisitionibus nostris supra institutis euidenter pateat Parallaxin Solis statui posse quam proxime $= 8''$, 50 vel si placet $8''$, 53. Dixi autem me non repugnante pro parallaxi adhiberi posse $\pi = 8''$, 48, quia hic valor ex solis obseruationibus Americanis inter se comparatis colligitur, et quum obseruationes ad Sinum Hudsonis et in California factae singularia prae se ferant veritatis criteria, in valore Parallaxeos determinando, illis merito insigne tribuendum est meritum. Eo tamen non obstante, fortiores omnino nobis videntur esse

rationes, quae parallaxin $8'', 48$ aliquanto maiorem esse vident, quam quae in huius valoris fauorem adduci possunt et valor quidem a nobis adhibitus $\pi = 8'', 50$ observationibus Americanis tam bene satisfacit, ut maiorem consensum desiderare non possimus. Erit igitur nobis *parallaxis Solis horizontalis aequatoreae pro tempore transitus* $= 8', 50$ ex quo illa *Parallaxis aequatoreae, quae distantiae mediae Solis a terra conuenit, prodibit* $8'', 63$ vel si potius parallaxi Polari vti placet, illa inuenietur $8'', 59$, sub ea scilicet hypothese, quod radius aequatoris statuatur esse ad semiaxem telluris ut 201 ad 200. Limites autem intra quos valor Parallaxeos Solis mediae cadere concipiendus est, statuere licebit $8'', 60$ vel $8'', 66$, saltem iidem ultra $8'', 58$ et $8'', 68$ prorogari non posse videntur.

33. Nunc quidem obscurum haud esse potest, quid de valore Parallaxeos a Cel. *de la Lande* invento statuendum sit, maxime scilicet probabile esse, quod is iusto minor sit et quidem a veritate saltem decima parte secundi discrepet. Si enim pro π assumatur $8'', 48$, quippe qui valor ex observationibus Americanis prodit, determinatio Cel. *de la Lande* ¹⁷⁶³ secundi euadet erronea, cum tamen a valore $8'', 48$ mea conclusio in Tom. XVI. Nou. Comment. allata tantum ⁷⁵ secundi discrepet. Atqui de hec errore in determinatione Cel. *de la Lande* commissio, multis heic agere superfluum foret, sufficiet nobis ostendisse hanc de-

H 2

termi-

terminationem eo minus pro vera haberi posse, quod valores Parallaxeos ex singulis obseruationibus a Cel. hoc Viro deducti, haud parum a veritate recedant. Sequenti igitur Tabula valores pro Parallaxi tam a Cel. *de la Lande* inuentos, quam veros simul conspectui exponamus:

	Wårdhus		Cajaneb.		Arx Prin. Wall.		St. Ioseph	
	<i>C. la Land.</i>	ver.	<i>C. la Land.</i>	ver.	<i>C. la Land.</i>	ver.	<i>C. la Land.</i>	ver.
Arx. Pr. Walliac	9, 08	9, 01	8, 49	8, 41				
St. Ioseph	8, 81	8, 80	8, 48	8, 53	8, 56	8, 61		
Inf. R. Georgii	8, 72	8, 74	8, 52	8, 54	8, 55	8, 62	8, 53	8, 60

Notandum autem est valores pro St. Iosepho non prorsus eodem heic occurrere, ac quos supra § 18. inuenimus, quia nunc cum Cel. *de la Lande* momenta pro isto loco a Cel. *Chappe* obseruata in vsum vocauimus. Ex inspectione huius Tabulae liquet, quod etiam si prima columna penitus secluderetur, ex reliquis tamen medium sumendo, parallaxis prodiret 8^h, 55; patet quoque contentum obseruationis Caianeburgensis cum Americanis non tantum esse, ac sibi persuasit Cel. *de la Lande*. Quod si autem haec aberratio in determinatione Cel. *de la Lande* commissã, prouenerit ex ipsa computandi Methodo cuius vsum adhibuit, quod nunc quidem demonstratum dedimus; intelligitur profecto istam Methodum inter exactissimas non habendam esse, nec bene sibi constare, quae in laudem huius Methodi a Cel. *de la Lande* proferuntur. Immo iam quidem experti sumus

sumus Methodos istas Analyticas quae a Cel. de la Lande incertitudinis et obscuritatis arguuntur, pro Parallaxi valores praebuſſe minus erroneos, quam qui ſequuntur ex Methodo Ipfius, vtut rei naturae praeprimis accommodata, ſimpliciſſima, facillima, maxime exacta et certiſſima Iſſi audiat. Neque tamen propter hanc aberrationem, iſtam Cel. de la Lande methodum reiiciendam eſſe cenſeo; ſiquidem vt ſupra quidem explicauimus leuibus adhibitis correctionibus, ad maximam exactitudinem perducere poſteſt, et Methodus quidem a me hac occasione in vſum vocata, quoad principalia cum illa Cel. de la Lande conuenit (e).

34. Quod Parallaxin Solis cum aliqua latitudine definiendam eſſe cenſuerimus, nemo mirabitur, cui in mentem venerit obſervationes Aſtronomicas, perinde ac quantitates Geometricas pro absolute exactis haberi non poſſe. Omnes igitur illi Parallaxeos valores vt probabiles ſpectari merentur, quibus melioris notae obſervationes imprimis Americanae pro Sinu Hudſonis et Sto. Joſepho, non vltra 5 ſecunda redduntur erroneae. Neque certo quidem determinare valemus, quousque limites parallaxeos mediae prorogari poſſint,

H 3

inte-

(e) Vt intelligatur me vſum huius Methodi a Cel. de la Lande mutuo non ſumpſiſſe, conſuli poterunt Acta Academiae Scientiarum Stockholmiensis pro An. 1771, vbi calculi pro tranſitu Veneris, iuxta eandem qua iam vtor Methodum, a me inſtituti occurrunt.

interim uti supra iam innuimus, probabile nobis videtur hos limites ultra $8''$, 58 et $8''$, 68 extendi non posse. Ratio autem huius nostrae assertionis sequens est: Ex comparatione observationum in Lapponia factarum cum illa pro Insula Regis Georgii, patet, quod nulla habita ratione correctionum quas observationes admittere possunt, limites ipsius π sint $8''$, 41 et $8''$, 61 . Conf. §. 18. Quodsi nunc in utraque observatione Wardhusiensi scilicet et Caieneburgensi error 10 secundorum admittatur, hi limites fient $\pi = 8''$, 47 et $\pi = 8''$, 55 , quumque fieri possit ut in duratione pro insula Regis Georgii incertitudo adsit 5 secundorum, existimauimus sine errore pro Parallaxi media hos praescribi posse limites $8''$, 58 et $8''$, 68 . Vtrum vero determinatio Parallaxeos Solis ex nouissimo transitu Veneris deducenda tantam admittat praecisionem, ut dubium centesimam secundi partem non supergrediatur, iure meritoque dubitamus. Scilicet ad tantam exactitudinem obtinendam omnino requireretur, ut durationes in Insula Reg. Georgii, Caieneburgi et Wardhusiis obseruatae non plus quam duobus secundis essent incertae, talem autem praecisionem ne sperandam quidem fuisse censemus. Fatemur igitur valde dubia nobis videri, quae *R. P. Hell* in Opusculo de Parallaxi Solis profert, de praecisione parallaxeos, quam ex observationum in Wardhus et super Insula Ohatitee factarum comparatione deduxit. Et si enim *R. P. Hell* concederemus observationem Wardhusiensem ne vno quidem minuto secundo erroneam esse,

esse, tamen nullam concipere possumus rationem, cur
P. Hell eandem exactitudinem tribuat durationi pro
 insula R. Georgii iauentae. Recordari enim debuisset
 momenta contactuum pro hoc loco adhibita, non esse
 obseruata, sed per medium ex obseruatis deducta;
 quum igitur vnius obseruatoris momentum multo
 magis esse possit erroneum quam alterius, liquet om-
 nino de duratione pro Insula Regis Georgii aliquam
 remanere incertitudinem. Porro etiamsi *Reu. Pat.*
Hell largiri vellemus momenta haec pro Insula Reg.
 Georgii veritati perfecte consentire; tamen minime
 inde sequeretur ex hac obseruatione et *Wardhusensi*
 valorem parallaxeos cum praecisione centesimae partis
 secundi cognosci; hoc enim concedi non posse videtur
 antequam a *Reu. Pat. Hell* demonstratum fuerit, ob-
 seruatore super Insula Regis Georgii constitutum,
 qui cum *Pat. Hell* eodem acumine visus gaudens,
 aequae sortem adhibuisset Tubum ac quo R. P. *Hell*
 vsus est, haec praecise momenta pro contactibus in-
 ternis vsque ad praecisionem duorum secundorum in-
 venire debuisset, quae ex momentis reuera obseruatis
 medio capto deducuntur. Denique si ex obseruatione *Reu.*
P. Hell exacte sequatur parallaxis media $8'', 7$ quem-
 admodum ipse contendit, scire quidem optaremus an
 idem valor Parallaxeos ex Sociorum Ipsius obserua-
 tionibus deduci possit et quaenam momenta pro In-
 sula R. Georgii adhibere debeamus, vt obseruationes
R. Pat. Sainouics et *Cl. Borgreuing*, cum momentis
 a *P. Hell* obseruatis perfecte conciliari queant?

35. Antequam huic de Parallaxi Solis disquisitioni finem imponamus, haud inutile erit ostendere quales prodeant observationum correctiones ex hypothesis $\pi = 8'', 50$, hunc autem in finem necessum est, ut primum duratio Geocentrica pro hac hypothesis determinetur, tum vero inde deducatur tempus medii transitus pro loco quodam cognito ex causa Lutetia Parisiorum. Si igitur ex valoribus Durationis Geocentricae pro hypothesis $\pi = 8'', 50$. §. 29. allatis, medium sumatur, habebitur duratio Geocentrica inter contactus internos $5^b. 41'. 56''$, quam tamen in favorem observationum in America factarum statuere licebit $5^b. 41'. 55''$, ita ut semissis huius durationis sit $2^b. 50'. 57''$, 5. Quodsi nunc tempus verum contactus interni pro Parisiis statuatur $7^b. 38'. 44''$ et respectus habeatur effectus Parallaxici, qui pro hoc contactu est $+ 7'. 2'', 7$, prodibit tempus verum medii transitus Parisinum $10^b. 36'. 44''$. Quoniam vero haec determinatio dubia videri posset, si duratio Geocentrica aliquot secundorum mutationem admitteret, vel momentum contactus interni pro Parisiis a nobis non recte esset stabilitum, hoc tempus medii transitus etiam alia ratione inuestigabimus. Conferamus scilicet observationes pro ingressu Parisiis, Grenovici, Stockholmiae et Upsaliae factas, cum observationibus pro egressu in Wardhus, Gurjet, Orenburg et Pekin institutis, indeque obtinebimus non solum valores temporis a Venere impenso per chordam $V M v$ ex observationibus deductos, sed etiam differentiam tem-

Fig. 4

temporum per V M, & M ex effectibus parallaxicis deducendam, unde singula tempora per V M et v M determinari possunt, quo ipso tempus medii transitus sponte innotescit. Facta autem huiusmodi combinatione, sequentes inuenimus determinationes pro tempore vero medii transitus Parisino :

ex Wardhus et Paris $10^b. 36'. 47''$		ex Gurjes' et Paris $10^b. 36'. 50''$	
Grenou.	44	Grenouic.	46
Stockh.	48	Stockh.	51
Upsal.	49	Upsal.	52
med.	$10. 36. 47$	med.	$10. 36. 50$

Orenburg et Paris $10. 36. 46$		Pekin et Paris $10. 36. 40$	
Grenou.	43	Grenou.	37
Stockh.	47	Stockh.	41
Upsal.	47	Upsal.	42
med.	$10. 36. 46$	med.	$10. 36. 40$

Hinc ex omnibus medium sumendo, prodit tempus medii transitus Parisinum $10^b. 36'. 46''$, quod tantum duobus secundis a prius inuento differt, quare sine errore sensibili ut supra pro hoc momento adhibere licet $10^b. 36'. 44''$. Tempore autem medii transitus inuento, nunc etiam Longitudines locorum in America determinari poterunt, indeque vera contactuum momenta inuestigari. Pro insula Regis Georgii supponamus vera momenta contactuum fuisse, $21^b. 44'. 2''$ pro contactu interno in ingressu, et $3^b. 14'. 6''$ pro contactu interno in egressu, quae scilicet inueniuntur

si observationibus Cel. *Green* prae reliquis ibidem factis duplex tribuatur probabilitas, hinc igitur erit tempus per $V M v = 5^b 30'. 4''$ et differentia temporum per $M V$, $M v = 44''$, ex quo deducitur tempus medii transitus pro hoc loco $0^b. 29'. 26''$ ideoque Longitudo eius occidentalis a Parisiis $10^b. 7'. 18''$, quodsi vero simpliciter ex momentis observatis media sumantur, prodibit haec longitudo $10^b. 7'. 16''$ de qua discrepantia non multum laboramus. Similiter pro reliquis locis Americanis tempora medii transitus indeque Longitudines locorum deducuntur, quos calculos heic recensere superfluum esset. Pro locis autem Europeicis ex cognitis longitudinibus locorum, primum tempora medii transitus determinauimus, deinde vero ope durationis Geocentricae et effectuum Parallaxicorum, vera momenta contactuum pro singulis locis eliciuimus. Conclusiones autem ipsas iam succincte sequenti repraesentabimus Tabella;

Locus

Locus Observat.	Longitud. a Parisius.	Temp. med. transit.	Mom. Cor. Cont. II.	Mom. Cor. Cont. III.	Mom. Cor. Cont. IV.
	Occid				
Insula R Georgii	10 ^b . 7'. 18" ... 16"	0 ^b . 29'. 26" ... 24"	21 ^b . 44'. 3" ... 5"	3 ^b . 14'. 6" ... 8"	
St. Iosephus	7 28. 4.	3. 8. 40.	0. 17. 25 ¹ / ₂	5. 54. 50.	
Fort. Pr. Walliac	6. 26. 14.	4. 10. 30.	1. 15. 22	7. 0. 48.	
	Orient.				
Wardhus	1. 55. 8. 6	12. 31. 52 ... 50	9. 34. 26 ... 24	15. 27. 22. 20	15 ^b . 45'. 43" ... 41"
Cajaneburg	1. 41. 41.	12. 18. 25.	9. 20. 45.		15. 32. 40.
Kola	2. 2. 42.	12. 39. 26.	9. 41. 58.	15. 35. 5.	
Lut. Parit.	0. 0. 0.	10. 36. 44.	7. 38. 44.	- - -	
Grenou.	0. 9. 16. Occid.	10. 27. 28.	7. 29. 29.	- - -	
Stockholm	1. 2. 53. Orient.	11. 39. 37.	8. 41. 44.	- - -	
Upsalia	1. 1. 14.	11. 37. 58.	8. 40. 5.	- - -	
Gurjes	3. 18. 37.	13. 55. 21.	- -	16. 52. 44.	17. 11. 7.
Oreoburg	3. 31. 10.	14. 7. 54.	- -	17. 5. 3.	17. 23. 22.
Pekin	7. 36. 23.	18. 13. 7.	- -	21. 8. 33.	21. 26. 42.

Probe autem heic notandum est, haec momenta correcta tantum valere sub sequentibus hypothesibus, 1^o quod Parallaxis sit 8", 5; 11^o quod valor durationis Geocentricae aequetur 5^b. 41'. 55", vbi quidem vix duorum secundorum error metuendus est; 111^o si tempus observationis Parisinae a nobis recte sit assumptum, quod omnino summa gaudet probabilitate, conf. §. 23; 1V^o quod Longitudines locorum a nobis adhibitae sint exactae, id autem de plurimis valere nullum est dubium, V^o denique quod Diameter Veneris sit 57", 2, nam hac Diametro immutata, momenta contactuum externorum mutari quoque debent. Conclusiones igitur heic allatas non quidem pro veritatibus apodictis venditare audeo, vnius vel alterius secundi aberrationem lubenter admittens, prae-

primis quia valorem Parallaxeos aliquantula parte augeri vel imminui posse iam concesserim, vtrum vero hae determinationes aliqua gaudeant probabilitate vel minus, peritis harum rerum iudicibus diiudicandum relinquo. Id certe a me impetrare non potui, vt contra omnem verisimilitudinem, in fauorem vnius obseruationis, omnes reliquas erroris accusarem, vel vt crederem quempiam Astronomum vtcunque exercitatum aliqua infallibilitatis praerogatiua praeter caeteris instructum esse.

36. Stabilito valore Parallaxeos, de correctio-
nibus Elementorum Astronomicorum quae adhibuimus, pauca adicienda restant. Quod igitur *primum* attinet tempus verum coniunctionis Solis et Veneris, id ex tempore medii transitus iam inuento deducitur, subtrahendo $22^{\circ}.41''$, ita vt hinc constet coniunctionem Solis et Veneris contigisse, tempore Parisino, vero D. 3. Iun. 1769. $10^{\text{h}}.14^{\text{m}}.3''$, quod momentum saltem cum praecisione trium aut quatuor secundorum pro exacto haberi debet. II°. De latitudine Veneris Geocentrica ex durationibus transitus nihil certi definiri potest, nisi quantitas diametri Solis exacte sit definita. Obseruationes autem Micrometro obiectiuo factae circa distantias marginum Solis et Veneris, probant distantiam minimam centrorum Solis et Veneris, pro hypothesi Diametri Solis $31^{\circ}.31''$, statui debere $10^{\circ}.10''$ vel $10^{\circ}.9''$, conf. Tom. XVI. Nouor. Comment., nihilominus tamen fatendum est, his valoribus pro diametro Solis et distantia minima centrorum, in vsum vocatis,

vocatis, prodire durationem Geocentricam $5^b.42'.6''$, quae ab observata saltem $10''$ differret. Verum Cel. de la Lande vt huiusmodi dissensum tolleret, diametrum Solis adhuc 3 secundis diminuendam esse contendit, quae diminutio si admittatur, nullum est dubium quin valor distantiae minimae ex observationibus durationum, perinde ac ex mensuris Micrometro captis, prodeat $10'.8''$, ita vt hoc modo perfectus harum observationum consensus obtineatur. Licet vero hanc diminutionem plane negare non sustineamus, maior tamen esse videtur, quam vt admitti queat, nisi mensuris actualibus Micrometris institutis plenius confirmetur. Quare dubii omnino sumus, an non potius assensus praebendus sit eorum sententiae qui contendunt atmosphaeram Veneris aliquid contulisse, ad durationem transitus inter contactus internos coarctandam, praesertim quum ipsa phaenomena circa contactus internos in variis locis observata, hanc opinionem haud parum confirment. Distantiam igitur centrorum minimam tantisper $10'.9''$ statuamus, donec eius quantitas exactior argumentis indubitatis stabiliri queat, hinc autem fiet Latitudo Veneris Geocentrica tempore coniunctionis $10'.15'',7$, vnde demum deducitur Latit. Veneris Heliocentrica pro eodem tempore $4'.4'',9$, quumque locus coniunctionis sit $2^s.13^o.27'.21''$. habebitur locus nodi Veneris $2^s.13^o.36'.23''$. III°. Quod diametrum Veneris attinet, persuasum quidem mihi habeo eam $57''$, 2 statui posse aequalem, neque tamen absurdum aliquod

implicaret, si decima vel quinta parte secundi augeatur, tantus enim est dissensus obseruationum pro mora Veneris inter binos contactus externum et internum, vt praecisio maior quam $\frac{1}{3}$ secundi vix sperari queat. Valor autem hic diametri Veneris ex menuris Micrometro obiectiuo factis, tam pro transitu Veneris A. 1761, quam pro nouissimo, optime confirmatur.

37. Hae igitur praecipuae sunt meditationes, quas hoc loco de Parallaxi Solis proponendas habui, quasque iam Lectorum in hisce rebus peritorum examini et censurae libenter submitto. Cum summa autem confidentia asseuerare audeo, me in hac inuestigatione vbique veritatis amore ductum fuisse, quare si in ratiociniis a me allatis vitium quoddam forsan irrepperit, id ex praeiudicio quodam originem non docere, ipse mihi conscius sum. Tamen si vero rationes a me allatae, mihi quidem satis perspicuae et euidentes videantur; facile quidem praenideo illas eum successum non esse habituras, vt Auctores qui de Parallaxi Solis diuersas a mea fouent opiniones, convincere valeant. Noui enim mentes hominum ita esse comparatas, vt a sententiis semel receptis recedere non velint. Nec hac disquisitione eum mihi proposui scopum, vt aliorum sententias refellerem, sed vt intelligatur haud leues fuisse rationes, quibus inductus in Tomo XVI. Nou. Comment. Parallaxin Solis mediam $8''$, 68 esse statuebam. Denique si quis fuerit, qui ostendere valeat aut Methodum a me adhibi-

hibitam esse vitiosam, aut in calculis meis insignes latere errores, aut conclusiones inde deductas esse falsas; de eo commonefactus, non solum errores meos sponte confitebor, sed etiam valorem Parallaxeos heic adoptatam minus recte se habere agnoscam. Sin autem id a nemine praestari poterit, in ea quidem constanter permanebo sententia, valorem parallaxeos mediae contineri inter $8'', 58$ et $8'', 68$, fatisque probabiliter statui posse $8'', 63$, aliis tamen liberum relinquens de Parallaxi pro lubitu iudicandi; nec enim eam mihi vindicare possum auctoritatem, ut hunc Parallaxeos valorem non solum nostri aevi Astronomis, sed etiam posteris adoptandam et adprobendam obtruderem.

Ultra enim quo progrediar, quam ut veri videam similia, non habeo. Certa dicent ii qui . . . se sapientes esse profitentur. Cicero Tuscul. Quaest. Lib. I.



ANIMAD-

ANIMADVERSIONES
IN
TRACTATVM REV. PAT. HELL.
DE
PARALLAXI SOLIS.

I. In disquisitione de Parallaxi Solis, quam Rev. Pat. *Hell* nuper vt appendicem ad Ephemerides suas pro Anno 1773. euulgauit, variis argumentis probare annititur, plurimas conclusiones quae in Dissertatione Illustr. *Euleri* de Parallaxi Solis Tom. XIV. Nouor. Comment. Academiae Imperialis Scient. Petropolit. inserta, occurrunt, minus recte se habere. Quum vero dubia ista, quibus conclusiones ex Methodo *Euleriana* deductae ibidem impugnantur, a P. *Hell* non contra Illust. *Eulerum* sed me directa sint, ad meum quoque officium pertinere existimo, breuiter heic exponere quid de variis erroribus a P. *Hell* mihi imputatis sentiam, vt aequi rerum iudices intelligant quodnam pretium dubiis Ipsius sit statuendum.

2. Primum igitur ut eo melius dispici queat, an conclusiones istae, quae ex computo ad praescriptum Methodi *Eulerianae* instituto in Tom. XIV. Comment. vel Opere Collectionis Petropolitanae deductae sunt, mihi iure imputari debeant; notandum est, has conclusiones triplici de causa erroneas evadere potuisse. Si enim vel Methodus ipsa ad summam praecisionem non sit exacta, vel in adplicatione Methodi aberratum sit, vel in ipso computo errores sint commissi, facile intelligitur conclusiones ipsas recte se habere non posse. Quod autem attinet errores, qui vel propter defectum Methodi, vel peruersam eius adplicationem irrepere concipiuntur, hi certe mihi eo minus imputari poterunt, quod omnes calculi pro Parallaxi Solis, exceptis iis qui observationem Californiensem respiciunt, non solum ad praescriptum Methodi *Eulerianae*, sed etiam Summo hoc Mathematico praesente et computum dirigente, sint instituti. Quodsi vero tertii generis errores, qui ex vitio computi originem ducunt, se proderent, quod quidem negare non audeo; fateor culpam eorum recte in me transferri.

3. Etiam si conuictus quidem sim correctiones observationum in Opere Collectionis Petropolitanae allatas, pro suppositionibus ibidem factis, plerasque satis recte se habere, tamen libenter concederem nonnullas aliquot secundis a vero aberrare posse, vel eam ob rationem quod in Methodo Illust. *Euleri* aliqua ad summam exactitudinem necessaria desiderentur. Supra enim Dis-

sert. praec. §. 11. ostendi, effectus Parallacticos ad praescriptum huius Methodi subductos, saepius correctionem quandam admittere, non sine metu erroris negligendam. Heic autem etiam observare convenit, valores pro effectibus parallacticis insignem subire mutationem ex correctione Longitudinis pro Venere, cuius quidem mutationis in Methodo Illust. Euleri nullus habitus est respectus.

4. De adplicatione Methodi Eulerianae tenendum est, eam vsque adeo non esse exactam, vt spectari possit correctiones observationum, inde cum praecisione maiori, quam trium aut quatuor secundorum deduci posse. Scilicet pro summa exactitudine obtinenda, necessum omnino erat vt angulus iste σ in Opere Collect. Petrop. (p. 344.) indeque deductus valor litterae r , exactius quam ibi factum est, computarentur. Angulus enim σ tantum in minutis primis ibi expressus habetur, quod quidem pro summa exactitudine quantitatis r non sufficere, examine instituto quivis facile deprehendet. Has autem notas circa Methodum Illust. Euleri adferendo, tantum abest, vt eam aliquo modo taxare velim; vt potius certo persuasus sim, leuioribus his correctionibus adplicatis, eam ad summum certitudinis gradum perducere posse. Nec metuendum mihi est, quod his observationibus Illustrissimum eius Auctorem offendam, cum meminerim Ipsum iam animaduertisse, aliqua in hac Ipsius Methodo ad summam perfectionem desiderari. Qua-

les.

Iescunque autem fuerint aberrationes, quae propter rationes iam allatas se produunt, certe quinque secunda temporis non excedent, infra autem videbimus Reu. Pat. *Hell* effectus adhibere parallaeticos ad 20^u errorneos.

5. His itaque praemonitis, nunc dispiciendum est, quid valeant argumenta Reu. Pat. *Hell*, quibus in Dissertatione sua a Pag. 9. vsque ad 32 demonstrare satagit, aut errores trium observationum pro computu externo in egressu: Cajaneburgensis, Hudsonsbayensis et Wardhusiensis in *Opere collectionis Petropol.* male esse definitos, aut differentias meridianorum non recte determinatas. Heic autem statim observare convenit, quod quum Reu. Pat. *Hell* directa ratiocinandi ratione vitium aliquod in Methodo *Euleriana* detegere non valuerit, indirectam ingressus sit viam ad eam labefactandam; quaerendo scilicet utrum conclusiones ex ea deductae inter se consentirent vel minus? Quamvis autem huiusmodi ratiocinandi modum pro vitioso habere non possimus, tamen concedendum esse existimamus, aequitatem et iustitiam postulare, ut nulla alia pro hoc examine ineundo in usum vocentur Elementa, quam quae adhibita fuere ab Auctore quem contradictionis reum esse, ostendere quis conatur. Contra hanc autem regulam peccare videtur Reu. Pat. *Hell*, dum effectus Parallaeticos a Cel. D. *Krafft* secundum formulas *ut dicitur Eulerianas* computatos adhibet, ad conclusiones *Illust. Euleri* vel meas *si placet* refutandas. Cum summa enim confidentia

affuerare audeo hos valores pro effectibus Parallacticis, a formulis *Eulerianis* insigniter discrepare. Id autem ne quis gratis dictum esse existimet, sequenti Tabula ob oculos ponam tam effectus Parallaeticos a *Cel. Krafft* inuentos, quam veros ex formulis *Eulerianis* deducendos, sub hypothesi Parallaxeos actualis 8", 6.

	Effectus Parallaetici <i>Cel. Krafft</i>	veri
Conf. cum	Pro Wardhus retardatio	+ 4'. 18" + 4'. 13", 4
P. 10.	Orenburg	+ 6. 1 + 5. 51, 9
Tract. R.	Gurjes	+ 6. 18 + 6. 9, 5
P. Holl.	Petropoli	+ 5. 9 + 4. 59, 6
	Caianeburg	+ 4. 51 + 4. 38, 1
	Arc. Princ. Walliae	- 54" - 51, 0

Quodsi vero his valoribus pro effectibus Parallaeticis in usum vocatis, comparatio instituatür observationis ad Sinum Hudsonis factae, cum Petropolitana, Wardhusensi, Orenburgensi et Gurjesensi, certe tales dissensus non prodibunt, quales *Reu. Pat. Hell* inuenit. De obseruatione autem Caianeburgensi separatim infra nobis agendum est.

I.

Arx. Pr. Walliae et Petropolis effect. Paral. respect.	+ 5'. 51"	Confer. cum Tra- stat P. <i>Hell</i> p. 11 et 12.
Obfer. pro Sin. Hudf. Cont. IV.	7 ^b . 19. 21	
	<hr/> 7. 25. 12	
Obfer. Petrop. correcta	15. 43. 30	
	<hr/> 8. 18. 18	
Differ. Merid.	8. 18. 18	
Petrop. a Paris.	1. 52. 3	
	<hr/> 6. 26. 15	
Arx. Pr. Walliae a Parisiis	6. 26. 15	

II.

Arx. Pr. Walliae et Wardhus effect. Paral. respect.	+ 5'. 4"	
Obfer. Sin. Hudf.	7 ^b . 19. 21	
	<hr/> 7. 24. 25	
Obfer. Wardh. corr.	15. 45. 50	
	<hr/> 8. 21. 25	
Differ. Merid.	8. 21. 25	
Wardhus a Paris.	1. 55. 8	
	<hr/> 6. 26. 17	
Arx. Pr. Walliae a Parisiis differ.	+ 2	

III.

Arx. Pr. Walliae et Orenb.	
effect. Paral. respect.	+ 6'.43"
Obser. ad Sin. Hudf.	7 ^b .19.21
	<hr/>
	7.26.4
Obser. Orenb. corr.	17.23.37
	<hr/>
Differ. Merid.	9.57.33
Orenb. a Parisiis	3.31.16
	<hr/>
Arx. Pr. Walliae a Parisiis	6.26.17
Differ.	+ 2

IV.

Arx. Princ. Walliae et Gurjes	
effect. Paral. respect.	+ 7'.1"
Obser. ad Sin. Hud.	7 ^b .19.21
	<hr/>
	7.26.22
Obseru. Gurjes. corr.	17.11.25
	<hr/>
Differ. Merid.	9.45.3
Gurjes. a Parisiis	3.18.47
	<hr/>
Arx. Prin. Walliae a Paris.	6.26.16
	+ 1

6. Quamvis hac ratione argumenta Reu. Pat. *Hell* perfecte refutantur, ingenue tamen fateamur nostra ratiocinia non valere ad consensum inter observationum momenta correcta probandum; scilicet probe notan-

notandum est correctiones obseruationum in opere Euleriano esse determinatas sub hypothesi Parallaxeos $\pi = 8'', 67$; quare in hoc examine eiusmodi effectus Parallaxici adhibendi sunt, qui huic hypothesi respondent. Neque enim correctiones obseruationum pro hypothesi Parallaxeos $8'', 6$ eadem perfecte prodeunt, ac pro $8'', 67$, ad quam circumstantiam nunquam attendere videtur Reu. Pat. *Hell*, dum correctiones obseruationum in *Opere Collect. Petropol.* allatas improbat, quia cum suis determinationibus pro hypothesi Parallaxeos $8'', 56$ non consentiunt. Retinendum porro non est, in *Opere collectionis Petropolit.* eodem loco quo correctiones obseruationum pro Arce Princ. Walliae adferuntur, etiam Longitudinem huius loci a Parisiis $4''$ esse auctam, et mirari omnino convenit Reu. Pat. *Hell*, qui tam studiose omnia conquisit, quibus conclusiones Eulerianas labefactare posset, ad hanc circumstantiam animum non aduertisse. Sub hypothesi igitur Parallaxeos $8'', 67$ et Longitudine Arcis Princ. Walliae a Parisiis assumpta $6^b. 26'. 19''$, concedendum omnino est, contactum externum pro hoc loco adoptatum, a reliquis obseruationibus vt supra correctis differre $- 6''$ vel $- 5''$, at simul contendendo augmentum istud pro Longitudine huius loci ibidem allatum, minus recte se habere, ob aberrationem in effectu Parallaxico computando commissam. Quod si igitur prius assumpta Longitudo pro Arce Princ. Walliae, quae erat $6^b. 26'. 15''$ retineatur; iam totus dissensus 2 secunda temporis non exsuperabit.

7. Videamus autem nunc quid de comparatione observationis Wardhusiensis cum Petropolitana, Gurfuensi et Orenburgensi statuendum sit;

I.

Conf. cum
P. 16. in
Dissertat.
P. *Hdl.*

Wardhus et Petropolis
effect. Paral. respect.
Observ. Wardh. corr.

+ 46^h
15. 45^h. 50

Observ. Petrop. corr.

15. 46. 36
15. 43. 30

Differ. Merid.
Petrop. a Parisiis

3. 6
1. 52. 3

Wardhus a Parisiis

1. 55. 9

II.

Wardhus et Orenburg
effect. Paral. respect.
Observ. Wardh. corr.

+ 1^h. 39^h
15^b. 45. 50

Observ. Orenb. corr.

15. 47. 29
17. 23. 37

Differ. Merid.
Longit. Orenb.

1. 36. 8
3. 31. 16

Wardhus a Parisiis

1. 55. 8

III.

III.

Wardhus et Gurjes	
effect. Paral. respect.	+ 1'. 56"
Obſeru. Wardh. corr.	15°. 45. 50
	<hr/>
	15. 47. 46
Obſeru. Gurjes. corr.	17. 11. 25
	<hr/>
Differ. Merid.	1. 23. 39
Longit. Gurjes.	3. 18. 47
	<hr/>
Wardhus a Pariſ.	1. 55. 8

Patet igitur correctionem obſervationis Wardhufianae, cum correctionibus reliquarum bene conciliari, ideoque falſas eſſe concluſiones, quas P. *Hell* p. 17 ſui Opuſculi adfert. Imprimis autem heic obſervare iuvat, quod Parallaxi adoptata 8", 6 et adhibendo obſervationem pro Wardhus incorrectam nequaquam inueniatur correctio obſervationis pro Sinu Hudſonis vsque ad 13" aſſurgens.

Wardhus et Hudſons Bay	
effect. Paral. respect.	- 5'. 4"
Obſeru. Wardhuſ. incorr.	15. 45. 44
	<hr/>
Obſ. ad. Sin. Hudſ. ex	15. 40. 40
mente P. <i>Hell</i> correctâ	7. 19. 8
	<hr/>
Differ. Meridian.	8. 21. 32
Sinus Hudſ. a Pariſ.	6. 26. 16
	<hr/>
Wardhus a Pariſiſ	1. 55. 16

Vid. p. 17.
apud
P. *Hell*

Ex comparatione autem observationis Wardhusiensis cum illa ad Sinum Hudsonis facta, Reu. Pat. *Hell* suspicio quam maxime oriri debuisset, valores pro effectibus Parallaxicis a Cel. *Krafft* allatos, minus recte se habere. Si enim assumatur hypothesis parallaxeos $8''$, 56 et Longitudo Arcis Princ. Walliae ad mentem P. *Hell* a Parisiis statuatur 6^b , $26'$, $23''$, correctio contactus ultimi ad Sinum Hudsonis obseruati erit $-11''$, si obseruatio Wardhusiensis pro contactu externo omnino exacta habeatur; hinc ergo facile colligere licuit, eandem fere correctionem prodire non posse, si parallaxis statuatur $8''$, 6 et Longitudo Arcis Princ. Walliae a Parisiis 6^b , $26'$, $16''$. Nam differentia inter effectus parallaxeos respectiuos, sub hypothesebus Parallaxeos $8''$, 56 et $8''$, 60 , minutum secundum non excedit, cum tamen inter Longitudines pro Arce Principis Walliae adoptatas sit discrepantia 7 secundorum. Reu. Pat. *Hell* igitur obtestamur, ut ostendere velit, quomodo haec inter se conciliari queant. Caeterum ex infra dicendis patebit Longitudinem Arcis Princ. Walliae a Wardhus contra omnem probabilitatem statui 6^b , $26'$, $23''$, ita ut determinatio Reu. Pat. *Hell* nullo sensu ab errore liberari queat.

8. Ex iis quae de falsis valoribus effectuum parallacticorum iam monuimus, sequentes conclusiones deducere licet: I°. calculos R. Pat. *Hell* p. 19. Desert. de Parallaxi allatos, a veritate deflectere. II°. Com-

Comparationem observationis Wardhusiensis cum Petropolitana, Orenburgensi et Guriefuensi p. 23 ad minus exactas deducere conclusiones, III^o. conclusionem p. 25 allatam de erroribus observationum Wardhusiensis et ad Sinum Hudsonis factae, manifesto esse falsam, et comparationes observationis Hudsonsbayensis cum reliquis p. p. 25 et 26 institutas, maxime esse erroneas.

9. Nunc igitur ad principale momentum censurae Reu. P. *Hell* accedamus, quo scilicet ostendere annitur errorem observationis Caianenburgensis pro contactu externo esse 35 sec., adeoque triplo fere maiorem, ea, quae in *Opere Collectionis Petropolitanae* assumitur. Heic autem statim Reu. Pat. *Hell* concedere debemus, pro assumpta Longitudine Caianenburgi 1^b. 41'. 53", correctionem contactus ultimi ibidem observati prodire, quae ultra 30" increseit, at simul tamen certissimum est, correctionem Longitudinis pro Caianeburgo, quae in *Opere Collect. Petropolit.* p. 538 adfertur, falsam esse et omnino directe contrariam illi, quae inserviret errori observationis Caianenburgensis deprimendo. Propositum scilicet Illust. *Eulero* fuit eiusmodi adhibere correctionem Longitudinis Caianenburgicae, qua errores observationum in Caianeburg factarum, per utrumque contactum aequaliter distribuerentur, atqui iam patet augendo Longitudinem istam id fieri non posse; quum hinc omnino potior error in contactum externum deriuetur, patet igitur

ex mente Illust. *Euleri* Longitudinem huius loci potius fuisse minuendam. Ne autem Reu. Pat. *Hell* credat imaginaria et ficta esse, quae iam attuli, ipsum erroris fontem detegam: Notum est in *Opere Coll Petrop.* pro transitu Veneris, longitudinem veram alicuius loci a Parisiis, huiusmodi expressione designari $L - \theta$, designante L longitudinis quantitatem observatam vel assumptam et θ correctionem, quam forsitan admittere poterit. Correctio autem haec signum heic adipiscitur negativum, ut in aequationibus finalibus eius coëfficiens idem quoque recipiat signum, ac correctio Longitudinis Veneris Geocentricae x . At re attente examinata, liquet hoc tantum valere pro locis a Parisiis versus Occidentem sitis, cum pro Orientalibus statui debuisset longitudo vera $= L + \theta$. Vel etiam si longitudinem ut antea exprimere velimus per $L - \theta$, necessum est, ut in aequationibus finalibus θ signum adipiscatur contrarium illi, quo x indigitatur, hoc si ad casum praesentem applicetur, habebimus has duas aequationes.

$$\text{II. } 0 = 0,031 - 0,051(\theta - \tau);$$

$$\text{IV. } 0 = 1,292 - 0,054(\theta - \tau)$$

ideoque si statuatur $\theta = +13$, fiet pro secunda aequatione $\tau = +12$ et pro quarta $\tau = -13$, Longitudo igitur Caianeburgensis sic fiet

$$= L - \theta = 1^{\text{h}}.41^{\text{m}}.40^{\text{s}} - 13'' = 1^{\text{h}}.41^{\text{m}}.27^{\text{s}}.$$

Superfluum autem foret hoc loco ostendere, quod Longitudine Caianeburgi $13''$ imminuta, valor correctionis nostrae pro observatione allatus, vix plus quam quin-

quinque secundis esse possit erroneus. Nam ex mea quidem sententia, Longitudo pro Caianeburg assumpta $1^b. 41' 40''$ satis exacta videtur, quodsi autem aliquo modo immutari debeat, multo probabilius est, ut haec correctio sit diminutiva, quam additiva. Scilicet notum est Cel. *Planman* qui priorem transitum Veneris A. 1761. in Caianeburg obseruavit, ex observatione Eclipsis Lunaribus, nonnullis Eclipsibus Satellitum Iouis, et Eclipsi Solari ibidem obseruatis, inuenisse Longitudinem huius loci a Parisiis $1^b. 41' 33''$, quae ab assumpta $1^b. 41' 40''$, septem secundis deficit. Contendit autem ipse R. Pat. *Hell* conclusiones pro differentia meridianorum ex Eclipsibus Satellitum Iouis et Eclipsibus Lunaribus deductas, certiores esse iis, quae ex observationibus Eclipsium Solis deducuntur, quum igitur ex Eclipsi Solis A. 1769. inuenierim Longitudinem Caianeburgi $1^b. 41' 41''$ (Vid. Tom. XV. Nou. Comment. Acad. Scient. Petropi) ex mente P. *Hell* omnino statuendum est, probabilius esse ut Longitudo Caianeburgensis minuatur, quam augeatur. At tamen facile praevideamus, quid R. Pat. *Hell* haec responsionis loco adferre possit, nimirum optimam et certissimam determinationem pro differentia meridianorum ex ipso transitu Veneris deduci, quam ob rem statim observamus ex transitu Veneris nequaquam demonstrari posse Longitudinem Caianeburgi a Parisiis esse $1^b. 41' 57''$, nisi assumatur observationem R. Pat. *Hell* pro contactu interno circa ingressum esse exactam. In Dissertatione autem nostra superiori

6. 23. rationes satis evidentes allatae sunt, quae observationem istam Wardhusiensem dubiam reddunt. Quodsi vero euictum plane foret R. Pat. *Hell* circa hunc contactum ne vno quidem minuto secundo a vero aberrasse; tamen multo maiori cum probabilitate statui deberet observationem Cel. *Planman* pro contactu interno esse erroneam, quam quod Longitudo Caianeburgi $1^b. 41'. 41''$ integris 16 secundis esset augenda. Quicquid autem ea de re sit, publice nunc declaro, me nunquam in ea fuisse sententia, quod Longitudo pro Caianeburg sit $1^b. 41'. 53''$, quippe quam iusto maiorem esse semper persuasus fui, proinde Reu. Pat. *Hell* nullum pondus pro sua determinatione erroris commisi circa contactum externum in Caianeburg observatum, ex meo suffragio petere posse.

10. Nunc igitur intelligitur, omnia ea ratiocina prorsus labefactari, quibus Reu. Pat. *Hell* posita Longitudine Caianeburgi $1^b. 41'. 53''$, demonstrare vult, observationem contactus externi in isto loco factam usque ad $35''$ esse erroneam. Quamvis enim non possim non concedere, quod haec observatio a veritate aliquantum aberraret, ita tamen mihi persuasum habeo eius aberrationem ultra 15 aut 16 secunda augeri non debere, ipsis scilicet observationibus in Wardhus factis pro basi comparationis adhibitis. Supponamus nimirum cum Reu. Pat. *Hell* parallaxin Solis actualem fuisse $8''$, 56, Longitudinem vero Caianeburgi, uti eam ex Eclipsi Solis deduxi $1^b. 41'. 41''$.
Com-

Comparatio inter obseruat. Wardhusienses et Caianeburgensem pro contactu externo.

effect. Par. respect.	+ 25"	effect. Par. respect.	+ 3"	Conf. cum
Cont. IV. Wardh.	15 ^b .45 ^l .44"	Cont. III. Wardh	15 ^b .27 ^l .25"	p. p. 23 et
		mora. diam. ♀	18.42	36 in Op.
				P. Hell.
Cont. IV. Caian.	15.46.9		15.46.10	
	15.32.27	Cont. IV. Caian.	15.32.27	
Diff. Merid.	13.42	Diff. Merid.	13.43	
Caianeb. a Paris.	1.41.41	Caianeb. a Paris.	1.41.41	
Wardhus a Paris.	1.55.23	Wardh. a Paris.	1.55.24	
at est	1.55.8	at est	1.55.8	
Error	+ 15	Error	+ 16	

II. Quae itaque nunc allata sunt, sufficere poterunt ad ostendendum verum et quo respectu R. Pat. *Hell* per bina sua Examina in Dissertatione Ipsius a pag. 9 ad 32 allata, probatum facere valuerit, conclusiones in *Opere Collectionis Petropolitanae* inuentas, minus recte se habere. Namque hoc Ipsi facile largimur, Longitudinem Caianeburgi absque omni ratione immo contra verum scopum praefixum esse auctam. Concedimus quoque Ipsi, effectus parallaxicos pro Sinu Hudsonis cum summa praecisione non esse definitos, vnde fieri potest vt correctio vltimae obseruationis sub hypothesi Parallaxeos actualis tempore transitus 8", 67 aliquot secundis sit erronea; simul
autem

autem demonstrauimus, quod supposita etiam parallaxi $8''$, 6 et obseruatione Wardhusiensis pro contactu externo incorrecta, dissensus huius obseruationis ab illa ad Sinum Hudsonis facta nequaquam ad $13''$ increseat, unde perspicuum fit Rev. Pat. *Hell* dum aliorum naeuos corrigere studet, multo grauioribus semet obnoxium reddere. In genere autem quae hic de certitudine conclusionum in Opere *Euleriano* allatum adducta sunt, tantum sub ea hypothesi a me affirmantur, qua parallaxis Solis statuitur $8''$, 67 pro transitu Anni 1769, praetereaue Longitudines locorum ita assignantur quales in Opere isto occurrunt. Scilicet nunc quidem nullum est dubium, quin valor Parallaxeos multo sit minor, pro Longitudinibus autem locorum imprimis Caianeburg, Orenburg et Gurfes alios ex computo Eclipses Solis deduxi valores, quos quum iam in Dissertatione praecedenti recensuerim, eos heic denuo repetere minus erit necesse.

12. Ad ea quae Rev. Pat. *Hell* de correctionibus obseruationum in California institutarum a me adhibitis, p. 59. suae dissertationis adfert, facillima omnino est responsio. 1°. Considerandum est correctiones obseruationum Californiae factarum a me esse definitas sub hypothesi, quae ab ea quam Pat. *Hell* adoptauit longe diuersa est, namque in *Opere collectionis Petropolitanae* non solum valor Parallaxeos, sed etiam quantitates diametri Solis et Latitudinis Veneris Geocentricae multo aliter definiuntur ac a P. *Hell* factum

factum est. Quodsi vero Rev. Pat. *Hell* sibi persua-
deat, diuersitatem huiusmodi elementorum pro cor-
rectionibus observationum diuersos valores producere
non posse, egregie fallitur. II°. Errores observatio-
num pro California a P. *Hell* ex ea definiuntur
hypothesi, quod observationes in Wardhus factae so-
lae pro exactis sint habendae, quod quidem an aliis
persuadere possit nescio, mihi quidem adhuc persuaderi
non potuit. Interim agnosco in recensendis erroribus
pro California, signorum factam a me esse permuta-
tionem, ita ut pro contactu II°. error suppositus sit
 $+ 4''$, qui esse debebat $- 4''$, contra vero pro con-
tactu III°. error exhibitus sit $- 4''$, quem esse oport-
ebat $+ 4''$. Ineptissima autem hoc loco est censura
R. Pat. *Hell*, nam si adhiberentur momenta pro
St. Iosepho correctae uti pag. 556. *Oper. Collect. Petrop.*
praecipitur, habebitur duratio Geocentrica $5^b. 42'. 6''$,
quae ex observationibus Wardhusiensibus prodit $5^b.$
 $42'. 4''$, ponendo $\pi = 8'', 62$, qui dissensus nullius
esset momenti. At uti iam dixi certum est, in cor-
rectionibus pro St. Iosepho signorum factam esse per-
mutationem, ideoque consensus iste, qui Pat. *Hell* tan-
topere displicuit, omnino sublatus est.

13. Ex iis quae in Dissertatione praecedenti
disputata sunt, satis patere arbitror, quid sentiendum
sit, de assertionem Rev. Pat. *Hell* dum Pag. 76. disser-
tationis suae contendit, quod momento pro contactu
interno Parisiis a Celeb. *Duféjour* observato 12 secun-
M dorum

dorum correctionem et quidem diminutivum adplicare debuissim. Si enim P. *Hell* demonstrare valeat, se prae reliquis etiam exercitatissimis Astronomis infallibilitatis quadam praerogativa esse instructum; me in gravissimo errore versatum fuisse, fateri omnino paratus sum. Circa ipsam vero argumentandi rationem a P. *Hell* in usum vocatam, id tantum observare licet, quod omnes istae comparationes p. p. 73, 74, 75 in Opere Ipsius inter observationes Americanas et Parisinas institutae, magis non demonstrent, quam unica comparatio observationum Parisiensium cum Wardhusiensis. Si enim exactitudo observationis Wardhusiensis in dubium vocetur, non solum correctiones observationum in America factarum, sed etiam Longitudines pro locis Americanis a Pat. *Hell* stabilitae, insignes subire poterunt mutationes. Quare huiusmodi argumentis, imperitis quidem fucum facere poterit, eos autem qui lucem a tenebris dignoscere norunt, nunquam decipiet. Si ad ea, quae in §. praecedente monui attendatur, facile quoque liquet, quid reponere debeamus, contra notationem Rev. Pat. *Hell*, qua contendit correctiones observationum in Kola factarum a me falso esse definitas, ex quo infert: *huiusmodi augmenta errorum indicium praebere, in usu Methodi quidpiam vitii irrefisse*. Dissimulandum autem mihi non est, correctiones observationum a Cel. *Rumovski* factarum aliquot secundis imminuendas fuisse, utrum vero huiusmodi aberratio ex perversa adplicatione Methodi deducenda sit, aequis rerum iudiciis diindi-

djudicandum relinquo. Agnosco Reu. Pat. *Hell* egregia in *Astronomiam Practicam* merita, tantum tamen ipsius auctoritati non tribuo, vt crederem eius iudicio standum esse, dum quaeritur virum bene an male Methodum *Eulerianam* adplicuerim. Examinemus vero quid de consensu obseruationum Kolenium cum Wardhusiensibus in Opere P. *Hell* p. 81 et sequ. deprædicato, sentiendum sit. Calculum autem consimili ratione ac P. *Hell* instituiam, nisi quod loco obseruationum in Insula Regis Georgii factarum, heic ipsas Wardhusienses in vsum vocare placet.

Kola	Wardhus	
Cont. I. inter. $9^b.42'.2''$, eff. Paral. + 6.33, 6	Cont. I. inter. $9^b.34'.11''$, eff. Paral. + 6.31, 6	Conf. cum p. 82. in Oper. P. <i>Hell</i> .
Cont. II. int. 15.35.19. eff. Paral. - 4.43, 2	Cont. II. int. 15.27.25, eff. Paral. - 4.34, 1	
Durat. Geoc. $5^b.42'.0''$	Durat. Geoc. $5^b.42'.8''$	

Sub hypothesis igitur Parallaxeos $8''$, 56 et concessio quod in obseruationibus Wardhusiensibus nullum sit vitium, erit error totalis pro obseruatione in Kola $8''$. Liqueat igitur falsa esse, quæ inuenit P. *Hell* p. p. 82 et 83 sui Op., ratio autem totius erroris in calculo P. *Hell* commissi in eo sita est, quod pro II. Contactu interno in Kola erroneum nimis adhibuerit valorem effectus Parallactici, quem statuit esse $-4'.25''$, cum reuera sit $-4'.43''$. Erroneum et falsum hunc effectum Parallacticum $-4'.28''$ esse contendo, immo Reu. Pat. *Hell* prouoco, vt demonstret eum rite se

habere, quodsi praestare non potuerit, agnoscere debet, *se circa adplicationem Methodi Cel. de la Lande gravissimis implicuisse erroribus.*

14. Vtrum ex opinione Reu. Pat. *Hell*, quam p. p. 90 et 91 sui Tractatus profert, pro observationibus Wardhusiensibus et Caieneburgicis inter se conciliandis, totus error in his posterioribus quaeri debuisset, ex iis quae et in Dissertatione praecedenti et in hac praesenti iam fustus disputata sunt, facile iudicari poterit. Quum enim euidenter a me probatum sit, observationem R. P. *Hell* pro contactu interno in ingressu, a reliquis observationibus circa hunc contactum in Europa factis, per medium 14 secundis differre; nihil quidem probabilius videtur, quam ut error huius observationis in Opere *Euleriano* allatus, qui tantum est 11", iusto maior non sit. Quod secundum contactum internum a P. *Hell* observatum attinet, ipse iam concedit verum momentum huius contactus statuendum esse $15^b.27'.25''$ loco $15^b.27'.36''$ a me assumti, ideoque de errore huius observationis nulla amplius inter nos versatur controuersia, vtrum autem recte fecerim vel minus, dum momentum istud $15^b.27'.36''$ pro contactu interno in egressu a P. *Hell* observato habuerim, infra pluribus exponam? In tota autem hac disceptatione, uti saepius observaui Reu. P. *Hell* ad ipsum quaestionis statum nonquam attendit, id enim si fecisset, obscurum ipsi esse non potuisset determinationes in Opere Collectionis *Petrobokianae* allatas

tas, saltem proximo: esse veras. Observationum enim correctiones ibidem definiuntur, sub certa hypothesi Parallaxeos actualis et caeterorum Elementorum Astro-
nomicorum; quod si igitur haec hypothesi immutetur, nullum est dubium, quin correctiones observationum multo aliter determinandae sint. Sufficiet igitur heic ostendere, correctiones observationum Wardhusiensium cum illis pro Sinu Hudsonis non pugnare, quod certissimo est indicio, saltem ex via: Methodi insignem aberrationem non esse metuendam, quemadmodum innuere videtur R. P. *Hell*. Habentur igitur effectus parallactici, sub hypothesi Parallaxeos actualis 8^h, 67.

Pro Sinu Hudsonis		Pro Wardhus		
Cont. II.	+ 4', 15", 5	Cont. II.	+ 6', 36", 6	
III	+ 39, 9	III.	- 4', 37, 6	
IV.	+ 51, 4	IV.	- 4' 15, 5	
Observat. pro Sinu Hudsonis correctae		Observat. pro Wardhus incor- rectae		
II.	1 ^b . 15'. 24"	Durat. int. cont.	II. 9 ^b . 34'. 11"	Durat. int. cont.
III.	7. 0. 47	5 ^b . 45'. 23"	III. 15. 27. 36	5 ^b . 53'. 25"
IV.	7. 19. 21	6. 3. 57	IV. 15. 45. 44	6. 11. 33
Hinc duratio Geocent. inter cont. II. et III.		Durat. Geocent. inter cont. II. et IV.		
ex Sinu Hudsonis	5 ^b . 41'. 47"	ex Sinu Hudsonis	6 ^b . 0'. 33"	
ex Wardhus	5. 42. 11	ex Wardhus	6. 0. 41	
Error Wardh.	+ 24	Error Wardh.	+ 8"	

Iam ipso Pat. *Hell* concedente, contactus III corrigi debet 11 secundis, erit ergo error cont. II Wardhusiensis — 13'', si ex his 13'' subtrahatur error totalis 8'' pro duratione inter cont. III et IV, fiet error contactus IV Wardhusiensis + 5''. Hypothetice quidem haec omnia definiuntur, supponendo observationem ad Sinum Hudsonis esse exactam, quae tamen hypothesis probabilior multo videtur ea, qua observationes Wardhusienses, ut prorsus exactae spectantur. Ideoque facile nunc diiudicare quisque potest, quo in pretio sint habenda, quae in Opere *Euleriano* de erroribus observationum Wardhusiensium proponuntur, saltem audacter asserere possum, correctionem pro contactu interno in ingressu nequaquam nimis esse auctam.

15. Non dubito, quin haec et reliqua argumenta antea allata parum valeant ad convincendum Rev. Pat. *Hell*, quod in observatione Fius aliquis lateat error, imprimis talis, qui ad 15 secunda increveret, conf. Opus Eius p. 40. et 56 (a), scilicet

- (a) Vtunque exercitatus observator sit Rev. Pat. *Hell*, tamen fateri cogetur, se aliquando errorem non solum 16 secundorum, sed multo maiorem commisisse. Exemplum autem statim adferre placet. Si ex initio Eclipsis in Wardhus Temp. vero 21^b. 22'. 47'' observato et ad mentem Rev. Pat. *Hell* per quinque secunda correcto, exquiratur tempus coniunctionis Solis et Lunae, invenitur idem contigisse T. vero 22^b. 26'. 23'', at ex fine eclipsis ibidem exacte observato hoc tempus coniunctionis elicitur 22^b. 25'. 55'', differt igitur conclusio ex initio deducta, ab ea quam finis praebet 28''.

cet iam sibi persuadere coepit, singulare providentiae diuinae esse decretum, quod contra omnium reliquorum Astronomorum etiam exercitissimorum fidem, is solus vtrumque contactum internum bene et exacte obseruauerit; nam si Eius obseruatio sola sit exacta; necessum est vt ii Astronomi, qui Londini, Grenouici, Parisiis, Stockholmiae et Vpsaliae contactum internum Veneris pro ingressu obseruauerunt, in errore fuerint 10, 15 immo 20 secundorum, quales tamen errores nemo facile admiserit. Vid. Opus P. *Hell* p. 40. Obseruatio scilicet Wardhusiensis differt

ab

Si vel maxime adhuc Pat. *Hell* concedere vellem, obseruationem initii 12'' propter diuersitatem effectus tuborum, corrigendam esse, licet hoc minime probabile videatur; remanet tamen in obseruatione initii error 16 secundorum. Hinc vero intelligitur, quo loco habenda sint ea, quae Pat. *Hell* in Dissertatione sua de Obseruatione Wardhusiis facta p. 35. adfert, scilicet ex momento initii obseruato 21^b. 22'. 47'', tempus coniunctionis supputari 22^b. 25'. 44'', quod tantum duobus secundis differt ab eo, quod finis Eclipsos Ipsi praebuit. Provocho igitur Reu. Pat. *Hell* vt hoc suum assertum demonstraret, si valeat. Sin minus ego contra demonstrabo, nec momentum initii obseruatum 21^b. 22'. 47'', nec momentum correctum a me adhibitum 21^b. 22'. 42'', nec denique noua correctione ex mente Pat. *Hell* emendatum 21^b. 22'. 30'', idem praebere posse tempus coniunctionis ac finem Eclipsos a Pat. *Hell* obseruatum, Hoc autem demonstrabo locum habere, non solum si verae correctiones Elementorum Astronomicorum in Tomo XV. Nouor. Comment. Acad. Petropolit. a me inuenta adhibeantur, sed etiam si correctio Latitudinis a Reu. Pat. *Hell* assumta, in usum vocetur.

ab ea Cel. *Maskeſyne* 9^h, ab obſervationibus Cel. *Duſſejour* et *Meſſier* 14^h circiter, ab obſervationibus Cell. *Caffini* et *Maraldi* viginti fere ſecundis, denique ab obſervationibus Cell. *Wargemin*, *Ferner*, *Wilke*, *Mejander*, *Bergman*, *Proſperin* circiter 18^h. Quicquid autem contra Rev. Pat. *Hell* adferri poſſet argumenti, deſumptum ab experientia horum Virorum, eorum in obſervando industria et fide, eorum ſatis unanimi conſenſu ad obſervationem Wardhuſienſem condemnandam, id omne, Pat. *Hell* Herculeo plane argumento retundit et reſellit inde petito, quod Ipi ſoli, *prorſus ſingulari et mirabili diuinæ Prouidentiae diſpoſitione datum ſit*, virumque contactum internum bene et *praeſciſe obſervare*. Libenter Ipi permittimus, ut ſe quantum lubuerit hac perſuaſione delectet, multum tamen dubitamus, an hoc et reliquis Angliae, Galliae et Sueciae Aſtronomis, quorum obſervationes pro contactu interno in ingreſſu erroris arguit, perſuadere queat. Vtunque enim anxie aſſenſum reliquorum Aſtronomorum (confer. pp. 94. et 113. Op. *Hellian.*) ſibi expetat; mihi tamen certiffime perſpectum habeo, plurimos Aſtronomos in ea eſſe ſententia, et aliquem latere errorem in obſervatione Rev. Pat. *Hell*, et imprudenter Eum minusque caute ſeciſſe, quod tam diu diſtulerit obſervationem ſuam euulgare; quo ipſo apud nonnullos in ſuſpicionem venit haec obſervatio, quod conſicta ſit et ad aliarum exemplum expreſſa. Quod tamen haec ſuſpicio et iniuſta ſit, et omni veritatis ſpecie deſtituatur, omnes illi Aſtronomi

nomi de quibus iam loquor, agnoscunt, quorum sententiae ego quoque lubenter adstipulor.

16. Postquam itaque examinata sint argumenta, quae Reu. Pat. *Hell* aduersus conclusiones in *Opere collectionis Petropolit.* allatas proponit, sequitur ut crimina quaedam ab Ipso mihi imputata diluam, quae ne ullam quidem veritatis speciem prae se ferunt. Huiusmodi est quod p. 44. Operis sui proponit, vbi me errasse contendit, quod pro contactu secundo interno Wardhusii sumserim momentum $15^b. 27'. 36''$, cum sumere debuissim $15^b. 27'. 25''$. Non diffiteor momentum hoc $15^b. 27'. 25''$ pro contactu interno in egressu esse habendum, neque de eo quaestio iam instituitur, sed disquiri debet vtrum ex mente R. Pat. *Hell*, quam in Dissertatione sua de Obseruatione in Wardhus facta satis euidenter proposuit, momentum istud $15^b. 27'. 36''$ pro contactu interno in egressu assumere debuerim. Quodsi enim probatum reddere valeam, Reu. Pat. *Hell* hoc momentum pro contactu interno habuisse, profecto patebit hunc errorem mihi iniuste esse imputatum, immo eum in Ipsum Pat. *Hell* solum deriuari. Sub examen itaque nobis reuocanda sunt, quae in Dissertatione modo laudata a R. Pat. *Hell* de contactu hoc proponuntur. Primum igitur ex iis quae pag. 51. 59. et 60 differuntur, satis euidenter patet, quod Ipsi sententia fuerit, pro contactu interno in egressu non nisi vnicum assignari posse momentum, illudque contigisse quando filum lucidum limbi Solis disparuit, idemque cum praecissione

vnius secundi a se obseruatum fuisse, quod denique momentum contactum internum opticum in egressu vocat. Verba etenim Ipsius pag. 59. ita habent:

*Modus quippe egressum Veneris obseruandi non nisi vnicus isque certissimus et omnibus obseruatoribus communis est, atque hinc vox contactus in egressu Veneris tam interiore, quam exteriori dubia et amphibologica esse nequit. Etenim cum contactus interior opticus in egressu Veneris eo momento ab omnibus Obseruatoribus fieri censeatur, et omnino est, quo discus Veneris obscurus in disco Solis visibilis ita limbo Solis lucido iungitur, vt ex parte limbi obscuri Veneris nullum amplius filum lucidum limbi Solaris appareat, hoc est quando filum lucidum limbi Solaris disparet etc. et pag. 60: mihi ob fauentes coeli circumstantias contactus iste adeo momentaneus visus est, vt de vnus Secundi exactitudine dubitare non potuerim. Cum his autem nunc allatis verbis conferantur ea, quibus P. Hell ipsum hunc contactum in Dissertat. ista recenset. P. 76 verba Eius ita iacent: Gutta haec momentanee disparet et veluti diffluit limbusque Solis et Veneris in vnum confluunt atque adeo fit contactus interior opticus Temp. horol. 15^b. 26^l. 17. Hic contactus interior mihi adeo momentaneus visus est, vt de uno secundo temporis nullum mihi dubium superfuerit. Pag. 79 verba haec p. 76. allata denuo reperuntur, et tempus verum huius contactus interni statuitur 15^b. 26^l. 35^{ll}, 6. Ad calcem autem eiusdem Paginae affirmatur, D. Borgrewing pro diuerso effectū Tu-
borum*

borum contactum internum citius videre debuiffe quam Pat. *Hell* et *Sainouics*. Pag. denique 80 mora diametri Veneris in egressu statuitur 18'. 7'', 8, quae subsistere non posset, si Pat. *Hell* pro contactu interno in egressu habuisset 15^b. 27'. 25''; porro a contactu sic dicto interiore in ingressu, ad contactum interiorem in egressu praeterlapsum dicitur tempus 5^b. 53'. 31'' et a momento dum filum lucidum apparuit ad contactum interiorem in egressu 5^b. 53'. 25''; ex quibus omnibus satis perspicuum fit, Reu. Pat. *Hell* per contactum interiorem in egressu intellexisse momentum 15^b. 27'. 35'', 6. Quicumque a partium studio alienus fuerit, dum haec inter se conferet, fateri cogetur Reu. Pat. *Hell* eo tempore, quo Observationem Wardhusiensem euulgauit, pro contactu interiore in egressu non agnouisse nisi vnicum momentum et euidenter Eum contendere, quod hoc momentum ab Ipso ad praecisionem vnus secundi observatum sit Temp. Pend. 15^b. 26'. 17'', ideoque Temp. vero 15^b. 27'. 35'', 6. Confiteor igitur me errasse dum pro contactu interiori hoc momentum 15^b. 26'. 36'', prae altero 15^b. 27'. 25'' selegerim; sed erravi auctoritate et iudicio Reu. Pat. *Hell* innixus, is Ipse mihi ad hunc errorem committendum monitor et praemonstrator fuit (b). Videtur autem Vir Celeb.

N 2

in

(b) Praeterea vt tanto magis appareat, ex verbis Reu. Pat. *Hell* nullum alium sensum exculpi posse, quam cum quem

in Dissertatione de Parallaxi Solis omnino oblitus fuisse eorum, quae in expositione observationis Wardhusiensis docuit, alias enim adeo manifestam committere non potuisset contradictionem; nam in Tractatu de de Parallaxi Solis statuit momentum quo gutta nigra inter limbum Solis et Veneris formabatur improprie dici contactum opticum pro egressu, cum in priori dissertatione apertis verbis dixerat, pro egressu sensum vocis contactus [non esse amphibologicum, nec nisi unicum dari obseruandi modum, immo pro contactu optico in egressu habendum esse momentum, quo limbi Solis et Veneris in unum confluerunt, et quod ad praecisionem vnus Secundi obseruauit. Confer: p. p. 59, 60, 76, 79, 80. Dissert. de Obseruat. Wardhusiensis.

17. Alterum crimen aequè iniuste mihi imputatum, in eo consistit, quod ab usu definiendae Parallaxeos observationem Wardhusiensem penitus secluse-
rim

quem iam exposui, adferre placet testimonia aliorum Auctorum. In Dissertatione Cel. de la Lande de Parallaxi Pag. 16. haec legimus: *Mais le P. Hell prout choisir le moment où cette goutte s'étant étendue, les limbes de Venus et du Soleil se réunirent en un seul, ce qu'il appelle le vrai contact optique, qu'il juge être certain à une seconde, et qu'il observa à 15^h. 27'. 35'', 6.* In Actis Academiae Scientiar. Stockholmiensis pro An. 1770. Trimestri primo, Cel. *Wargentin* refert initium emissionis Wardhusis obseruatum fuisse 15^h. 27'. 36^{''}.

rim vid. p. 107 Oper. *Hell*. Nam necessum omnino est, ut aut Reu. Pat. *Hell Opus Collectionis Petropolit.* cum attentione non legerit, aut admodum fallaci memoria sit praeditus, dum huiusmodi assertum in medium profert. Igitur Cel. Virum qua par est humanitate rogo et obtestor, velit *Collection. Petropolit.* paginas 475 et 531 consulere, quo facto certo convincetur pro determinanda Parallaxi observationes Wardhusiensis aequae ac reliquas in usum vocatas fuisse. Immo ex mea Dissertatione de Parallaxi Solis quae Tomo XVI. Nouor. Comment. Acad. Scient. Petrop. inserta est, ioueniet pluribus in locis observationis Wardhusiensis usum factum esse. Facili tamen coniectura assequi licet, P. *Hell* aegre tulisse, quod ausi fuerimus observationes Wardhusiensis errorum inculpare, inde igitur tota huius accusationis ratio est deriuanda. Scilicet in eo meum peccatum consistit, quod observationem Reu. P. *Hell* pro indubitata non habuerim, supra autem iam explicauimus, id nulla cum probabilitate a me fieri potuisse; quin etiam nunc fateor observationem Wardhusiensem pro contactu interno in ingressu tamdiu a me pro minus exacta haberi, donec R. Pat. *Hell* certe comprobare valuerit, aut sufficientem exhiberi posse rationem, ex qua colligere licet, reliquas huius contactus observationes, Londini, Grenonici, Parisiis, Stockholmiae et Upsaliae factas grauissimis obnoxias esse erroribus, aut suam observationem cum caeteris conciliari posse. Quod si posterius admittere velit, suam observationem ex causa

cum Cel. *Wargentin* conciliari posse, aequum sane est, ut eandem conciliandi rationem pro observationibus Parisinis admittat, quas igitur ab errore cuius eas inculpauit, liberare coetur. Animum autem ad vindictam proniorem apud Reu. Pat. *Hell* prodere videtur, quod quum a Cel. *de la Lande* iniuriam se accepisse putet, odium suum ad plerosque Galliae Astronomos extendat, cuius rei euidentissima omnino indicia habentur ea, quae de erroribus observationum Parisiensium et Cel. *de Chappe* protulit.

18. Quae pag. 4. Tractatus Reu. Pat. *Hell*, de methodo et calculis Illust. *Euleri* asseruntur omnino recte se habent, ab vltima si discesseris Periodo. Nam tenendum est, comparationem observationis super insula R. Georgii cum reliquis a me institutam, non praebuisse valorem Parallaxeos in distantia media $8''$, 82 quemadmodum hec refert Pat. *Hell*; scilicet inveni Parallaxin pro die 3 Junii 1769. $8''$, 55, ideoque valorem parallaxeos pro distantia media $8''$, 68. Scio equidem Pat. *Hell* ad suam excusationem dicere posse, quod calculos meos non viderit, sed quod Ipsi iudicium fundetur in iis, quae adfert Cel. *de la Lande* in Dissertatione sua de transitu Veneris p. 40. At ex ipso hoc loco Cel. *de la Lande* satis euidenter patet, dum de parallaxi $8''$, 68 loquitur, eum intelligere parallaxin distantiae mediae respondentem, quum tota pagina 40 alius Parallaxeos nusquam faciat mentionem. Facili tamen coniectura assequi licet, cur
 Reu.

Reu. Pat. *Hell* in eam magis inclinat sententiam, parallaxin mediam a me inuentam fuisse $8''$, 82; verabatur enim ne Ipsi gloria primum inuentae verae Parallaxeos eriperetur. Quicquid autem hac de re sit, hanc inuentionis gloriam Pat. *Hell* libenter concedam, scilicet probabile quidem mihi nunc videtur veram quantitatem Parallaxeos mediae aliquanto minorem esse, quam eam tunc inueneram, et in Dissertatione quidem superiori eam pro $8''$, 63 assumsi, ubi tamen trium aut quatuor partium centesimarum secundi augmentum vel diminutionem facile admitti posse concedo. Scilicet id mihi non tribuo, vt crederem veram quantitatem Parallaxeos Solis, cum praecisione vnius centesimae partis secundi a me determinari posse; persuasus quum sim huiusmodi exactitudinem vel frustra desiderari, vel ab iis expectandam esse, qui siue in obseruationibus instituendis, seu computo subducendo haberi volunt infallibiles.

19. Haec igitur sunt, quae contra dubia a Reu. Pat. *Hell* allata, praepremis monenda habui; confido autem vnumquemque aequum harum rerum arbitrum facile inuenturum, quod veritatis amore ductus leuiiores quasdam aberrationes, quae in *Opere Collectionis Petropolitanae* se produnt, reticere non voluerim, quas tamen Reu. Pat. *Hell* non detegere, multo minus demonstrare valuisset. Eodem veritatis amore ductus, iam quoque profiteor, ob rationes tam in Dissertatione praecedenti, quam hac §. §. 3, 4 allatas, calculos meos de

de Parallaxi Solis, qui Tomo XVI. Nouor. Comm. Acad. Scient. Petropolit. inserti sunt, pro vsque adeo exactis haberi non debere, immo euidenter omnino falsa esse, quae de correctionibus obseruationum in America factarum ibidem dicuntur. Nec aegre omnino feram, si quis hunc errorem ex peruersa adplicatione Methodi *Eulerianae* deducere velit. Nihilominus persuasus omnino sum, neque in effectibus parallacticis ibi assignatis, errores adesse vltra 5" assurgentes, nec conclusiones pro Parallaxi a veritate plus quam $\frac{1}{100}$ Secundi esse discrepantes. Denique si vel Reu. Pat. *Hell* vel alius quispiam in Diatriba de Parallaxi Solis, quae huic praemittitur, aliquos errores detegere valeat; cum de iisdem conuictus ero, semper ad eosdem agnoscendos me paratum inueniet. Non possum autem dissimulare, quin valde optarem, vt conclusiones meae argumentis directis impugnentur, ostendendo quod vel in computo vel in ratiociniis aliquis irrepserit error, eadem ratione ac ego calculos Reu. Pat. *Hell* nunc sub examen reuocabo.

20. Ex iis quae Reu. Pat. *Hell* p. p. 5 et 41 sui Tractatus monet, perspicue omnino intelligitur, eum hoc imprimis sine inuestigationem de Parallaxi Solis suscepisse, vt verum et quam maxime praecisum Parallaxeos valorem definiret, reliquorum scilicet Illustrum ac Celeberrimorum Virorum *Euleri* de la *Lande* et *Pingré* opera hac in re non contentus, quippe quibus vitio vertit, quod debitum obseruationum

num selectum facere non nouerint. Hoc quum ita sit, omni sane iure a Reu. Pat. *Hell* postulare licet, vt calculi ab Ipso instituti exactissimi sint, nec multo grauioribus vitiis obnoxii, quam quae in *Opere Collectionis Petropolitanae*, vel apud Cel. *de la Lande* se inuenisse opinatur. Tantum tamen abest, vt P. *Hell* hac in re praestiterit, quod ab Ipso iure desideratur; vt potius certum sit plerosque valores pro effectibus Parallaxicis ab ipso computatos, euidenter esse falsos, vnde factum omnino est, vt conclusiones ex iis deductae insigniter quoque a vero aberrent. Longum autem foret et a scopo nostro alienum, si omnium horum errorum catalogum quendam heic contexere vellemus; potiores igitur tantum aberrationes quasdam notasse sufficiet, ex quibus Lectores facile perspicient, quale de determinatione Parallaxeos Solis a Pat. *Hell* suscepta, ferendum sit iudicium. *Primum* igitur bina in Opere Pat. *Hell* occurrunt loca, quae censuram quandam mereri videntur, quod cum veris Astronomiae principiis conciliari non possint. Dum scilicet p. 40. Reu. Pat. *Hell* inter Elementa, quae pro definienda Parallaxi Solis cum summa exactitudine cognita esse oportet, etiam referat Parallaxin Veneris horizontalem; in memoriam sibi reuocasse non videtur, inter Parallaxes Veneris et Solis pro dato quouis tempore determinatam esse proportionem, adeo vt si vna earum sit cognita, etiam altera pro data haberi queat, quare hoc Eius assertum eodem redit, ac si dixisset pro inuenienda quantitate Parallaxeos Solis, ipsam hanc Parallaxin

O

exacte

exacte esse debere cognitam. Quod autem Rev. Pat. *Hell* nulla iniuria fiat, dum huiusmodi lapsus Ipsi vitio vertitur; ulterius comprobatur verbis, quae ad initium p. 42. adfert, ubi cum Cel. *de la Lande* differentiam Parallaxium horizontalium Solis et Veneris statuit esse $21'',052$, etiam in Hypothesi Parallaxeos Solis actualis $8'',56$, non perpendens quod Parallaxis horizontalis Veneris a Sole a Cel. *de la Lande* definita sit sub hypothesi Parallaxeos Solis pro 3 Iunii 1769, $8'',37$, et in memoriam sibi non reuocans, quod in eadem ratione ac Parallaxis Solis augetur, etiam augenda sit Parallaxis Veneris, consequenter etiam harum Parallaxium differentia.

21. Alterum quod contra Dissertationem Rev. Pat. *Hell* proponam dubium, in eo consistit, quod valores pro effectibus Parallacticis pag. 42. et 43. allati, tantum non omnes a veritate aberrant, quod ex sequenti patebit Tabula, ubi valoribus a Pat. *Hell* inuentis exactiores subiunxi sub hypothesi Parallaxeos actualis $8'',56$ computatos, ut ratio discrepantiae eo melius percipiat

	Wardhus	Inf.R.Georgii	Ar.P.Walliae	St. Ioseph	Caianeb.
Cont. int. I.	P. <i>Hell</i> $+6'.33''$	$-5'.41''$	$+3'.57''$	$+0'.18''$	$+6'.48''$
	$+6.31$	-5.36	$+4.12$	$+17.2$	$+6.45$
Cont. int. II.	P. <i>Hell</i> -4.30	$+6.26$	$+0.35$	$+4.52$	-4.37 ext.
	$-4.33,5$	$+6.20$	$+0.39$	$+4.49$	-4.36

probe autem notandum est, valores a me inuentos, elementis a Pat. *Hell* assumtis proxime esse accomodatos; ubi tamen reticere non debeo distantiam minimam

nimam centrorum a Pat. *Hell* adoptatam 10'. 7", 7, non conciliari posse cum diametro Solis 31'. 31", 4, posita enim diametro Veneris 57", 2, habebitur differentia semidiametrorum 917", 1, non autem 915", 1. Ex comparatione horum valorum liquet, aberrationes effectuum Parallacticorum Pat. *Hell* ad 4, 5, 7 scrupula secunda increfcere, immo inter ipsos vnum dari, qui integris 20 secundis fit vitiosus, qualis error merito pro enormi et intolerabili haberi debet. Libenter tamen concederem, Reu. Pat. *Hell* huius aberrationis veniam mereri, quippe quam ex errore quodam in computo commisso originem ducere necesse est; nisi Ipse aliis persuadere voluisset, hunc valorem omnino esse exactum, contra vero eum, quem Cel. de la *Lande* pro effectui parallactico huius contactus inuenit, esse erroneum, conf. Pag. 95 in Opere Pat. *Hell*. Quum igitur discrepantia effectus Parallactici pro contactu interno in ingressu ad Sinum Hudsonis, a Pat. *Hell* inuenti, ab iis quos alii pro hoc contactu elicerunt, maxima sit; id a Pat. *Hell* merito desideratur, et ostendat hunc valorem a se inuentum veritati exacte esse conformem.

22. Facile igitur hinc perspicitur, quid de conclusionibus a Reu. Pat. *Hell* pro valore Parallaxeos inuentis iudicandum sit, quum enim Elementa quibus hae conclusiones superstruuntur falsa sint; ipsas quoque conclusiones sponte corruere necesse est. Inutile autem esset heic fusius exponere, qualis ex com-



comparatione singularum observationum sequatur valor Parallaxeos, quum hoc institutum in superiori dissertatione iam exsecuti fuerimus; ostendere sufficit quales ex singulis prodiant valores durationis Geocentricae, qui indicium certissimum praebebunt reliquis conclusiones a Pat. *Hell* inuentas, aequae parum esse exactas.

Valores durationis Geocentricae sub hypothese Parallaxeos Actualis 8^h, 56.

Reu. Pat. <i>Hell</i> .	veri.
Wardhus 5 ^b . 42 ^t . 11 ^u .	5 ^b . 42 ^t . 9 ^u .
Inf. R. Georgii 42. 11.	42. 0.
Arx Pr. Walliae 42. 8.	41. 51.
St. Iosephus 41. 56, 4	41. 55.
Cajaneburg 41. 34, 5	41. 38 ¹ / ₂ .

Hae ergo expressiones pro duratione Geocentrica indicant, inter conclusiones pro valoribus Parallaxeos a Reu. Pat. *Hell* inuentas, vix ullam esse, quae non certo modo a veritate discrepet, immo hinc liquet, ex comparatione observationis Wardhusiensis cum illa super Insula R. Georgii facta, aliquanto maiorem Parallaxin prodire, quam Ipse inuenerat. Sed circa minores istas aberrationes, quae non ultra $\frac{1}{10}$, aut $\frac{1}{10}$ partem secundi assurgunt, faciles erimus; grauiorum tantum mentionem iniecisse contenti. Ex comparatione observationis Wardhusiensis cum illa ad Sinum Hudsonis,



sonis, deducit Pat. *Hell* parallaxin mediam $8''$, 76, cum eam inuenire debuisset $9''$, 01; error igitur determinationis apud Pat. *Hell* quarta parte secundi circiter absoluitur. Ex comparatione obseruationis *Cajaneburgensis* cum illa ad Sinum *Hudsonis*, inuenit parallaxin $8''$, 13, iterum $0''$, 27 iusto minorem. Comparatio obseruationum ad Sinum *Hudsonis* et in *California* factarum praebeet parallaxin $8''$, 61, quam Pat. *Hell* inuenit $8''$, 88; unde eius determinatio ultra quartam partem secundi est falsa. Comparatio denique obseruationum pro *St. Josepho* et *Insula Reg. Georgii* dat parallaxin mediam $8''$, 60, quam P. *Hell* habet $8''$, 44; ergo *Ipsi*us determinatio est $0''$, 16 iusto minor.

23. Sequentia itaque hinc deducuntur conclusaria:

1°. Omnes comparationes a Pat. *Hell* institutas in Opere *Ipsi*us Pag. 47 . . . 55 et 59, 60 a veritate aberrare et imprimis quidem eas, quas obseruatio ad Sinum *Hudsonis* facta ingreditur enormiter esse erroneas, nec reliquas tamen ab omni errore liberari posse; unde non solum valores *Parallactici* tantum non omnes ab *Ips*o inuenti, sed etiam determinationes pro *Longitudinibus* locorum ab *Ips*o assignatae sponte destruuntur.

II°. Falsa esse, quae p. 57. adfert de consensu obseruationis *Wardhusiensis*, cum obseruationibus *Astro-*

nomorum Anglorum ad Sinum Hudsonis; scilicet pro hypothesi Parallaxeos mediae $8''$, 70, durationes Geocentricae ex his observationibus deductae ad minimum $13''$ inter se discrepant.

III°. Falsos esse valores Parallaxicos ex singulis contactibus inter se comparatis Pag. 69 deductos; quum ex erroneis effectibus Parallaxicis et falsis differentiiis Meridianorum sint eliciti. Praeter vitia autem haec commemorata, observari omnino meretur, comparandi rationes heic admitti quam maxime lubricas, seu tales pro quibus incertitudo duorum aut trium secundorum in observationibus, valorem Parallaxeos quarta parte secundi immutare poterit. Huiusmodi est comparatio observationum pro II°. contactu interno Californiae et super insula Reg. Georgii factarum, item comparatio observationum pro contactu interno in ingressu ad Sinum Hudsonis et Wardhusis, ex qua comparatione certe nullo modo parallaxis media $8''$, 61 deduci potuisset, nisi apud Reu. Pat. *Hell* vnus error enormis alterum compensasset.

IV°. Calculos Pat. *Hell* a pag. 63 ad 68 alatos rite sibi constare non posse; falsa igitur esse, quae ibidem de erroribus observationum asseruntur.

V°. Parum momenti habere, quae Pag. 71 adferuntur de mirifico durationum Geocentric. consensu, sub hypothesi earum correctionum quas Reu. Pat. *Hell* obser-

obseruationibus adtribuit. Nam si quis Parallaxin ad-
ptare vellet 9'', licet quam maxime absurdam; tales
tamen obseruationibus adfingere posset correctiones, vt
singulae eisdem pro duratione Geocentrica praeberent
valores. Quid autem de *mirifico hoc consensu Paral-*
laxin Solis 8'', 7 mirifice confirmante sentiendum sit,
sequens declarat Tabula:

	Wardhus	Inf.R Georgii	Arx.P.Wall.	St. Joseph.	
Cont. I. int.	9 ^b .34'.11''	21 ^b .44'.4''	1 ^b .15'.22''	0 ^b .17'.20''	Conf. cum
Eff. Paral.	+ 6.31	- 5.36	+ 4.12	- 17	Pag. 71. apud Pat. Hell.
Cont.II.int.	15.27.25	3.14.8	7.0.49	5.54.57	
Eff. Paral.	- 4.33,5	+ 6.20	+ 0.39	+ 4.49	
Dur. Geoc.	5 ^b .42'.9''5	5 ^b .42'.0''	5.41.54	5.42.9	

24. Dolemus Reu. Pat. *Hell* inanem sibi sum-
fisse operam, dum Pag. 96 et 97. Operis sui, varias
proponit coniecturas, pro ratione reddenda errorum,
quos circa effectus Parallaëticos a Cel. de la *Lande* assigna-
tos, se detexisse gloriatur. Ostendimus enim effectus paralla-
ëticos ab Ipso allatos plerumque insigniter esse falsos,
certe multo minus veritati consentaneos, quam quos
attulit Cel. de la *Lande*. Ne autem queratur Reu.
Pat. *Hell*, iniuriam sibi factam esse, dum dico effectus
Parallaëticos Cel. de la *Lande* multo rectius se habe-
re, quam qui ab Ipso inuenti sunt; Tabulam heic
subiungere placet repraesentantem effectus Parallaëticos
tam Celebb. Pat. *Hell* et de la *Lande*, quam meos:

Cont. I.

Cont. Int.	Arx.Pr.W	St. Joseph	Inf.R.Geo.	Wardhus.	Cajaneb.
I. Pat. <i>Hell</i>	+ 3'.46",9	+ 18",1	- 5'.32",0	+ 6'.24",6	+ 6'.39",0
<i>de la Lande</i>	+ 4. 9, 8	+ 18, 1	- 5.30, 3	+ 6.24, 4	+ 6.38, 3
Ex meis calculis	+ 4. 6, 3	+ 16, 8	- 5.28, 7	+ 6.22, 3	+ 6.36, 2
II. Pat. <i>Hell</i>	+ 33, 6	+ 4.44, 7	+ 6.15, 2	- 4.24, 6	- 4.31, 1 ext.
<i>de la Lande</i>	+ 37, 0	+ 4.43, 1	+ 6.12, 6	- 4.28, 6	- 4.30, 5
Ex meis calculis	+ 38, 5	+ 4.43, 2	+ 6.11, 5	- 4.27, 6	- 4.30, 3

Sed uti iam supra monui, reliquas in his valoribus aberrationes mittamus, ad eas tantum respicientes, quae in effectibus Parallacticis Pat. *Hell* pro Sinu Hudsonis reperiuntur, hae enim merito pro enormibus haberi debent. Pro contactu scilicet priori interno, error partem duodecimam veri valoris absoluit, pro contactu autem posteriori aberratio fere usque ad partem septimam valoris veri affurgit. Ne autem quis credat, conficta esse, quae heic affirmo; placet hoc loco Elementa calculi adferre ad inveniendum effectum Parallaxicum pro contactu interno in ingressu ad Sinum Hudsonis. Elementa autem Astronomica cum Patre *Hell* assumi sequentia:

Arcis Princip. Walliae Latit. 58°. 47'. 32". Longit. a Paris. 6^b. 26'. 23". Occid. Coniunct. ☉ et ♀ ad merid. Paris. 10^b. 14'. 1" T. vero. Distantiam minimam centrorum ☉ et ♀ = 10'. 7", 3, vid. Pag 84 85 in Dissert. P. *Hell*. Diametrum Solis 31'. 31" et diametrum Veneris 57", 2.

His igitur praesuppositis binos instruxi calculos, priorem ad praescriptum Methodi Cel. de la *Lande*, alte-

alterum secundum Methodum a me in superiori dissertatione expositam exactiorem, qua respectus habetur non tantum ad veram Telluris figuram, sed reliquas pro angulo CVD Fig. 6 necessarias correctiones; hoc autem loco sufficiet conclusiones ex priori calculo inuentas exponere. Denotet igitur C locum Solis, V locum Veneris verum et D locum eius apparentem, centro autem C radio CD describatur arcus circuli qui occurrat rectis CV et VM , quarum haec est ipsa orbita Veneris, in punctis F et X , atque iungantur VD , DF , FX . Quum itaque pro tempore vero Arcis Princ. Walliae. $1^b. 15'. 23''$, sit altitudo Solis $51^{\circ}. 13'. 30''$ circiter, indeque altitudo Veneris $51^{\circ}. 28'. 10''$ circiter, fiet $VD = 13'', 114$. Est vero ang. $CVD = 17^{\circ}. 58'. 50''$ proxime, erit igitur $DCV = 15'. 11''$, $VDF = 71^{\circ}. 53'. 35''$ proxime et $VFD = 90^{\circ}. 7'. 35''$, ex quo deducitur $VF = 12'', 465$. Porro quum pro Triangulo VFX ob $CV = 929'', 365$ et $CM = 607'', 3$, sit angul. $CV M = 40^{\circ}. 48'. 10''$, tum vero $MXC = 41^{\circ}. 28'. 43''$, ideoque $V CX = 40'. 33''$; inde colligitur $VFX = 90^{\circ}. 20'. 16''$, $VXF = 48^{\circ}. 51'. 34''$ et $VX = 16'', 551$ seu in tempore $4'. 8'', 1$. Secundum Methodum exactiorem iisdem adhibitis Elementis, inueni effectum Parallaxeos $4'. 6'', 0$. Si Reu. Pat. *Hell* placuerit, has conclusiones cum suis comparare, non dubito, quin causam erroris a se commissi facile detegeret, et si ingenue agere velit, fateri cogetur errorem se commississe, facile quidem Ipsi condonandum, nisi alios erro-

ris arguere voluisset, cuius ipse reus est. Interim hinc quidem *Reu. Pat. Hell* addiscere poterit, quam parum fiduciae in posterum suis calculis tribuere debeat, priusquam aliorum labores corrigere suscipiat.

25. Et si valor *Parallaxeos a Reu. Pat. Hell* inuentus ad veritatem proxime accedere videatur, tamen ex iis quae supra adnotauimus, patet, comparationem observationis *Wardhusiensis* cum illa super insula Regis *Georgii* facta, aliquanto maiorem praebere *Parallaxeos* valorem. Si vero observatio *Wardhusiensis* cum reliquis binis in *America* factis conferatur, multo adhuc maiores oriuntur valores pro *Parallaxi*. Quod si igitur *Reu. Pat. Hell* observationes istas vt erroneas condemnare velit, necessum est vt rationes in medium proferat probabiles saltem, quae indicarent observationes *Californienses* et ad *Sinum Hudsonis* factas pro suspectis esse habendas; nam argumentum, ex infallibilitate *Pat. Hell* desumptum, multum dubito, an apud reliquos *Astronomos* eius sit ponderis, ac Ipse sibi persuadere videtur. In *Dissertatione* quidem praecedenti vidimus, observationes *Americanas* pro *Sinu Hudsonis* et *St. Iosepho*, criteria veritatis, praeseferre singularia; observationes autem super insula Regis *Georgii* factas multo esse incertiores; denique vero observationem *Pat. Hell* pro contactu interno in ingressu, a reliquis observationibus *Europaeicis* pro hoc contactu, differre 14 secundis. Rogandus igitur est *Reu. Pat. Hell*, vt sibi in mentem reuo-

reuocare velit ea, quae ad initium p. 102. sui Operis protulit verba, quippe quae de hac Ipsius obseruatione, iudicium in se continent, nulli exceptioni obnoxium. Perspicuum hinc euadit, valorem Parallaxeos $8'', 7$ a Pat. *Hell* assumptum, non esse adeo praecisum ac sibi imaginatur. Haec si perpendere velit Reu. Pat. *Hell*, facile inueniet, calculos a se institutos denuo esse repetendos, quum hoc primum tentamen adeo male Ipse successerit; postmodum autem videbimus, vtrum adhuc in sua sententia de singulari praecisione Parallaxeos $8'', 7$ persistere velit.

26. Haec quidem praecipua fuere, quae circa Tractatum de Parallaxi a Reu. Pat. *Hell* nuper editum notanda habui; nam si singulas huius Operis conclusiones sub examen reuocare placuisset, opus omnino superfluum et omnibus Lectoribus taediosum suscepissem; neque ad imitationem Reu. Pat. *Hell* singulas minutias censura perstringere, operae pretium duxi. Qualescunque autem sunt, quae heic adferuntur notationes, abunde sufficient ad ostendendum, quod Reu. Pat. *Hell* multo grauioribus se implicauerit erroribus, quam quos Celeb. *de la Lande* et mihi exprobat.

SVPPLEMENTVM.

Postquam dissertatio praecedens, qua potiore partem, iam Typis exscripta esset, litteras Reu. Pat. Hell accepi, quibus aduersus ea, quae in praecedentibus a me exposita sunt et quorum summarium cum Ipso communicaueram, varia responsionis loco adferre conatur. Ut igitur pateat, vtrum Ipsius responsiones meis obiectionibus diluendis sufficiant, easdem heic exponere, tumque simul meas animaduersiones subiungere, haud ats re erit.

Contendit igitur Reu. Pat. Hell 1^o. *falstatem effectuum Parallaxicorum a Cel. Krafft inuentorum vim argumenti sui non infringere; quum vis argumenti istius non a valoribus absolutis effectuum parallaxicorum, sed respectiuis, hoc est a differentiis vel summis effectuum absolutorum, pendeat; praeterea vero effectus parallaxicos ab Ipso Pag. 31. addibitos, cum meis satis bene consentire.* Notandum vero est, Reu. Pat. Hell in binis istis suis Examinibus a pag. 11. vsque ad 32 allatis, probare voluisse, quod correctiones obseruationum pro contactu externo in egressu, ad Sinum Hudsonis, Wardhusis et Caianburgi factarum, in *Opere Collectionis Petropolit.* perperam sint definitae. Quod igitur obseruationem Caianburgensem attinet, id quidem

dem Ipsi facile damus, quod adhibitis etiam falsis effectibus parallacticis, ostendi queat huius observationis correctionem minus recte esse definitam; si scilicet longitudo Caianeburgi talis assumatur, qualis in *Opere Collect. on. Petropol.* adfertur. Atqui supra ostendimus, hanc Longitudinem esse falsam, ideoque exceptio ista Reu. Pat. *Hell*, parum ad ipsam rem pertinet. Quod observationem Wardhusiensem attinet, ex calculis nostris supra §. 7. allatis, liquet, errorem in effectibus parallacticis commissum, omnino aliam praebere posse conclusionem, quam quae ex veris sequatur; etiam si in comparatione observationis Wardhusiensis, cum Petropolitana, Guriefuensi et Orenburgensi, tantum de differentiis effectuum parallacticorum haud multum inaequalium, quaestio sit. Pro errore denique observationis ad Sinum Hudsonis factae, haec exceptio Reu. Pat. *Hell* tanto minus valere poterit; quod in comparatione huius observationis cum Europeicis, omnino valor absolutus effectuum parallacticorum insignis sit momenti. Hoc autem ipsum a Reu. Pat. *Hell* iam concessum est, in Addend. ad Dissert. de Parallaxi Solis p. 116. Quid autem Reu. Pat. *Hell* sibi velit cum ea responsione, quod effectus parallactici a Ceh. *Krafft* computati, dum ad hypothesin parallaxeos 8", 37 accommodantur, iidem proxime prodeant, ac quos ego pro hypothesi Parallaxeos 8", 60 inveni, plane non intelligo. Scilicet conclusionem Reu. Pat. *Hell* pro observatione Caianeburgensi, non eo ex capite reiicio, quia effectus

Parallactici sunt minus exacti, sed quia in Longitudine huius loci determinanda, error commissus sit.

II. Existimat Reu. Pat. *Hell*, ea quae de errore commissio in Longitudine Caianeburgi assignanda, a me allata sunt, non consistere posse; quia si similis correctio applicetur ad Longitudines ex Eclipsi Solis deductas, maxima inde proflerent absurda. Percipere sane non possum, qui factum sit, ut Reu. Pat. *Hell* adeo praeceptis ferre potuerit iudicium; scilicet dum de errore in signo litterae θ commissio loquor, respectum tantum habeo ad calculos pro transitu Veneris institutos; nec unquam mihi in mentem venit, idem pro Eclipsi Solis valere, multo minus villo verbo hoc inquirere potui. Immo vel hinc iam evidens est, ea quam maxime confirmari, quae de signo litterae istius θ attuli; nimirum si pro Eclipsi Solis, vera Longitudo alicuius loci a Parisiis ad Orientem siti statuatur $L - \theta$, tum pro transitu Veneris eam statui debere $L + \theta$, si scilicet id obtinere velimus, ut pro utroque casu, in aequationibus finalibus Operis Euleriani, coefficientis ipsius θ idem recipiat signum, ac correctio Longitudinis Lunae vel Veneris. Ad inveniendum enim motum horarium relatiuum Lunae secundum longitudinem, capi debet differentia motuum horariorum pro Luna et Sole; contrarium vero locum habet pro Veneris motu horario relatiuo, qui conflatur ex motibus horariis Solis et Veneris; ex quo itaque intelligitur, motus relatiuos Lunae

Lunae et Veneris contrarios plane fuisse. Sua sponte igitur corrumpit, quae de absurdis circa differentias meridianorum, ex mutatione litterae θ prodire existimat Reu. Pat. Hell; quemadmodum enim pro calculo transitus Veneris, dum quaestio erat de locis ad Orientem a Parisiis sitis, signum litterae θ immutandum fuisset; ita pro Eclipsi Solis, si de locis a Parisiis Orientalibus quaestio sit, Longitudo recte statuitur $L - \theta$, contra vero pro Locis, quae respectu Parisios sunt Occidentales, statui debet $L + \theta$.

III°. Contendit Reu. Pat. Hell, omnia mea dubia contra Ipsius dissertationem allata, plane refelli, si demonstratur, effectus paralacticos pro arce Principis Walliae ab Ipso inuentos recte se habere, contra vero eos, quos Cel. de la Lande et ego inuenimus, esse enormiter erroneos. Si autem demonstrari possit, sub hypothesi parallaxeos $8''$, 37 , effectum pro contactu interno in ingressu ad Sinum Hudsonis esse $3'.46''$, 9 et pro egressu $0'.33''$, existimat Reu. Pat. Hell eo ipso sequentes conclusiones extra omne dubium poni. I°. Satisfactum erit meae prouocationi, qua scilicet requirebam, ut Pat. Hell demonstraret: falsum esse, quod sub hypothesi parallaxeos actualis $8''$, 56 , observatio Wardabysiensis ab illa ad Sinum Hudsonis saltem $13''$ differat. Secundo: hinc patebit, Reu. Pat. Hell iniuriam non fuisse in Cel. D. de la Lande, dum eius calculos pro Sinu Hudsonis erroneos affirmat. Tertio: inde euincetur, observationes Californiensem et Caiamburgensem, nec cum observatione Otabiteens, nec

nec cum illa ad Sinum Hudsonis in vlla hypòthesi conciliari posse, illasque proinde erroneas esse. Quarto: hinc demonstratum erit, erroneas esse obseruationes Perisinas. Quinto: denique hinc perfecte euincetur Parallaxin Solis actualem certissimam fuisse $8''$, 56 . Quamuis aliquod dubium suboriri posset, an omnes hae conclusiones prorsus confirmetur inde, quod effectus Parallactici a Reu. Pat. Hell pro Sinu Hudsonis inuenti, sint exacti; tamen hac de re, nullam in praesenti controuersiam mouere, animus est. Propositum igitur tantum nobis esto, examen effectuum Parallacticorum a Reu. Pat. Hell inuentorum pro Sinu Hudsonis, et sufficit quidem effectum parallacticum pro ingressu sub examen reuocasse, quia in eo principalis error residet. In §. 24. Disseruat. praecedentis iam a me euictum est, quod computum iuxta Methodos vulgares instituendo, hic effectus inueniatur $4'$, $8''$, 1 ; omnia autem elementa calculi simul a me allata sunt, vt vnusquisque experiri possit, an computus meus rite se habeat vel non? Hunc autem computum, quem cum Reu. Pat. Hell communicaueram, Ipse plane improbat, cum multis erroribus obnoxium esse arguens. Dicit enim I^o. me in eo errasse, quod pro linea CF adhibuerim $916''$, 9 , quae ex eius mente esse debet $915''$, 11 , assumpta Diametro Solis $31'$, $31''$ et Diametro Veneris $57''$, 2 ; tumque quod pro CM assumserim $607''$, 3 , quae esse debet $607''$, 7 . II^o. Statuit veris his valoribus pro CF et CM assumtis, inueniri $MV = 699$, 8 , $MX = 684''$, 6 , $VX = 15''$, 2 , ideoque effectum par-

rah-

Fig. 6. esse debet $607''$, 7 . II^o. Statuit veris his valoribus pro CF et CM assumtis, inueniri $MV = 699$, 8 , $MX = 684''$, 6 , $VX = 15''$, 2 , ideoque effectum par-

parallacticum in tempore 3', 47'', 0. III°. Ex elementis a me assumtis, sequi effectum parallacticum 4', 7'' ideoque vno secundo minorem, ac ego inueni.

Mirari omnino conuenit, *Reu. Pat. Hell* tam praecipitanter de meis calculis iudicasse, nec vllam adhibuisse patientiam in iis exactius examinandis; quod si fecisset, certe omnes illos errores in quos se iam praecipitem dedit, declinasset. Videamus igitur *primum* de valoribus linearum *CF* et *CM*. Dico autem: hos valores tales a me assumtos fuisse, quales a *Reu. Pat. Hell* adprobantur, vel saltem adprobari debent. Valorem ipsius *CM* = $607'', 3$ p. p. 84, 85 in Dissertatione *Reu. Pat. Hell* adoptatum inuenimus; lubenter tamen concedo, nec hunc valorem, nec illum $607'', 7$ subsistere posse, si diameter Solis statuatur $31', 31''$. At mox quidem ostendemus parum referre, an *CM* statuatur $10', 7'', 3$, vel $10', 7'', 7$. Quod valorem ipsius *CF* attinet, agnoscit *Reu. Pat. Hell* Diametrum Solis a se assumi $31', 31''$ et Diametrum Veneris $57'', 2$, erit ergo Ipso concedente, semidiameter Solis $15', 45'', 5$ et semidiameter Veneris $28'', 6$, ideoque differentia semidiametrorum = $15', 16'', 9$ = $916'', 9$. Sin autem statuatur differentia semidiametrorum $915'', 11$, fiet semidiameter Solis = $943'', 71$ = $15', 43'', 71$ ergo Diameter Solis $31', 27'', 42$, quam quoque a *Cel. de la Lande* adoptatam esse nouimus. At parui quoque momenti res est hoc in negotio, vera quantitas

titas diametri Solis, et ex vtraque hac correctione, in valore effectus Parallactici, ne errorem quidem vnus minuti secundi metuendum esse, mox videbimus.

Secundo: probandum mihi est, sub hypothesi $CF = 915'', 11$ et $CM = 607'', 7$, fore $VX = 16'', 584$ seu in tempore $= 4'. 8'', 6$; hoc autem pluribus diuersis modis demonstrare iuuabit, ne credat Reu. Pat. *Hell* nos continuo in errore versari:

I. Demonstratio:

$$\text{Log. CM} = 2,7836892 \quad \text{Log CM} = 2,7836892$$

$$\text{Log. CX} = 2,9614733 \quad \text{Log. CV} = 2,9673491$$

$$\text{Log. Sin. CXM} = 9,8222159 \quad \text{L. Sin. CVM} = 9,8163401$$

$$\text{CXM} = 41^\circ. 36'. 40''$$

$$\text{CVM} = 40. 55. 51$$

$$\text{VCX} = 40. 49 \quad \text{hinc VFX} = 90^\circ. 20'. 24''$$

$$\text{et VXF} = 48^\circ. 43'. 45''$$

$$\text{Log. VF} = 1,0956923$$

$$\text{L. Sin VXF} = 9,8759867$$

$$1,2197056$$

$$\text{VX} = 16'', 584 \text{ et in tempore}$$

$$\text{L. Sin. VFX} = 9,9999924$$

$$248'', 63 = 4'. 8'', 63.$$

$$\text{Log. VX} = 1,2196980$$

II. Demonstratio:

$$\begin{array}{ll} \text{Log. CX} = 2,9614733 & \text{Log. CV} = 2,9673491 \\ \text{L. Col. CXM} = 9,8737096 & \text{L. Col. CVM} = 9,8782350 \\ \text{Log. MX} = 2,8351829 & \text{Log. MV} = 2,8455841 \end{array}$$

$$\text{MV} = 700,784$$

$$\text{MX} = 684,200$$

$$\text{VX} = 16,584 \quad \text{vt supra}$$

III. Demonstratio:

$$\begin{array}{ll} \text{CV} = 927,575 & \text{CX} = 915,11 \\ \text{CM} = 607,700 & \text{CM} = 607,70 \\ \text{CV} + \text{CM} = 1535,275 & \text{CX} + \text{CM} = 1522,81 \\ \text{CV} - \text{CM} = 319,875 & \text{CX} - \text{CM} = 307,41 \\ \text{L. CV} + \text{CM} = 3,1861861 & \text{L. CX} + \text{CM} = 3,1826457 \\ \text{L. CV} - \text{CM} = 2,5049804 & \text{L. CX} - \text{CM} = 2,4877180 \\ \text{Log. M V} = 5,6911665 & \text{Log. M X} = 5,6703637 \\ \text{Log. M, V} = 2,8455832 & \text{Log. M X} = 2,8351818 \end{array}$$

$$\text{MV} = 700,782$$

$$\text{MX} = 684,198$$

$$\text{VX} = 16,584$$

IV. Demonstratio:

Productus numerorum 1535,275 et 319,875 est 491096,090625; unde extrahendo radicem quadraticam,

Q 2

ticam, habetur $VM = 700, 782$. Porro productus numerorum $1522, 81$ et $307, 41$ est $468127, 0221$, ex quo habetur radix quadratica $XM = 684, 198$. Sed pudet me, in rebus facillimis et obuiis tam diu morari, nec omnino Lectorum patientiam huiusmodi quaestionibus triualibus defatigare ausus fuissē, nisi dubitassē an Reu. Pat. *Hell* alio modo se erroris commissi, conuinci pateretur. Cum enim nunc videbit, tot diuersis modis eodem valores pro MV et MX inueniri; dubitare saltem cogetur de veritate suorum calculorum.

Examinemus autem, quid de calculis Reu. Pat. *Hell* sit statuendum. Refert Ipse, se ex calculis suis inuenisse:

$$CVM = 40^{\circ}.57'.21''$$

$$CXM = 41^{\circ}.36'.42''$$

$$VCM = 49. 2. 39$$

$$XCM = 48. 23. 18,$$

vnde contendit inueniri, latus

$$MV = 699, 8$$

$$MX = 684, 6 \text{ proinde}$$

$$VX = 15, 2 \text{ seu in tempore } 3^t. 47^h, 0.$$

Ponamus ergo esse $CVM = 40^{\circ}.57'.21''$ et $CM = 607^h, 7$ et quaeramus valores linearum CV , CX , est vero

$$CV = \frac{CM}{\sin CVM}; \quad CX = \frac{CM}{\sin CXM}.$$

Log.

$$\begin{array}{rcl} \text{Log. CM} & = & 2,7836892 \\ \text{L.Sin. CVM} & = & 9,8165575 \\ \hline \text{Log. CV} & = & 2,9671317 \end{array} \qquad \begin{array}{rcl} \text{Log. CM} & = & 2,7836892 \\ \text{L.Sin. CXM} & = & 9,8222194 \\ \hline \text{Log. CX} & = & 2,9614698 \end{array}$$

$$\begin{array}{rcl} \text{CV} & = & 927,111 \text{ at } \text{CX} = 915,10 \\ \text{supposita erat CV} & = & 927,575 \end{array}$$

$$\text{error} = 0,464$$

Supponamus iterum angulos CVM, CXM rite se habere et quateramus lineas MV, MX, habebimus autem $MV = CM \cdot \text{Cot. CVM}$ et $MX = CM \cdot \text{Cot. CXM}$.

$$\begin{array}{rcl} \text{Log. CM} & = & 2,7836892 \\ \text{L. Cot. CVM} & = & 0,0615132 \\ \hline \text{Log. MV} & = & 2,8452024 \end{array} \qquad \begin{array}{rcl} \text{Log. CM} & = & 2,7836892 \\ \text{L. Cot. CXM} & = & 0,0514864 \\ \hline \text{Log. MX} & = & 2,8351756 \end{array}$$

$$\begin{array}{rcl} \text{hinc MV} & = & 700,168 \\ \text{MX} & = & 684,189 \\ \hline \text{VX} & = & 15,979 \end{array} \qquad \begin{array}{rcl} \text{Pat. Hell habet MV} & = & 699,8 \\ \text{MX} & = & 684,6 \\ \hline \text{VX} & = & 15,2 \end{array}$$

Ex hoc examine iam patet, Reu. Pat. *Hell* triplicem commisisse errorem. Primum enim angulum CVM qui est $40^\circ.55'.51''$, inuenit $40^\circ.57'.21''$; deinde ope huius anguli eruit $MV = 699,8$, quam pro hypothesi, quod angulus CVM bene ab Ipso sit definitus, inuenire debuisset 700,168; at reapse tamen est $MV = 700,782$. Denique tertius commissus est error in valore ipsius MX, quem Reu. Pat. *Hell* inuenit 684,6, seu vero multo maiorem.

Q 3

Tertio :

Tertio: quamvis in Dissertationis praecedentis §. 24. omnia Elementa calculi pro effectu paralla-
ctico circa contactum internum in ingressu ad Sinum
Hudsonis, a me instituti, iam sint allata, eaque
omnino rite se habere, quivis facto experimento facile
inueniet; quum tamen Reu. Pat. *Hell* etiam hos
meos calculos correctiuncula quadam egere existimet,
placet iam alio modo veritatem effati mei corrobora-
rare:

$$CV = 929,365$$

$$CX = 916,90$$

$$CM = 607,300$$

$$CM = 607,30$$

$$CV + CM = 1536,665$$

$$CX + CM = 1524,20$$

$$CV - CM = 322,065$$

$$CX - CM = 309,60$$

$$L.CV + CM = 3.1865791$$

$$L.CX + CM = 3.1830420$$

$$L.CV - CM = 2.5079436$$

$$L.CX - CM = 2.4908010$$

$$2. \text{Log. } MV = 5.6945227$$

$$2. \text{Log. } MX = 5.6738430$$

$$\text{Log. } MV = 2.8472613$$

$$\text{Log. } MX = 2.8369215$$

$$MV = 703,495$$

$$\text{Pat. } \textit{Hell} \text{ habet } MV = 701,0$$

$$MX = 686,944$$

$$MX = 684,5$$

$$VX = 16,551$$

$$VX = 16,5$$

in tempore $4^l. 8''$, 1,

Facillimum quidem mihi esset ostendere, valo-
res linearum MV et MX a Pat. *Hell* inuentos cum
Elementis a me adhibitis consistere non posse; sed
operae pretium non est, huiusmodi errores exami-
nare,

nare, quos quilibet in calculis Trigonometricis vel Arithmetice mediocriter versatus, sine vlla opera detegere valebit. Monuisse tantum sufficiet, computandi rationem a Pat. *Hell* adhibitam, ad summam exactitudinem perducere non posse; quum in valoribus linearum MV , MX partes centesimae secundorum negligi non debeant, nam si error in valore ipsius VX hinc prodeat $0,05$ sec. idem in tempore producet errorem $0'',75$ qui minime negligendus videtur.

Dum tamen Reu. Pat. *Hell* concedit, effectum parallaxicum ex elementis a me assumtis deduci $4'.7''$, statim suspicio ipsi suboriri debuisse, tantillam istam correctionem pro differentia semidiametrorum et distantia minima, nequaquam tantam differentiam in valore pro effectu Parallaxico, producere posse. Si enim cognitus fuerit effectus Parallaxicus pro certa hypothesi linearum CF et CM ; facile inueniri Fig. 6. poterit effectus, qui aliae hypothesi a priori parum diuersae, respondet. Nam si dicatur correctio lateris $CF = \delta$ et lateris $CM = y$, erit correctio ipsius VX , quam vocemus z ,

$z = y(\text{Tang. CXM} - \text{Tang. CVM}) - \delta(\text{Sec. CXM} - \text{Sec. CVM})$,
vel etiam

$$z = \frac{y \sin. V C X - 2 \delta \sin. \frac{1}{2} V C X \cdot \sin. \left(\frac{C X M + C V M}{2} \right)}{\cos. C X M \cdot \cos. C V M}$$

Fiat

Fiat iam huius formulae applicatio ad casum praesentem. Erat in mea hypothese, $CF = 916,9$ et $CM = 707,3$, et in ea Ren. Pat. *Hell*, $CF = 915,11$ et $CM = 707,7$, hinc ergo prodit,

$$\delta = 915,11 - 916,9 = -1,79 \text{ et } \gamma = 707,7 - 707,3 = +0,4$$

Si vero adhibeantur valores pro angulis CVM, CXM a me inuenti, habebitur ex formula allata;

$$z = +0,021.y - 0,013.\delta$$

et substitutis pro δ et γ valoribus, $z = +0,031$; at pro mea hypothese est $VX = 16'',551$, ergo pro ea a Pat. *Hell* adoptata

$$VX = 16'',551 + 0'',031 = 16'',582,$$

fere vt eam, supra per computum directum inuenimus.

Nescio igitur, an Ren. Pat. *Hell* a vitio nimiae praecipitantis, ne quid grauius dicam, liberari possit, dum falsorum suorum effectuum parallaeticorum, tam moleste sedulum agit defensore; huius autem erroris veniam tanto minus aliquam sperare debet, quod cum nimia confidentia triumphum egerit, licet nimis praecocem, de errore quem in meis calculis se detexisse gloriatur. Caeterum hoc loco silentio praetereundum non esse videtur, valorem ipsius MX, quem Pat. *Hell* ex valoribus ipsorum CX et CM ab Ipso assumtis inuenit $684'',6$, esse Elementum, quod

quod omnes calculos effectuum Parallacticorum ingreditur; si igitur *Reu. Pat. Hell* hoc Elemento constanter usus sit, quemadmodum ad praescriptum Methodi a se adhibitae, Eum facere oportuit; ex hoc quidem capite omnes effectus Parallactici ab Ipso inventi, 6" in tempore, facti sunt erronei; supra enim demonstraui verum valorem ipsius *M X* esse 684", 198. At ex Tabula Ipsius, p. 98. Dissert. de Parallaxi, liquet, effectus Parallacticos ab Ipso inuentos, huic errori constanter non esse obnoxios; concludere igitur fas est, in valoribus lineae *M V* computandis errores esse commissos, qui priorem ex erroneo valore lineae *M X* oriundum, aliquo modo compensarent, unde perspicuum redditur, singulos calculos effectuum Parallacticorum a Patre *Hell* institutos, suspitioni reddi obnoxios. Sin autem *Reu. Pat. Hell* pro reliquis effectibus Parallacticis, alium adhibuerit valorem ipsius *M X*, ac pro contactu interno priori ad Sinum *Hudsonis*, statim vel inde colligere debuisset, suum computum pro hac observatione rite se habere non posse.

IV°. Quod attinet locum in Dissertatione *Reu. Pat. Hell*, ubi inter Elementa pro computo Parallaxeos necessaria, etiam refert Parallaxin *Veneris* horizontalem, quae tamen in hac inuestigatione aequè incognita haberi debet, ac ipsa Parallaxis *Solis*; iam significauit se intelligere Parallaxin *Veneris* non ab-

R

solu-

solutam sed hypotheticam, quae scilicet respondet hypothetico valori parallaxeos Solis. Vtrum alii ex verbis Reu. Pat. *Hell* hunc sensum eruere poterint, ipsi videbunt, me quidem id non posse, ingenuo fateor. Sed de verbis, Reu. Pat. *Hell* nullas mouebo lites.

V°. Quod Reu. Pat. *Hell* p. 42, differentiam Parallaxium horizontalium Solis et Veneris statuerit $21''$, 052; affirmat esse errorem quendam calami, ex translocatione numeri 5 deducendum; cum pro $21''$, 502 scriptum sit $21''$, 052. Nescio tamen an haec conciliare possit, cum verbis praecedentibus, suae Dissertationis, ubi dicit se *Elementa Cel. de la Lande* assumpsisse: *motum scilicet horarium Veneris a Sole et differentiam Parallaxium horizontalium*. Notandum praeterea est, differentiam parallaxium horizontalium $21''$, 502 non esse accommodatam hypothese parallaxeos $8''$, 56, ea enim exactius inuenitur $21''$, 530, quare ista translocatio numeri 5 dubia redditur. Sed uti iam monui, de verbis disputare longe a meo abest instituto.

VI°. Denique quod attinet assertionem Pat. *Hell*, qua affirmavit p. 107. Dissert. de Parallaxi, me Observationem Wardhusianam ab usu definiendae parallaxeos plane exclusisse; nunc tam ex addendis ad Dissert. de Parallaxi, quae Reu. Pat. *Hell* benigne mecum communicare dignatus est, quam litteris Reverendi Viri, intelligo, errorem aliquem Typi vel scriptio-

scriptionis irrepsisse; quare hoc in negotio, nulla mihi superest iusta querendi causa.


Non parum cognosse, sed in parum cognito diu perseuerasse, turpe est, propterea quod, alterum communi hominum infirmitati, alterum singulari vniuscuiusque vitio est attributum. Cicero de Inventione Lib. Sec.



ERRATA.

ERRATA.

- Pag. 17. lin. 6. loco denominatorem; lege denominatoris membrum posterius.
lin. 17. loco denominatorem, lege denominatoris membrum posterius.
Pag. 29. lin. 9. loco Ohalitee, lege Olahitee.
Pag. 33. lin. 23. loco P. Sainouies, lege P. Sainouics.
Pag. 38. lin. 20. loco Cel. D. Dymont, lege Cel. D. Dymond.
Pag. 51. lin. 13. loco iniquum, lege iniquum.
Pag. 53. lin. 14. loco + 6. 25, 6, lege - 6. 25, 6.
lin. 15. loco + 6. 11, 7, lege - 6. 11, 7.
lin. 22. loco qui semisse secundi, lege qui scrupulo secundo.
Pag. 54. lin. 3. loco $5^b. 41'. 47''$, 7. lege $5^b. 41'. 48''$, 2.
lin. 9. loco $5^b. 41'. 56''$, 1. lege $5^b. 41'. 57''$, 1.
lin. 13. loco 14, 5, lege 14, 2.
lin. 14. loco 21, 3, lege 21, 0.
Pag. 57. lin. 2. loco 30 sec. lege 40 sec.
Pag. 62. lin. 27. loco Ohalitee, lege Otahitee.
Pag. 85. lin. 6. loco priorem, lege priorem quoque.
Pag. 86. lin. 16. loco ratiocina, lege ratiocinia.



Ad Disert. de Parallaxi Solis.

